

O LE EKALEΣΙΑ A IESU KERISO O LE AU PAIA O ASO E GATA AI • APERILA 2014

O Le Liahona

**Olioli ma le Agaga Faafetai
mo le Faaola Toetu, i. 16**

**Auala e Lima e Mulimuli ai
i le Perofeta, i. 22**

**O Faamanuiaga o le Perisitua - ua Avanoa
mo Tagata Uma, i. 46, 50, 53, 54, 60**



*"E galo ea i le
fafine lana tama
ua susu, ua to le
alofa i le tama a
lona manava?
ai lava e galo
ia te i latou;
ae le galo lava
oe ia te a'u.
"Faauta, ua ou
faia lou faatusa
i ou alofilima."*

Isaia 49:15-16



O SAVALI

- 4** **Savali a le Au Peresitene Sili:**
O Se Taula ua Faatulagaina
ma le Mausali
Saunia e Peresitene Dieter F. Uchtdorf
- 7** **Savali a Faiaoga Asiasi:**
O Le Misiona Paia a Iesu Keriso:
Faaola ma le Togiola

TALA FAAALIA

- 12** **O i Tatou o Aao o le Alii**
Saunia e Neil K. Newell
*O le Au Paia mai Pasila, Ekuatoa,
Filipaina, ma Rusia ua faaalia le
uiga o le auauana atu ia i latou o
e i ai manaoga.*
- 16** **Ua Molimau mai Molimau Faa-
pitoa e uiga i le Keriso Soifua**
*Ua molimau mai sui o le Au Peresi-
tene Sili ma le Korama a Apostolo
e Toasefululua e uiga i le Faaola.*
- 22** **Mulimuli i le Perofeta**
Saunia e Elder William R. Walker
*E tatau ona tatou aoaoina nei
lesona e lima mai le faataitaiga
patino a Peresitene Thomas S.
Monson.*
- 26** **O Paionia i Atunuuma:**
**O Le Atu Filipaina: Malosi Faa-
leagaga i luga o Motu o le Sami**
*E ui lava i mala faalenatura ma
faigata tau le tamaoaiga i le atu
Filipaina, ua molimauina e le Au
Paia le tuputupu ae ofoofogia itina.*

I LE FAAVAA

Luma: *Garden Tomb*, saunia e J. Kirk Richards, e le
mafai ona kopiina. I totonu o le faavaa pito i luma:
Ata na tusia e John Luke.

32 O Le Faaaogaina o le Ata o le Faaolataga e Tali ai Fesili

Saunia e LaRene Porter Gaunt
*E mafai ona fesoasoani ia i tatou
le ata o le faaolataga e tali ai nisi
o fesili autu o le olaga.*

MATAGALUEGA

- 8** **O Perofeta o le Feagaiga Tuai:
Mose**
- 10** **O Tatou Aiga, O Tatou Auiga:
Toe Fitu Aso Oo i le Eseta**
- 36** **O Leo o le Au Paia
o Aso e Gata Ai**
- 80** **Seia Tatou Toe Feiloai: Mauaina
o le Faamoemoe i le Lumanai**
Saunia e Stan Pugsley



40

40 Afaí E Tau Tasi o Outou Mata i Lo'u Mamalu

Saunia e Katherine Nelson ma Heidi McConkie

*O le avea ai ma se tagata tauagafau e manaomia le sili atu nai lo ofu sa'o.***44 Talaaga Otooto o Talavou Matutua: O Le Liua ma le Ositaaulaga i Finelani**

Saunia e Melissa Zenteno



54

46 O Alii ma Tamaitai i le Galuega a le AliiSaunia e Elder M. Russell Ballard
*E ao ona malamalama ia alii faapea ma tamaitai i nei upumoni e uiga i le matafaioi o tamaitai i le malo o le Atua.***50 Saunia e Auauna Atu, Auauna Atu e Saunia ai**Saunia e David L. Beck
*O lau auaunaga faalePerisitua Arona o le a faatulagaina le tulaga faatonuina mo le vaega o totoe o lou olaga. O le auala lenei.***53 O Le Mana e Faamanuia ai Tagata Uma***Ua molimau mai taitai o le Ekalesia i faamanuiaiga mai le perisitua.***54 O Le Aumaia o Faamanuia o le Perisitua i Totonu o Lou Aiga**Saunia e Bonnie L. Oscarson
*Po o le lava lou itupa po o le tulaga faaleaiga, e mafai lava ona e faalagolago i le mana o le perisitua e faamanuia ai lou aiga.***56 O Le Talitonuina o le Agavaa**Saunia e Elder Jeffrey R. Holland
*Pe a valaaui na oe e faaaoga le perisitua, o ia te oe le talitonuina e tali atu ai?***60 O Le Faitotoa ma le Ala***O le ala lenei e mafai ai e le perisitua ona fesoasoani ia te oe e toe foi atu i le Tama Faalelagi.***62 Fesili ma Tali***O le a se mea e tatau ona ou faia pe a aliae mai se mataupu i le aoga e le tusa ai ma aoaoga a le ekalesia, e pei o le faapau pepe?***64 Sao pe Sese?**Saunia e David A. Edwards
Fai le suega lenei ma aoao atili e uiga i le auala o loo pelogia ai e Satani i tatou.

68

67 "E matua Faigofie lava, Tamamatua!"Saunia e Elder Enrique R. Falabella
*E lei manatu Raquel ua lava lona matua e faitau ai le Tusi a Mamona.***68 Folafolaga a Porter**Saunia e Carole M. Stephens
*Sa tausia e Porter ana feagaiga—ma na te lei iloaina lava!***70 Aumaia o le Peraimeri i le Fale: O Le Aiga e Totonugalemu i le Fuafuaga a le Tama Faalelagi**

Saunia e Jan Taylor

72 Manatu Lelei**73 O Le Tuleiina o le Papa**Saunia e Elder Terence M. Vinson
*E finagalo le Alti e fesoasoani ia i tatou e foia o tatou faafitauli—e oo lava i faafitauli faatauvaa.***74 Uo i le salafa o le Lalolagi: O Au o Dria mai le Atu Filipaina****76 Mo Tamaiti Laiti****81 Atatosi o le Perofeta: Howard W. Hunter**

O Le Lomiga Faamaonia Faa-Samoa a le Ekalesia a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Apostolo e Toasefululuua:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Craig A. Cardon

Fautua: Jose L. Alonso, Mervyn B. Arnold, Shayne M. Bowen, Stanley G. Ellis, Christoffel Golden

Pule Faatonusili: David T. Warner

Faatonusili o le Lagolago mo Aiga ma Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr

Au TusuTisu ma Faatonutonu: Susan Barrett, Brittany Beattie, David Dickson, David A. Edwards, Matthew D. Flitton, Mindy Raye Friedman, Lori Fuller, Garrett H. Garff, LaRene Porter Gaunt, Jennifer Grace Jones, Michael R. Morris, Sally Johnson Odekirk, Joshua J. Perkey, Jan Pinborough, Richard M. Romney, Paul VanDenBerghe, Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus, C. Kimball Bott, Tom Child, Nate Gines, Colleen Hinckley, Eric P. Johnsen, Susan Lofgren, Scott M. Mooy, Mark W. Robison, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Kevin C. Banks, Connie Bowthorpe Bridge, Julie Burdett, Bryan W. Gygi, Denise Kirby, Ginny J. Nilson, Gayle Tate Rafferty

Tailolomi: Jeff L. Martin

Faatonusili Lolumiga: Craig K. Sedgwick

Faatonusili o le Tufutufaga: Stephen R. Christiansen

Mo le okaina o mekasini, alu i le store.lds.org po o le Faletusi Tutotonu i Pesega, Telefoni 64127. Totogi o le Mekasini: \$0.55 (Samoa) i le kopu. Totogi mo le Tausaga Atoa \$6.60 (Samoa).

Auina atu tusitisiga ma faafesili i luga o le initoneti i le liahona.lds.org: pe meli mai i le Liahona,

Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa" po o se "faatonuala") e lomia i le faa-Alepania, Aminia (Sasae), Pisilama, Palekeria, Kemupotia, Sepuanu, Saina, Kalaoitia, Siekisolvakia, Tenimaka, Take, Igilisi, Estonia, Fiti, Finelani, Farani, Si'amani, Eleni, Hanikeri, Initu, Iselani, Inritonesia, Italia, Iapani, Kiripati, Korea, Latvia, Lituna, Malakasa, Masel, Monokolia, Nouei, Polani, Potukale, Romania, Rusia, Samoa, Saina (ua faafagofieina), Silovenia, Sipaniolo, Suetena, Swahili Tagaloka, Tahiti, Tai, Toga, Lukureini, Urutu, ma Viatename. (E eseese lava gagana.)

© 2014 Puletaofia e le Intellectual Reserve, Inc. Ua taofia ai tatua uma. Lomia i le lunaite Setete o Amerika.

E mafai ona kopu tala ma ata o le Liahona mo le toe faaaogaina i lotu po o le aiga ae ia le faia ai ni pisinisi. E le tatau ona kopu ni tala po o ni ata pe afai o faasa mai i le laina o loo ta'ua ai le e ona lea faatufugaga. Auina atu feisili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

April 2014 Vol. 38 No. 4, O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send all UAA to CFS (see DMM 707.4.12.5). NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.

Manatu mo Afiafi Faaleaiga

O lenei lomiga e aofia ai tusiga ma gaoioiga e mafai ona faaaoga mo afiafi faaleaiga.
O ni faataitaiga nei se lua.



ATA NA TUSIA E DAVID STOKER

"Toe Fitu Aso Oo i le Eseta," itulau 10, ma

"Ua Molimau mai Molimau Faapitoa e uiuga i le Keriso Soifua," itulau 16: Atonu e te manao e faaaoga mea o loo i nei tusiga e fai ai faigalotu i aso taitasi faatasi ma lou aiga i le valaiso ao lumanai le Eseta. Amata i le Aso Sa a o lei oo i le Eseta, faiatou molimau a le Au Peresitene Sili i le itulau 17 ma mulimuli i faatonuga i le "Toe Fitu Aso Oo i le Eseta." O aso taitasi mulimuli ane, faiatou molimau a ni Apostolo se toalua ma faaaoga tusitisiga paia, pese, ma le gaoioiga i le "Toe Fitu Aso Oo i le Eseta" e faasoatau ai se savali i lou aiga. I le Aso Sa o le Eseta, e mafai ona outou matamata i le vitio faaleaiga Paia "He Is Risen" e maua i le lds.org/bible-videos (o loo maua i nisi o gagana).

"E Matua Faigofie lava, Tamamatua!"

itulau 67: A uma ona faiatou le tusiga lenei, atonu e te manao e aumai foi lau uati e mafai ona taofi! Mafaufau e faiatou se itulau mai le Tusi a Mamona o se aiga, ma vaai le umi o le taimi tou te faiatou ai. I le faaaogaina o lena taimi o se taiala, fuafua le umi o le a faaalu e lou aiga e faiatou ai le Tusi a Mamona. Atonu e te manao e faatu se sini e faiatou faatasi le Tusi a Mamona. O le fatuina o se faasologa, e pei o le faiatua i se taimi faatulagaina i aso taitasi, e mafai ona fesoasoani ia te oe ia ausia ai lau sini.

I LAU GAGANA

O loo maua le Liahona ma isi tusi a le Ekalesia i le tele o gagana i languages.lds.org.

AUTU I LENEI LOMIGA

E ta'u mai e numera le titulau muamua o le tusiga.

Aiga, 46, 50, 54, 70

Ata o le faaolataga, 32, 37, 39, 70

Auauna atu, 12, 36, 38, 50

Eseta, 10, 16

Faamoemoe, 80

Faanoanoa, 37, 39

Faataitaiga, 22

Feagaiga, 68

Feagaiga Tuai, 8

Gagana, 40

Galuega faafaifeatalai, 26, 62

Hunter, Howard W., 81

Iesu Keriso, 4, 7, 10, 16, 76

Iloatino, 64

Konafesi aoao, 4

Liua, 26, 44

Malumalu, 26, 44

Migao, 76

Molimau, 62

Monson, Thomas S., 22

Perisitua, 46, 50, 53, 54, 56, 60

Perofeta, 8, 22

Talafaasolopito o le Ekalesia, 26

Tamaitai, 46

Tauagafau, 40

Taua o le tagata lava ia, 7, 12

Togiola, 7, 10, 16, 32, 76

Tusi a Mamona, 67

Uelefea, 12, 36



Saunia e Peresitene
Dieter F. Uchtdorf

Fesoasoani Lua i le
Au Peresitene Sili

O SE Taula ua
FAATULAGAINA
MA LE
Mausali

E lei leva atu sa ou maua se avanoa e folau ai i se vaa tele i le talafatai ofoofogia o Alaska, ISA. A o saunia e le kapeteni le nonofo ai i le po i se faga tuufua mamao, sa iloiloina ma le faaeteete le nofoaga ma tulaga, e pei o le faasologa o le tai, le loloto o vai, ma le mamao mai faafitaluli matautia. Ina ua faamalieina, sa ia faapauina le taula ina ia tumau saogalemu ma mausali le taulaina o le vaa, ma tuuina atu ai i le pasese se avanoa e maofa ai i le maoae o le matagofie o foafoaga a le Atua.

A o ou vaavaai atu i le apitaogalu, na amata ona ou iloaina o loo tafetafea lemu le vaa i sina savili itiiti lava ma le tafe masani o le vai. E ui i lea, na tumau le vaa ma le mausali ma le malosi i totonu o se li'o maumaututu e tusa ai ma le umi o le maea ma le malosi o le taula.

E lei teuina e le kapeteni le taula i luga o le vaa, e saunia ai e tuu ifo i lalo pe a lalata mai se afa. E leai, sa ia taulaina le vaa e avea o se auala saogalemu ma puipuia le vaa mai le agai atu i vai e le saogalemu po o le tafe atu i le matafaga a o saogalemu le pasese ma le auvaa.

A o ou mafaufau i lenei vaaiga, sa oo mai ia te au se lagona faapea, pe afai e le o se avanoa lenei mo se faataoto, ou te lei aveina muamua lava se vaalele.

Aisea Tatou te Manaomia ai Taula

O le faamoemoega o se taula o le faatumauina lea o le saogalemu ma le malupuipuia o se vaa i se nofoaga na manaomia po o le fesoasoani e pulea ai le vaa i le taimi o le leaga o le tau. Ae peitai, ina ia ausia nei faamoemoega taula, e le lava le na o le i ai o se taula. O le taula e tatau ona malosi, faatuatuaaina, ma faaaoga tatau i le taimi ma le nofoaga sa'o.

E manaomia foi e tagata taitoatasai ma aiga ni taula.

E mafai ona oo mai le fili e pei o se matagi malosi e feula ese ai i tatou mai le ala sao ma taufaamatau mai e lafo i tatou agai i papa. Ae o nisi taimi tatou te i ai foi i se tulaga matautia pe a foliga mai o mea uma ua saogalemu—o le malu o le matagi ma le filemu o vai. O le mea moni, e mafai ona tatou i ai i le tulaga e sili ona matautia pe a tatou tafetafea ma o le gaoioi ua matuai laitiiti lava ua tatou tau le iloa ai.

O Le Talalelei o Io Tatou Taula Lea

O taula e tatau ona mausali, malosi, ma tausia lelei ina ia saunia pe a manaomia. Ma le isi foi, e tatau ona faapipi i se faavae e mafai ona tauaveina le mamafa o malosiaga a le fili.

O le mea moni, o le talalelei a Iesu Keriso o se taula faapena. Sa saunia e le Foafoa o le atulaulau mo se faamoe-moega paia ma mamanuina e tuuina atu ai le saogalemu ma le taitaiga i Lana fanau.

O le a le talalelei, e ui i mea uma, e le gata i le fuafuaga a le Atua e togiola Ana fanau, ma toe aumai i latou i Lona afioaga?

O le iloaina o loo i le natura o mea uma le tafetafea, e tatau ona mausali le faatulagaina o a tatou taula i luga o le faavae o le upumoni o le talalelei. E le tatau ona tuutuu malie ifo i lalo i oneone o le faamaualuga po o le tau le papai i luga o o tatou talitonuga maumaututu.

O le masina lenei ua i ai lo tatou avanoa e faalogologo ai i auauna a le Atua i se konafesi aoao o le Ekalesia. O a latou upu, faatasi ma tusitusiga paia ma uunaiga a le Agaga, e maua ai se faavae mautu ma mausali o tulaga faatauaina e faavavau ma mataupu faavae lea e mafai ona tatou faapi-pii i ai o tatou taula ina ia mafai ai ona tatou tumau mausali



ma le saogalemu i le lotolotoi o tauiviga ma luitau o le olaga.

Na aao Mai le perofeta anamua o Helamana, "O luga lava o le papa o lo tatou Togiola, o le Keriso lea, le Alo o le Atua, e ao ina oulua atinae ai lo oulua faavae; ina ia pe a auina mai e le tiapolo ana matagi malolosi, ioe, ana ufanafana i le asiosio, ioe, pe a pesi mai ia te oulua ana uatoa uma ma lana afa malosi, o le a leai sona mana i luga o oulua e toso ifo ai oulua i lalo i le to o le pagatia ma le malaia e le gata, ona o le papa lea ua oulua atinae ai i luga, o le faavae mautinoa lea, o se faavae lea afa e atiae ai tagata e le mafai lava ona pauu i latou" (Helamana 5:12).

O Le Taua o Taula e Faatulagaina ma le Mausali

E i ai se auala o le olaga e tofotofina ai o tatou taula ma faaosooosoina i tatou e tafetafea. E ui i lea, afa ua sa'o ona faatulaga lo tatou taula i le papa o lo tatou Togiola, o le a latou tumau—tusa lava po o le a le malosi o le matagi, le malosi o le galu, po o le maualuluga o galu.

O le mea moni, e lei fuafuaina se vaa ina ia nofo mau i se uafu ae nai

lo lena ina ia sii le taula ma folau i ogasami o le olaga. Ae o se faataoto lena mo se isi taimi.

Mo le taimi nei, ou te maua le toafilemu i le iloaina o le taula o le talalelei ma le papa o lo tatou Togiola o le a tausia i tatou e tumau ma saogalemu.

O lea ituaiga o taula o le a taofia i tatou mai le tafetafea atu i se tulaga matautia ma le le manuia. O le a tatou maua ai le avanoa mamalu e olioli ai i le matagofie e le mafaatusalia o le fesuisuiai pea ma le matagofie o le vaaiga i le olaga.

O le olaga e matagofie ma e aoga le ola ai. O matagi, afa, ma peau

masani e mafai ona faaosooosoina i tatou e tafetafea atu i tulaga matautia e iloa atu pe leai foi, ae o le savali o le talalelei ma lona mana paia o le a taofia i tatou i lo tatou ala e toe foi atu ai i le uafu saogalemu a lo tatou Tama Faalelagi.

O le mea lea, e le gata i lo tatou *faalogo* i lauga o le konafesi aaoao ia Aperila ae faapea foi ona *faaaoga* a latou savali i le avea ai ma se taula faatulagaina ma le mausali i o tatou olaga i aso taitasi.

Tau ina ia faamanuia le Atua ma taitaia i tatou i lenei taumafaiga maoae ma taua! ■

AOAO ATU MAI LENEI SAVALI


Mafaufau e talanoaina le taua o taula i le anotusi o le aiga o Liae a ina ai o tatou taula ma faaosooosoina i tatou e tafetafea. E ui i lea, afa ua sa'o ona faatulaga lo tatou taula i le papa o lo tatou Togiola, o le a latou tumau—tusa lava po o le a le malosi o le matagi, le malosi o le galu, po o le maualuluga o galu.

O le mea moni, e lei fuafuaina se vaa ina ia nofo mau i se uafu ae nai

ATA NA PUEINA E ALA IIE STOCKTREK IMAGES/THINKSTOCK

O Au ma le Konafesi

Saunia e Sarah Deeks



Sa masani ona ou manatu o le konafesi aoao i le faaiuga o le vaiaso sa umi ma le manaia, ae a o faagaso le taimi, ua ou fiafia ma sagisagi atu i ai. O le konafesi aoao i le faaiuga o le vaiaso e mafai ona avea ma se toe faafouina faaleagaga, ae e faigofie lava ona tuu atu i nei lagona e mouese atu pe a faaauau pea le olaga masani i le Aso Gafua. O nisi nei o manatu ua fesoasoani ia te au e faaauau pea le mauaina o le tele o mea mai le konafesi e mafai ai.

Ou te saunia au lava ia mo le konafesi e ala i le tusitusi i lalo o fesili, ona ou faia lea o ni faamatalaga a o loo taliina a'u fesili. Mulimuli ane, ou te manao e sii mai lauga o le konafesi ma musika mai LDS.org ma tuu i luga o se laau MP3, ina ia mafai ona ou faalogo

i se lauga po o se viiga a o ou faia au feau masani i aso taitasi. Ou te fiafia foi e suesue i le lomiga o le konafesi o le *Liahona*. Ou te faailogaina ma tusi faamatalaga i pito o laupepa o la'u lava kopi. E oo atu i le taimi o le isi konafesi, ua faaaoga tatau la'u mekasini. E suesueina faatasi e lou aiga savali i nisi taimi i afiafi faaleaiga.

O le faatumauina o le agaga tatou te lagonaina i le taimi o le konafesi ma faaauauina le aoao mai savali e manaomia ai se galuega, ae o le faia o lenei mea ua avea ma se faamanuiaga sili mo au. Ua ou mauaina le malosi tele ma le taitaiga i taimi o faigata e ala i le suesueina o savali mai konafesi aoao, ma ou te iloa o nei savali e musuia.

E alala le tusitala i Toronto, Kanata.

TAMAITI

Faatulaga Lou Taula

Ole a le mea o le a faatumauina le taulaina o oe i le talalelei? Tusi se laina mai le maea i le lima o le tamaitiiti i le mea lena na saunoa mai Peresitene Uchtdorf o ni nofoaga saogalemu e faatulaga ai lau taula.



Ia suesue ma le agaga tatalo i lenei mataupu ma saili ia iloa le mea e faasoa atu. E faapefesa e le malamalama i le sofiuaga ma le misiona a le Faaola ona faateleina ai lou faatuatua ia te ia ma faamanuia ai isi e te tausia e ala i faiaoga asiasi? Mo nisi faamatatalaga, alu i le reliefsoociety.lds.org.

O Le Misiona Paia a lesu Keriso: Faaola ma le Togiola

O se vaega lenei o se faasologa o Savali a Faiaoga Asiasi e faaautu i vaega o le misiona a le Faaola.

O se tasi o suafa e sili ona taua ua faamatalaina o Iesu Keriso o le “Togiola,” na saunoa ai Elder D. Todd Christofferson o le Korama a Apostolo e Toasefululu. “*Togiola*” o lona uiga o le totogi o se tautinoga po o se aitalafu. *Togiola* e mafai foi ona faauigaina o le laveai pe faasaoloto e ala i le totogiina o le tau. Ua fautua mai e nei uiga taitasi ni vaega eseese o le togiola sili na faataunuina e Iesu Keriso e ala i Lona Togiola, lea e aofia ai, i le faauigaga a le lomifefilo, “ia laveai mai le agasala ma ona faasalaga, e ala i se taulaga na faia mo le tagata agasala.”¹

Na saunoa mai Linda K. Burton, le peresitene aoao o le Aualofa: “Tama Faalelagi . . . auina mai ai Lona Pele e toatasi ma atoatoa e puapuagatia mo a tatou agasala, o lo tatou lototiga, ma mea uma e foliga e le talafeagai i o tatou lava olaga taitoatas.

“ . . . Na fai mai ma loimata se tasi tamaitai o le na aafia i ni tausaga i



tofotofoga ma faanoanoaga faapea, “Ua ou iloa nei ua pei lava a’u o se 20-tala-pepa tuai—ua maanuminumi, masaesae, palapala, matafi, ma mafugafuga. Ae . . . o au lava o se 20-tala pepa.’ Ua iloa e lenei fafine o ia . . . ua lava lona taua i le [Atua] e auina mai Lona Alo e togiola mo ia lava. E ao i uso uma i le Ekalesia ona iloa le mea ua iloa e lenei fafine.”²

Mai Tusitusiga Paia

2 Nifae 2:6; Helamana 5:11–12;
Mose 1:39

FAAMATALAGA

1. D. Todd Christofferson, “*Togiola*,” *Liahona*, Me 2013, 109.
2. Linda K. Burton, “Pe Ua Tusia ea i o Tatou Loto le Faatuatua i le Togiola a Iesu Keriso?” *Liahona*, Nov. 2012, 114.

O Le A se Mea e Mafai Ona Ou Faia?

1. E mafai faapefesa ona tatou faaali atu le agaga faafetai i le Faaola ma le Togiola, o Iesu Keriso?

2. E mafai faapefesa ona tatou tofo i faamanuiga o le tau-laga togiola a lo tatou Faaola i o tatou olaga?

Faatuatua, Aiga,
Toomaga



Mai lo Tatou Talafaasolopito

O le Feagaiga Fou e aofia ai tala o tamaitai o e na faatinoina le faatuatua ia lesu Keriso, aoao ma ola i Ana aoaoga, ma molimau e uiga i Lana galuega talai, vasega, ma le mamalu.

Na fetalai atu lesu i le fafine i le vaieli:

“A o se inu i le vai ou te avatu ia te ia, e le toe fia inu ia e faavavau; a o le vai ou te avatu ia te ia, e avea i totonu ia te ia o le vaipuna, e puna i luga i le ola e faavavau.

“Ua fai mai le fafine ia te ia, Le Alii e, aumai ia te au lena vai, ina ia ou le toe fia inu. . . .

“Ua ou iloa o le a maliu mai [le Mesia], o le ua igoa ia Keriso: pe a maliu mai o ia, e faailoa mai mea uma ia te i matou.

“Ona fetalai atu lea o lesu ia te ia, O au lenei, o le tautala atu ia te oe.”

Ona “tuu lea e le fafine o lana vai” ma tuuina atu le molimau ia te la i le aai. (Tagai i le loane 4:6–30.)

MOSE

*"Oka se maoae o Mose, e oo lava ia Keriso o loo faamatalaina i le avea ai ma se Perofeta e pei o lenei taitai anamua o le au a Israelu."¹—Elder Bruce R. McConkie (1915–85)
o le Korama a Apostolo e Toasefululua*

Na ou fanau i Aikupito i le taimi o sa nofopologa ai lo'u nuu, le aiga o Israelu. Ona o le fefe i le anoano o pologa Israelu, sa faatonuina e Farao alii uma o Israelu ia fasiotia pe a fananau mai. Ina ia puipuia au, na natia au e lo'u tina mo le tolu masina talu lo'u fanau mai a o lei tuuina au i totonu o se ato i le va o vao utuutu i le Naila. Na maua au e le afafine o Farao ma tausia au o sana lava tama tama.²

Ina ua faasolo ina ou matua, sa ou tuua Aikupito ae nofo i le lauelele o Mitiana. O iina sa fiafia ai Ietero ia te au, o se leoleo mamoe ma o se ositau-laga, ma faaipoipo ai i lona afafine o Sepora. Mai i a Ietero, sa ou maua ai le Perisitua Mekisateko.³

I se tasi aso a o ou tausia le lafu a Ietero, sa faaali mai le Alii ia te au i se laau talatala na mumu ma valaauina au e faasaolotoina le fanauga a Israelu mai le nofopologa.⁴

Sa ou toe foi atu i Aikupito ma ta'u atu ia Farao ia faasaoloto le nuu o le Alii, ae nai lo lena na ia faateleina a latou avega. Na auina atu e le Alii se faasologa o mala i tagata o Aikupito, ae na faamaaa e Farao lona loto ma sa musu pea e faasaoloto le aiga o Israelu. O le mala mulimuli o se agelu o le faafanoga lea na fasiotia atalii ulumatua o aiga uma o Aikupito. Na puipuia le aiga o Israelu mai le

agelu o le faafanoga e ala i le sausauina o le toto o le tamai mamoe mama i luga o a latou laau faalava o le faitotoa ma ia nonofo i totonu o le fale. Na ala mai ia te au, ona faavaeina e le Alii le Taumafataga o le Paseka o se sauniga e fesoasoani ai i le aiga o Israelu ia manatua lenei vavega i tausaga taitasi.⁵

O lenei mala mulimuli na mafua ai ona lotomalie Farao ma faasaoloto le aiga o Israelu. Ae o Farao na mulimuli ane faamaaa lona loto

ma auina atu ana autau e tuliloa le aiga o Israelu. Sa faamanuaina au e le Alii i le mana e vaeluaina ai le Sami Ulaula, ma matou sosola ese ai i luga o le lauelele matutu a o



faalolovaia e le sami le autau a Farao.⁶

Ona taitaiina lea e le Alii i matou i le vao i se ao i le ao ae o se afi faanitu i le po. Sa ia tausia i matou i le vai, manai, ma salu.

Sa ouaea le Mauga o Sinai, lea na ou nofo ai mo aso e 40 ma maua ai Tulafono e Sefulu mai le Alii. Ina ua ou toe foi mai le mauga, ua liliu ese le fanauga a Israelu mai le Atua ma fausia se tamai povi auro e tapuai i ai. Sa le toe agavaa i latou mo le mauaina o le tulafono na tuuina mai e le Atua ia te au, o lea na ou ta'eia ai papamaa o loo i ai. Sa ou toe foi atu i le mauga,

lea na tuu mai ai e le Alii le tulafono maualalo ua taua i

lo'u igoa—o le tulafono a Mose.⁸

I le vao na faaalia mai ai e le Alii ia te au le fuafuaga e fausia se tapeneko, po o se malumalu feaveai. Sa matou tauaveina le tapeneko faatasi ma i matou i a matou faigamalaga ina ia mafai ona matou tapuai ai. I le tapeneko, na maua ai e tagata sauniga ma na ou talanoa ai i le Alii “fesagai lava, faapei o le tagata ona tautalatala ma lana uo.”⁹ Na faasino mai foi e le Alii ia te au pe faapefea ona fausia le atolaau o le feagaiga, se vaega paia e teuina i le vaega aupito sili ona paia o le tapeneko, o le Paia o Paia.¹⁰

Ina ua auina mai e le Alii “gata uogo” e aoai ai le fanauga a Israelu, na poloaiina au e fai se gata apamea ma sii i luga maualuga i se pou ina ia mafai e i latou uma o e sa utia e gata uogo, ona vaavaai atu i ai ma faamaloloina ai. Ae ona o lo latou

faamaualuga ma le faigofie o le galuega, o le toatele na lē mafai ona vaai ma na iu ina fano ai.¹¹

Sa faia e le Alii le fanauga a Israuelu ina ia feoai solo i le vao mo le 40 tau-saga a o le'i faatagaina i latou e ulu atu i le laueelele na folafolaina.¹² Ou te lei ulufale atu ae sa “aveina ae e le Agaga” i le Alii.¹³ ■

FAAMATALAGA

1. Bruce R. McConkie, *Mormon Doctrine*, Iom. Iona 2. (1966), 515; tagai foi i le Teuteronomie 18:15–19.
2. Tagai i le Esoto 1; 2:1–10.
3. Tagai i le Esoto 2:11–22; Mataupu Faavae ma Feagaiga 84:6.
4. Tagai i le Esoto 3; 4:1–17.
5. Tagai i le Esoto 5–12; Esekielu 45:21.
6. Tagai Esoto 14.
7. Tagai i le Esoto 13:21–22; 15: 22–27; 16; 17:1–7.
8. Tagai i le Esoto 24:18; 31: 18; 32; 34.
9. Esoto 33:11.
10. Tagai i le Esoto 25–29; 40: 21.
11. Tagai i le Numera 21: 6–9; 1 Nifae 17:41; Alema 33:19–20.
12. Tagai i le Numera 14:33–34.
13. Alema 45:19.

PUSA O MEA MONI: MOSE

Tusitusiga a Mose: E faaopoopo atu i le tusi a Mose i le Penina Tau Tele, na tusia e Mose tusi muamua e lima i le Tusi Paia: Kenese, Esoto, Levitiko, Numera, ma le Teuteronomie.

Matafaioi o le muai olaga: filifilia e pulefaa-malumalu i se tisipensione (tagai i le Aperaamo 3:22–23)

Matafaioi o le olaga nei: na taitaia le fanauga a Israuelu mai Aikupito; maua le tulafono i luga o le Mauga o Sinai (tagai i le Esoto 12; 20)

Matafaioi pe a mavae le olaga faitino: na faaali mai i luga o le Mauga o Liua, tuuina atu ki o le perisitua i a Peteru, lakopo ma loane (tagai i le Taiala i Tusitusiga paia, “Liua,” scriptures.lds.org); na faaali mai i le Malumalu o Katedani i Ohaio, ISA, i le aso 3 o Aperila, 1836, toefuatai mai ki o le faapotopotoina o Israuelu ia Iosefa Samita (tagai i le MF&F 110:11)



TOE FITU ASO OO I LE ESETA

E mafai ona e aoao ma lou aiga e uiga i mea na faia e Iesu a o soifua o Ia i le lalolagi. Amata i le Aso Sa a o lei oo i le Eseta. I aso taitasi, fai le gaoioiga, pe usu le pese (po o se isi pese i lena autu). Ona oti ese lea ma faapipii i se pusa avanoa le ata o Iesu e fetaui ma le tala mai tusitusiga paia. E faatumulia loa pusa uma, oo mai loa le Eseta! ■

**ASO**

1 Na auina mai e le Tama Faalelagi Lona Alo, o lesu Keriso, e fanau mai i le lalolagi.

- Luka 2:4–7
- "Na la Auina mai Lona Alo" (*Tusipese a Tamaiti*, 20).

ASO

2 Sa tamaititi o lesu. E mafai ona tatou avea faapei o la e ala i le avea ma se tagata lelei ma agalelei.

- Luka 2:40, 52
- "Sa Tamaititi o lesu" (*Tusipese a Tamaiti*, 34).

ASO

3 Sa tausia e lesu poloaga uma a le Tama Faalelagi, e aofia ai le poloaga ina ia papatisoina.

- Mataio 3:13–17
- "Papatisoga" (*Tusipese a Tamaiti*, 54).

ASO

4 Sa faia e lesu le tele o vavega, e pei o le faamaloloina o tagata sa mama'i, fesoasoani i tagata tauaso e toe vaai, ma faafilemuina se matagi.

- Mareko 4:36–39
- "Tau Mai Tala la lesu" (*Tusipese a Tamaiti*, 36).

3

2

4

ASO

5 I le Talisuaga Mulimuli, na talosagaina ai e lesu Ona soo e aai ma feinu i le faamanatuga o se auala e manatua ai o la. Pe a tatou tagofia le faamanatuga i vaiaso taitasi e mafai foi e i tatou ona manatua le Faaoala.

- Luka 22:19–20
- Talanoa i ou matua e uiga i se mea e mafai ona e faia e fesoasoani ai e te mafaufau ai ia lesu i le taimi o le faamanatuga o le Aso Sa nei.

ASO

6 Talu ai ona e alolofa le Tama Faalelagi ma lesu Keriso ia i tatou, na afio mai lesu i le lalolagi i puapuagatia mo a tatou agasala ina ia mafai ona faamagaloina i tatou ma toe foi atu i le Tama Faalelagi.




- Luka 22:41–44
- O le a se mea e mafai ona e faia i le aso e faaali atu ai ia lesu ua e faafetai mo Lana taulaga?

**ASO**

7 Ina ua mavae ona i ai i le tuugamau mo aso e tolu, na toetu mai lesu. Aua na toetu o la, e mafai ona tatou toetutu foi.

- Ioane 20:15–17
- Luka 24:36–40
- "Pe Na Toe Soifua Moni Mai ea lesu?" (*Tusipese a Tamalti*, 45).

*E mafai ona
e faalogo i
pese i lenei
gaoioiga i le
lds.org/music.*





O I TATOUE Aao o le Alii

*O le sailia o e matitiva ma auauna atu ia i latou ua
puapuagatia e matuai taua lava i lona uiga o le avea ma se soo o Iesu Keriso.*

Saunia e Neil K. Newell

Tautua a le Uelefea

Tle taimi o le popofou o le Pau Tele o le Tamaoaiga, e toaono peresitene o siteki mai le Vanu o Sate Leki na faapotopoto faatasi e tau foia ao pogisa o le mativa ma le fiaai lea na faamata'uina ai le ono faalofituina o le tele o tagata o le Ekalesia.¹ E ui lava o le pau o le tamaoaiga na aafia ai tagata i soo se mea, o Iuta lava ia na faapitoa lava ona faataumaoia.²

O le taimi lena, o taitai o le Ekalesia na itiiti ni nai punaoa e fesoasoani ia i latou e manaomia le fesoasoani. E mafai ona latou faaaogaina le taulaga anapogi, ioe, ae o le faaauau pea o le manaomia na sili atu le maoae nai lo se isi lava mea na latou iloaina muamua. I lalo o le taitaiga a le au Epikopo Pulefaamalumalu, sa faavaeina se Matagaluega o le Tesareta mo Galuega i le amataga o le vaitau o le 1900. Ae sa lei lelei ona faaauppegaina e taulima ai sea ituaiga tulaga maoae o le manaomia.

Na iloa e nei taitai perisitua e toaono faapea afai o le a fesoasoani atu i tagata o a latou siteki, latou te le mafai ona toe faatali. Ua tatau loa ona latou faia se gaoioiga vave. Sa amata ona latou faagalueina tagata. Na latou faatulagaina alii ma ave i latou i faatoaga lea e mafai ona latou sele-sele ai fua o faatoaga. I le faafesuiai mo a latou galuega, o faifaatoaga loto faafetai na foaiina atu meaai ma le agalelei i alii. Sa aveina atu vaega o totoe i se fale teuoloa ma tufatufaina atu i isi o e na fia aai. A o faateleina foai, na amata

ona tuuapaina e le Au Paia meaai e faasaoina ai. O le amataga lenei o le polokalama uelefea o ona po nei.

I le valusefulu tausaga mulimuli ane, ua vaai atu taitai o le Ekalesia o aso nei i a latou aulotu ma lagona lea lava naunau e tasi e aapa atu ia i latou e manaomia le fesoasoani.

I le konafesi aoao ia Oketopa 2011, na saunoa ai Peresitene Dieter F. Uchtdorf, Fesoasoani Lua i le Au Peresitene Sili: “Ua tele lava ina tatou matauina manaoga o siomia ai i tatou ma le faamoemoe o le a tu mai se tasi mai se mea mamao e faafetaia’ia na manaoga. Atonu tatou te faatalitali mo ni tagata tomai faapitoa ma se poto faapitoa e foaina ni faafitauli maoti. A tatou faia lenei mea, ua tatou aveesea mai o tatou tuaoi le auaunaga sa tatau ona latou maua, ma ua tatou aveesea i tatou lava mai avanoa e auauna atu ai. E ui e leai se mea e leaga ai tagata tomai faapitoa, ae manatu i ai: o le a le mafai lava ona latou foaina uma faafitauli. Ae, ua tuu e le Alii Lana perisitua ma ona faatulagaga i o tatou faitotoa i malo uma ua faatuina ai le Ekalesia.”³

O lenei valaau mo taitai o le Ekalesia i le lotoifale ma tagatalotu ia faia se gaoioiga e pei ona musuia e le Agaga Paia ua taitaiina ai le toatele i le lalolagi atoa ia, e pei ona saunoa mai Peresitene Uchtdorf, “fuafuaina lava e i latou [lava].”⁴ Ua latou afe i luga lima o o latou ofu ma tautino

mai “ia manatua i mea uma e ua matitiva ma e ua lē tagolima, e ua mamai ma e ua puapuagatia” (MF&F 52:40).

Ekuatoa

A o vaai atu Epikopo Johnny Morante i Guayaquil, Ekuatoa, i tagata o lana uarota, na matuai faapopoleina tele o ia. Na toatele naua aiga na tauivi ina ia maua e oo lava i sina mea itiiti e manaomia o le olaga. Sa manao o ia e fesoasoani ia i latou, o lea na ia talanoa faatasi ai ma taitai o le uarota, ma aveina atu le mataupu i le Alii.

Talu ai sa utiuti avanoa faigaluega i le eria, sa amata ona latou galulue faatasi ma se vaega o tuafafine e 11, uunaia i latou e tulimatai atu i le mauaina o se avanoa faapisinisi-laitiiti. Sa matauina e nei tamaitai sa i ai se manaomia mo vailaau lelei, taugofie mo le faamamaina o fale, ma sa latou mafaufau pe mafai ona latou faia ma faatau atu na mea i lo latou nuu. Ae faapefea ona latou aoao e faia nei sapalai [vailaau].

I le taimi lea, na iloa ai e Epikopo Morante se tuafafine e leo faigaluega i lana uarota sa galue e avea ma se saienitisi o vailaau. Ina ua fesiliglia e tuafafine e 11 o ia pe mafai ona fesoasoani, sa fafia o ia e aoaoina i latou pe faapefea ona faia ni vailaau e saogalemu, ma tulaga lelei.

Na latou faia se fuafuaga faapisinisi, faailogaina eria i le nuu e galulue ai tuafafine taitasi, filifili vailaau o le a latou faia, ma mamanuina le afifiina ma le faaigoaina.

I ni nai masina, sa latou fausia se faavae mo tagata faatau ma ua lava alagatupe maua e siitia ai lo latou matitiva, ma fesoasoani e saunaia ai mea e manaomia mo o latou aiga.

Ina ua iloa e pule o kamupani o vailaau i le lotoifale e uiga i lenei taumafaiga, na faagaeetia i latou i le tala e uiga i le saienitisi o vailaau e leai se galuega. Na iu lava ina latou faatalanoaina ma faafaigaluegaina o ia e taitaia la latou lava fale gaosimea.

Rusia

I le Uarota o Rechnoy i Moscow, Rusia, o Galina Goncharova, o lē sa avea ma tusitalafaasolopito a le uarota, na see i se aisa ma gau ai ona lima e lua. Sa aveina o ia i le falemai, ma faasima ai ona lima. Sa le mafai ona ia fafagaina o ia lava pe fai ona ofu. Sa le mafai ona ia selu lona lauulu e oo lava i le taliina o le telefonu.

Ina ua iloa e tagata o lana uarota le mea na tupu, sa vave ona latou tali atu. Sa tuuina atu e le au perisitua ia te ia se faamanuiaga ma galulue faatasi ma tuafafine o le Aualofa e faia se faasologa o taimi e vaaia ai lenei tuafafine lelei ma tali atu i ona manaoga.

O Vladimir Nechiporov, le taitai misiona a le uarota, na fai mai, “Tatou te manatua se saunoaga na tuuina atu i se konafesi aoao e uiga i se faatagata o Keriso lea na leai ni ona lima.⁵ I lalo o le faatagata sa tuu ai e se tasi se maa



Ina ua pau Galina Goncharova ma gau ai ona lima, o ona uso o le Aualofa na auauna atu e avea ma ona lima.

ua faitauina, ‘O Outou o o’u lima.’ Mo nai vaiaso na pagatia ai lenei tuafafine lelei, na lagona ai e tagata o le Uarota a Rechnoy se sootaga i lena tala. Na avea moni lava i matou ma ona lima.”

Filipaina

Ina ua oo mai le Afa o le Tau Vevela o Washi i le atu Filipaina i le 2011, sa lolovaia le eria i tatafe o vai ma le matagi. Sa faaleagaina nisi o fale e 41,000, ma e sili atu ma le 1,200 tagata na maumau o latou soifua.

A o lei oo mai le lologa, o Max Saavedra, le peresitene o le Siteki o Cagayan de Oro i Filipaina, sa lagonaina le uunaiga e fatu se au o le siteki mo faalavelave faafuasei. Sa ia faatuina ni komiti e faataunuu ni tofiga eseese—mea

uma mai le sailia ma laveai i le fesoasoani muamua i le tuuina atu o meaai, vai, ma lavalava.

A o faaitiitia le lolovai i se tulaga saogalemu, sa faatulagaina loa e taitai tagata o le Ekalesia. Sa latou tulimataiina le saogalemu o tagata taitoatas i ma iloilo mea sa faaleagaina. Na tuuina mai e se tasi tagata ni vaa pa'u e aumai ai tagata sa pa'ulia i le saogalemu. Sa tatalaina falelotu e tuuina atu ai se malutaga i tagata uma e manaomia ni meaai, lavalava, palanikeke, ma se nofoaga le tumau e nonofo ai. O vai mama sa avea ma se manaoga e sili le taua, o lea na faafesootai ai e Peresitene Saavedra se pisinisi i le lotoifale na umia se loli fuimu, ma sa latou aveina atu le suavai mama i nofoaga autu o le sulufaiga i falelotu. O tagatalotu na i ai le tomai faafomai na tali atu ia i latou o e na manunua.

O le taimi lava na tausia ai tagata o le Ekalesia, na asiasi atu ai loa Peresitene Saavedra ma lana au galulue i isi nofoaga autu o le sulufaiga i le aai ma ofoina atu le fesoasoani. Na latou aumaia ia i latou meaai ma isi sapalai. O le toatele o tagata o le ekalesia, e ui ina ua leai ni o latou lava fale, ae na auauna atu i isi ma le le manatu faapito i le taimi lava na uma ai le afa. Ina ua uma timuga ma matutu le eleele, na amata loa ona galulue Lima Fesoasoani Mamona volenitia mai siteki e tolu e tufatufa atu sapalai faapea foi le fesoasoani i le faamamaina.

Pasila

I totonus o le aai o Sete Lagoas, Pasila, o loo i ai se malutaga mo tamaitai e i ai manaoga faapitoa o e na aafia o latou olaga i fualau oona. O aso taitasi latou te tauivi ai ia feola. Sa i ai sa latou ogamu laitiiti e faaaoga e fai ai pe tusa ma le 30 pa falaoa i le aso. E ui na maua e tamaitai se fesoasoaniga mai se faalapotopotoga fesoasoani alofa i le lotoifale, sa tau le lava a latou meaai mo i latou lava. Ina ua iloa manaoga o nei tamaitai e taitai o le Ekalesia mai le Siteki o Sete Lagoas i Pasila, sa latou mananao e fesoasoani ia i latou.

Sa latou talanoa i tamaitai e uiga i o latou manaoga. Na fai mai tamaitai pe ana mafai ona latou faia ni falaoa ia sili atu, o le a le gata ina sili atu ona lelei a latou meaai ae atonu e mafai ona faatau atu ni nai falaoa ma maua ai sina tupe e matuai manaomia lava.

Na galulue faatasi taitai ma tagata o le Ekalesia ma

leoleo i le lotoifale o le militeli ma se aoga i le lotoifale e faaleleia tulaga mo nei tamaitai. Faatasi ai ma le fesoasoani o se foai agaalofa a le Ekalesia ma volenitia mai le Ekalesia ma le nuu, sa mafai ona latou faia se falefalaoa fou—lea na mafai ai e tamaitai ona gaosi ni falaoa e 300 i aso taitasi.

Faatasi ai ma tipe ua latou maua, ua mafai nei e tamaitai i le falefalaoa ona faafaigaluega le latou tagata faigaluega muamua—o se tasi o tamaitai i le malutaga.

O Le Galuega a le Uelefea

E pei o na taitai musuia o le Ekalesia i le tele o tausaga ua mavae, na vaai i le manaomia tele o le fesoasoani o sio-mia ai i latou ma na mumusu e liliu ese, o taitai ma tagata o le Ekalesia i le lalolagi atoa i le taimi nei o loo faia lea lava mea i o latou lava eria ma i la latou lava ala.

Ina ua saunoa mai Peresitene Uchtdorf i le Ekalesia e uiga i le tausiga o isi, sa ia fai mai: "O le ala a Le Alii e le o le saofai i autafa o le vaitafe ma faatalitali i le taimi e pe ai le vai ona tatou kolosi lea. A e ala i le o mai faatasi, afe i luga lima o o tatou ofu, ma o e galulue, ma fausia se ala-laupapa po o se vaa e kolosi ai le vai o o tatou luitau."⁶

O le sailia o e matitiva ma auauna atu ia i latou o e mafatia o se vaega taua o le uiga o le avea ma se soo o Keriso. O le galuega na faia e Iesu Keriso lava Ia a o Ia auauna atu i le nuu o Ona aso. "O lenei galuega o le faia i le ala a le Alii ua le na o se isi mea i le lisi o polokalama a le Ekalesia," le saunoaga faaiu a Peresitene Uchtdorf. "E le mafai ona lafoaiina pe tuu ese. E totonugalemu i a tatou aoaoga faavae; o le uiga moni lea o la tatou tapuaiga."⁷ ■

FAAMATALAGA

1. O le fa o nei peresitene o siteki—Hugh B. Brown, Harold B. Lee, Henry D. Moyle, ma Marion G. Romney—o le a valaauina e avea ma Apostolo i se taimi mulimuli ane, ma o le toafa uma o le a auauna atu i le Au peresitene Sili o le Ekalesia i se taimi mulimuli ane. O Harold B. Lee na avea ma Peresitene lona 11 o le Ekalesia.
2. I le 1930, o Iuta sa lona lua le maualuga o le tulaga o le leai o ni galulega i le Iunaite Setete. Tagai ia Garth L. Mangum ma Bruce D. Blumell, *The Mormons' War on Poverty: A History of LDS Welfare 1830–1990* (1993), 95.
3. Dieter F. Uchtdorf, "O Le Faia i le Ala a le Alii," *Liahona*, Nov. 2011, 54.
4. Dieter F. Uchtdorf, "O Le Faia i le Ala a le Alii," 55.
5. Tagai Dieter F. Uchtdorf, "O Outou o O'u Lima," *Liahona*, Me 2010, 68.
6. Dieter F. Uchtdorf, "O Le Faia i le Ala a le Alii," 55.
7. Dieter F. Uchtdorf, "O Le Faia i le Ala a le Alii," 55–56.



Osui o le Au Peresitene Sili ma le Korama a Aposetolo e Toasefululua o ni perofeta o ona po nei, tagatavaai ma talifaaaliga e tutu o ni “molimau faapitoa o le suafa o Keriso i le lalolagi atoa” (MF&F 107:23). O lea tulaga, ua ia i latou le tiutetauave e molimau atu i le paia o Iesu Keriso ma Lana misiona o le Faaola ma le Togiola o le lalolagi.

I upusii nei, o nei alii filifilia ma sa tofia ua faasoa mai a latou molimau i le Togiola, Toetu, ma le soifua moni o le Faaola.

Ua Molimau mai Molimau Faapitoa i le Keriso Soifua



O Iesu o lo Tatou Togiola

“Ma lo’u loto atoa
ma le mafanafana
o le malosi o lo’u
agaga, ou te sii
a’e ai lo’u leo o

se molimau faapitoa ma folafola
atu faapea o loo soifua le Atua.
O Iesu o Lona Alo, le Alo e Toatas
o le Tama i le tino. O Ia o lo tatou
Togiola; o Ia o lo tatou Puluvaga
i le Tama. O Ia lea na maliu i luga
o le satauro e togiola mo a tatou
agasala. Na avea ma uluai fua o le
Toetu. Talu ai sa maliu o Ia, o le
a toe ola ai tagata uma. ‘O lea, ou
olioli ai: “Ou iloa o Ia soifua mai!”
[“Ua Ou Iloa Lo’u Faaola,” *Viiga*,
nu. 73].”

Peresitene Thomas S. Monson, “Ua Ou
Iloa o loo Soifua Lo’u Faaola!” *Liahona*,
Me 2007, 25.



O Au o se Molimau

“O au o se molimau
o le Toetu o
le Alii ma le mau-
tinoa e pei sa ou
i ai iina i le afiafi

faatasi ma soo e toalua i le fale i le
ala i Emau. Ou te iloa o loo soifua
o Ia ma le mautinoa e pei o Iosefa
Samita ina ua ia vaai i le Tama ma
le Alo i le malama o se taeao susulu
i le togavaao i Palamaira. . . .

“. . . Ou te molimau atu ai o se
molimau o le Faaola toetu ma lo
tatou Togiola.”

Peresitene Henry B. Eyring, *Fesoasoani Mua-
mua i le Au peresitene Sili*, “O Mai ia te Au,”
Liahona, Me 2013, 25.



O le Togiola ma le Faaolataga

“O le Atua le Tama
o le tupuga o le
talalelei; o se vaega
autu o le fuafuaga a
le Atua o le faaola-

taga, po o le fuafuaga o le togiola. Ua
ta’ua o le talalelei a Iesu Keriso aua
o le Togiola a Iesu Keriso ua mafai ai
ona maua le togiola ma le faaolataga.
O le Togiola e togiolaina ai alii uma,
ma tamaitai, atoa ma tamaiti mai le
oti faaletino e aunoa ma ni tuutuuga,
ma o le a togiolaina foi tagata uma
mai a latou lava agasala i luga o le
tuutuuga latou te taliaina ma usiusitai
i le talalelei a Iesu Keriso. . . .

“Ou te molimau atu ai i lenei mea,
faatasi ma lo’u loto atoa ma le mafau-
fau atoa.”

Peresitene Dieter F. Uchtdorf, *Fesoasoani Lua i
le Au Peresitene Sili*, “E Le Tatau Ea Ona Tatou
Olioli?” *Liahona*, Nov. 2007, 19.



O Iesu o Le Keriso

“Ou te iloa o le Atua o lo tatou Tama. Sa Ia faailoa mai Lona Alo, o Iesu Keriso, ia Iosefa Samita. Ou te tautino atu ia te outou ou te iloa o Iesu o le Keriso. Ou te iloa o loo soifua o Ia. Sa soifua mai o ia i le vaeluaga o taimi. Sa Ia aoaoina mai Lana talalelei ma sa tofotofina o Ia. Sa puapuagatia ma sa faasatauroina ma toetu mai i le aso tolu. O Ia, e pei foi o Lona Tama, o loo i ai se tino o aano ma ivi. Sa Ia faia Lana Togiola. Ou te molimau atu ia te Ia. O loo avea au ma se moli-mau ia te Ia.”

Peresitene Boyd K. Packer, Peresitene o le Korama a Apostolo e Toasefululua, “O Le Toasefululua,” *Liahona*, Me 2008, 87.



O Se Togiola mo le Aiga o Tagata

“O [Iesu Keriso] o le totonugalemu o le fuafuaga faavavau a le Tama, o le Faaola na avea ma togiola mo tagata. Na auina mai e le Atua Lona Alo Pele ina ia faatoilaloina le Pau o Atamu ma Eva. Na afio mai i le lalolagi o lo tatou Faaola ma le Togiola. Sa Ia faatoilaloina puniala o le otia faletino mo i tatou e ala lea i le ofoina atu o Lona lava soifua. Ina ua maliu o Ia i luga o le satauro, sa tuuese-eseina Lona agaga mai Lona tino. O le aso tolu na toe tuufaatasia ai Lona agaga ma Lona tino e faavavau, e lei toe tuueseeseina lava.”

Elder L. Tom Perry o le Korama a Apostolo e Toasefululua, “O Le Fuafuaga o le Faaolataga,” *Liahona*, Nov. 2006, 71.



O Le Vaega Autu o le Talafaasolopito o Tagata

“Na faatino [e le Faaola] lana Togiola i Ketesemane, lea na Ia afutoto ai (tagai i le Luka 22:44), ma luga i Kolokota (po o Kalevaria), lea na sii ae ai Lona tino i luga o le satauro i le “mea o i ai le ulupoo,” lea e faatusa i le otia (Mareko 15:22; Mataio 27:33; tagai foi i le 3 Nifae 27:14). O lena Togiola le iu o le a faasaoloto mai ai le tagata mai le otia e lē gata (tagai i le 2 Nifae 9:7). O le Togiola a le Faaola ua avea ai le toetu o se mea moni ma le ola e faavavau o se avanoa mo tagata uma. O Lana Togiola ua avea ma vaega autu o le talafaasolopito o tagata uma”

Elder Russell M. Nelson o le Korama a Apostolo e Toasefululua, “O Le Filemu ma le Olioli i le Iloa o loo Soifua le Faaola,” *Ensign*, Tes. 2011, 20; *Liahona*, Tes. 2011, 22.



O Se Taulaga mo Agasala

“Na onosaia e Iesu Keriso le mafatiaga e le mafuataina, ina ia ositaulagaina ai o Ia lava mo agasala a tagata uma. O lena taulaga na ofolina atu ai le Tamai Mamoe e lelei atoatoa—e aunoa ma se ila—mo le aofaiga atoa o mea leaga—o agasala a le lalolagi atoa. . . .

“O lena taulaga—o le Togiola a Iesu Keriso—ua i ai lea i le totonugalemu o le ata o le faaolataga. . . .

“Ou te iloa o Iesu Keriso o le Alo Pele e Toatasi o le Atua le Tama e Faavavau. Ou te iloa ona o Lana taulaga togiola, ua tatou maua ai le faamautinoaga o le tino ola pea ma le avanoa mo le ola e faavavau. O ia o lo tatou Alii, lo tatou Faaola, ma lo tatou Togiola.”

Elder Dallin H. Oaks o le Korama a Apostolo e Toasefululua, “Ositaulaga,” *Liahona*, Me 2012, 19, 22.



Ua Taialaina e le Faaola Lana Ekalesia i le Asō

“O le Togiola a Iesu Keriso o se vaega sili lea ona taua o le fuafuaga a lo tatou Tama Faalelagi mo le misiona faalelalolagi a Lona Alo faapea ma lo tatou faaolataga. E tatau ona tatou matua lotofaafetai, ona e lei faalavelaveina e lo tatou Tama Faalelagi, ae sa ia taofiofi Lona manao fatama ina ia laveaiina Lona Alo Pele. Talu ai ona o Lona alofa faavavau mo oe ma au, o lea na Ia faatagaina ai Iesu ina ia faamaeaina Lana misiona na muai faauuina ai ina ia avea ma o tatou Togiola. . . .

“O Iesu Keriso, le Faaola ma le Togiola o tagata uma, e le o maliu. O loo soifua o Ia—le Alo toetu o le Atua o loo soifua—o la’u molimau lena, ma o loo Ia taitaia mataupu o Lana Ekalesia i le asō.”

Elder M. Russell Ballard o le Korama a Apostolo e Toasefululua, “O Le Togiola ma le Taua o le Agaga E Tasi, *Liahona*, Me 2004, 85, 86.



O Lo Tatou Faamoemoe, o lo Tatou Puluvgaga, o lo Tatou Togiola

“O lo tatou puipuiga e i [lo tatou Tama Faalelagi] ma Lona Alo Pele, o Iesu Keriso. Ou te iloa e alofa le Faaola ia te outou. O le a Ia faamaonia au taumafaiga e faamalosia lau molimau ia avea ma malosi sili mo le lelei i lou olaga, o se malosi e lagolagoina oe i taimi e manaomia ai ma e maua ai le filemu ma le mautinoa i nei taimi o le le mautonu.

“I le avea ai ma se tasi o Ana Apostolo ua faatagaina e fai ma molimau, ou te tautino atu ou te iloa o loo soifua le Faaola, ma o Ia o se tagata toetu, faamamaluina ma e atoatoa Lona alofa. O ia o lo tatou faamoemoe, o lo tatou Puluvgaga, lo tatou Togiola.”

Elder Richard G. Scott o le Korama a Apostolo e Toasefululua, “O Le Mana o se Molimau Malosi,” *Ensign*, Nov. 2001, 89; *Liahona*, Ian. 2002, 100.



Inuina o le Ipu Oona

“I le Faatoaga o Ketesemané, e lei taofia e lo tatou Faaola ma le Togiola le inuina o le ipu oona o le Togiola [tagai MF&F 19:16–19]. Ma i luga o le satauro sa Ia toe mafatia ai ina ia faia le finagalo o Lona Tama, ona Ia fetalai ane ai lea, “Ua taunu.” [Ioane 19:30]. Na ia onosaia e oo i le iuga. I le tali atu i le Faaola ma Lona usiusitai atoatoa, na fetalai mai ai lo tatou Tama Faalelagi, ‘Faauta i lou Atalii Pele, o le ua ou fiafia lava i ai, o le ua ou faamamaluina i ai lou igoa’ [3 Nephi 11:7].

“. . . Ia tatou faamamaluina le suafa o le Atua e ala i le tutu malolosi ma lo tatou Faaola, o Iesu Keriso. Ou te tuuina atu la’u molimau faapitoa o loo soifua o Ia.”

Elder Robert D. Hales o le Korama a Apostolo e Toasefululua, “Tutu Malolosi i Nofoaga Paia,” *Liahona*, Me 2013, 51.



O Le Alo Atoatoa e Toatasī o le Atua

“Ua ou iloa o le Atua i taimi uma ma i itu uma ma i tulaga uma o lo tatou Tama i le Lagi e alofa ma lotofaamagalo. Ua ou iloa o Iesu o Lona alo atoatoa e toatasī, o lē sa ofoina mai ma le alofa Lona soifua e ala i le finagalo o le Tama ma le Alo mo le togolina o i tatou uma, o ē le atoatoa. Ua ou iloa na toetu o Ia mai lena maliu ia toe soifua ai, ma e talu ai ua Ia toetu, o lea o le a toetutu ai foi i tatou.”

Elder Jeffrey R. Holland o le Korama a Apostolo e Toasefululua, “Le Alii e, Ua Ou Faatuatua,” *Liahona*, Me 2013, 95.



Ou Te Iloa o Loo Soifua le Faaola

“E tautino atu la’u molimau e uiga, ma le talisapaia o le taulaga e le iu ma le faavavau a le Alii o Iesu Keriso. Ua ou iloa o loo soifua le Faaola. Ua ou tofo i Lona mana togiola ma Lona mana gafatia, ma ou te molimau atu o nei mana e moni ma o loo avanoa mo i tatou taitoatasi. E moni lava, “o le malosi o le Alii” e mafai ona tatou faia ma faatoilalo ai mea uma a o tatou fetaomi atu i luma i la tatou malaga i le olaga faitino.”

Elder David A. Bednar o le Korama a Aposetolo e Toasefululu, “O Le Togiola ma le Malaga i le Olaga Faitino,” *Ensign*, Ape. 2012, 47; *Liahona*, Ape. 2012, 19.




Na Faataunuina e Keriso Lana Misiona

“Sa tauaveina e [le Faaola] i Ona lava luga le ‘avega o agasala a tagata’ ma ‘mea mataga e mafai ona . . . faaoso e Satani’ [James E. Talmage, *Iesu le Keriso*, 613]. I lenei faagasologa na Ia onosaia ai faamasinoga o tuuaiga sese ma mea faigata ma le mataga na faapea ona oo atu ai i Lona Faasatauroga. Sa faiuinna lenei faagasologa i le Toetu manumalo o Keriso i le Aso Sa o le Eseta. Na faataunuina e Keriso Lana misiona paia o le Faaola ma le Togiola. O le a tatou toetutu mai le otu ma toe faatasia o tatou agaga ma o tatou tino. . . .

“Ou te tuuina atu la’u molimau faaapostolo o loo soifua Iesu Keriso ma o le Faaola ma le Togiola o le lalolagi. Ua Ia saunia le ala i le fiafia moni.”

Elder Quentin L. Cook o le Korama a Aposetolo e Toasefululu, “Tatou Te Mulimuli ia Iesu Keriso,” *Liahona*, Me 2010, 83–83, 86.



Na Togiolaina i Tatou e le Faaola

“O puapuaga o le Faaola i Ketesemane ma Ona tiga i le satauro ua togiola ai i tatou mai le agasala e ala i le faamalieina o manoga o le faamasinotonu i o tatou luga. Na te tuuina mai le alofa mutimutivale ma faamagaloina i latou o e salamo. Ua faamalieina foi e le Togiola le aitalafu o nofo-aitalafu ai le faamasinotonu ia i tatou e ala i le faamaloloina ma le tausia o i tatou mo soo se mafatiaga tatou te onosaia ma le taumamaina. ‘Aua faauta, e mafatia o ia i tiga o tagata uma, ioe, tiga o tagata ola uma, o tane, o fafine, ma tamaiti, o e ua i ai i le aiga o Atamu’ (2 Nifae 9:21; tagai foi i le Alema 7:11–12). . . .

“. . . O le togiola sili lava ua ia Iesu Keriso ma ua na o Ia lava e maua ai. Ou te faailoa atu ma le lotomaualalo ma le loto faafetai o Ia o le Togiola.”

Elder D. Todd Christofferson o le Korama a Aposetolo e Toasefululu, “O le Togiola,” *Liahona*, Me 2013, 110, 112.



Le Toetu ma le Ola

“O na mea uma, tatou te folafola atu lo tatou Faaola ma le Togiola, o Iesu Keriso. O mea uma ua tatou i ai—o mea uma o le a tatou oo i ai—tatou nofo aitalafu ai ia te Ia. . . .

“E lagona pea Ana afioga i auga seneturi:

“O a’u nei o le toetu ma le ola: o lē faatuatua mai ia te a’u, e ui lava ina otu, a e ola lava ia:

“O tagata ola uma o e faatuatua mai ia te au, e le otu lava ia.”

“Uso e ma tuafafine, o loo soifua o Ia. Ua toetu o Ia. O loo Ia taitaiina Lana galuega paia i luga o le fogaeleele.”

Elder Neil L. Andersen o le Korama a Aposetolo e Toasefululu, “O Mai ia te Ia,” *Liahona*, Me 2009, 78.



TALIINA O FESILI

E faapei foliga o se tagata toetu?

"Pe a tatou o ese atu mai lenei olaga, o le a tatou . . . mauaina ni tino faamamaluina, faasaolotoina mai ma'i ma faanoanoaga uma, ma faamamaina ia sili atu le matagofie. E leai se mea e sili atu ona matagofie e vaai i ai nai lo se alii po o se tamaitai toetu. E leai se mea maoae e mafai ona ou mafaufauina

e mafai ona maua e se alii [po o se tamaitai] nai lo o se tino toetu. E leai se Au Paia o Aso e Gata Ai . . . ae e mautinoa lava ua agavaa e tula'i mai i le taeao o le uluai toetu ua faamamaluina, e faaeaina i le afioaga o le Atua."

Peresitene Lorenzo Snow (1814–1901), i le Conference Report, Oke. 1900, 4.





Mulimuli I LE PEROFETA

Oni nai tausaga ua mavae, a o lei amataina le konafesi aoao, na aoao ai e Peresitene Thomas S. Monson se lesona matagofie. O le taimi lea sa faia i le faapotopotoga o le au Pulega Aoao o e sa malaga mai i le Aai o Sate Leki, Iuta, o le toatele e malaga mai nofoaga i le salafa o le lalolagi o loo latou auauna ai i au Peresitene o Eria. Na matou o mai faatasi ina ia aaooina e le Au Peresitene Sili ma Apostetolo e Toasefululua.

A o lalata mai le taimi mo le fonotaga, e foliga mai o tagata uma na auai sei vagana ai Peresitene Monson. O ni nai minute a o lei amataina le fonotaga, sa matou taofia le talatalanoa o le tasi ma le isi ma saofafai ma le migao ma faalogologo i le musika muai tataina, ma faamoemoe o le a taunuu mai le perofeta i se taimi.

Sa matou faatalitali ma le onosai ina ua ta le 9:00 i le taeao ma ua tea foi. Sa savali se tasi i fafo o le auala savali—e mautinoa lava e vaai pe o manaomia se fesoasoani. Ina ua toe foi mai, sa ia fai mai, “Ua toeitiiti lava faatasi mai Peresitene Monson.”

Pe tusa ma le 15 minute mulimuli ane, na ulu mai ai Peresitene Monson i le potu. O le faaaloalo, sa matou tutu i luga ina ua ia ulufale mai. Sa matou fiafia e vaai atu ia te ia ma fiafia foi sa foliga manuia o ia. Sa leai se mafuaaga manino e iloa ai pe aisea na tuai mai ai.

Sa alu sa'o lava Peresitene Monson i le pulelaa ma sauhoa mai, “Uso e, ou te faamalie atu i lou tuai, ae na manaomia au e lo'u toalua i lenei taeao.”

Sa matuai faagaetia lava au ma faalotomaualaloina, ma sa le mafai ona ou taofia le mafaufau e uiga i ana upu.

O se fonotaga e sili ona taua lenei fonotaga. Sa faapoto-poto uma le autaitai sinia o le Ekalesia, ae na faia e Peresitene Monson se faataitaiga mo i matou uma. Na manaomia

A o tatou mulimuli ia Peresitene Monson ma taumafai ia avea atili e faapei o ia, o le a faamanuiaina lava i tatou i le avea ai ma soo faamaoni sili atu o le Alii o Iesu Keriso.

e lona toalua o ia, ma sa ia faaluina le taimi e tatau ai e tausia ai o ia. O se lauga maoae. Ou te le manatua se isi lava mea na taua i lena aso, ae ou te manatua lena lauga: “Na manaomia au e lo'u toalua.”

Mulimuli i le Faataitaiga a le Perofeta

Ou te manao e fautuaina ni auala se lima e mafai ona tatou mulimuli ai i le faataitaiga a Peresitene Monson.

1. E mafai ona tatou mafaufau lelei, ma e mafai ona tatou fiafia.

I le Penina Tau Tele, na faamatalaina e le Perofeta o Iosefa Samita lona “uiga fiafia” (Iosefa Samita—Talafaasolopito 1:28). “Fiafia” e faamatalaina ai foi Peresitene Monson.

I se tasi taimi na saunoa mai Peresitene Monson: “Tatou . . . te mafai ona filifili ia i ai se uiga faaalia lelei. E le mafai ona tatou faatonuina le matagi, ae e mafai ona tatou fetuunaia la o le vaa. I se isi faaupuga, tatou te mafai ona filifili ina ia maua le fiafia ma le manatu lelei, e tusa lava po o le a se mea e oo mai lo tatou ala.”¹

I se tasi aso na ou faatalitali ai i fafo o le potu o le Au peresitene Sili. Sa valaaulia au e auai i se fonotaga e talanoaina ai ni mataupu taumalumaluu. Sa ou saofai filemu i fafo o le potu, na o au. Sa ou manatu ua uma ona fono le



I faapaiaga uma o malumalu, e taulai atu Peresitene Monson i le fanau. E fiafia o ia e faaaofia i latou i le sauniga o le maatulimanu.

Au Peresitene Sili, ma o le a valaaulia au e faatasi ma i latou i ni nai minute.

A o ou saofai ai iina, na mafai ona ou faalogoina se tasi o savali i lalo o le fale faafifia ma mapumapu. Sa ou mafau-fau ia te au lava, “O se tasi e le malamalama i uiga talafeagai. E le tatau ona savavali solo ma mapumapu i fafo o le ofisa o le Peresitene o le Eklesia.”

I nai minute mulimuli ane na savali ane le tagata mapumapu i le tulimau—o Peresitene Monson. Sa fiafia o ia, ma sa manatu i le lelei. Sa faafeiloai mai ia te au ma le alofa ma fai mai, “Ou te matea o le a tatou amataina le fonotaga i ni nai minute.”

E ui lava o loo i ai le mamafa o le Eklesia atoa i luga o ona tauau, o ia o se faataitaiga o le fiafia ma e ia te ia lava i taimi uma se uiga faaalia lelei. E tatau ona tatou faapena.

2. E mafai ona tatou agalelei ma agaalofo i tamaiti.

Na fetalai soo Iesu i fanau. O Lana perofeta, o Peresitene Monson, e talanoa soo foi e uiga i fanau. Ua ou vaai, ae maise lava i faapaiaga o malumalu, o lona alofa tele i fanau ma, e ala i ana faataitaiga, ua aoaoina i tatou i le auala e taulimaina ai i latou. I faapaiaga o malumalu uma lava sa ia taulai atu i fanau. E fiafia o ia e faaaofia i latou i le sauniga o le maatulimanu ma e valaaulia i taimi uma nisi o i latou ai e tuu sina sima i le maatulimanu e auai i le faamaeaina faafaatusa o le malumalu. Na te faia ia avea o se mea malie mo i latou. Na te faia ia manatua pea e i latou. Na te faaalia

lava i taimi uma se mata ataata lapoa lava mo i latou. Na te uunaia ma faaviivii ia i latou. O se mea matagofie e vaaia.

O ana faafeiloaiga mafanafana e i ai taimi e aofia ai le pati maualuga o lima, faaminoinoi ona taliga, ma le faamlosiauga e auauna atu i misiona ma faaipoipo i le malumalu.

I ni nai tausaga ua mavae, sa faatulagaina ai Peresitene Monson e faapaia le Malumalu o Oquirrh Mountain Iuta i lona aso fanau. A o ia taunuu atu i le malumalu ma agai atu i le faitotoa i luma o le malumalu, ua faapotopoto se vaega o tagata talavou. Na mautinoa lava lo latou iloa o le aso fanau lea o Peresitene Monson ona sa amata ona latou usuina le pese “Manuia lou aso Fanau” ia te ia. Sa ia taofi ma faasaga atu ia i latou ma se ataata lapoa i ona foliga. Na amata foi ona talotalo ona lima e pei o loo ia taitaia i latou i le pese. I le faaiuga na latou faaopoopoina se fuaiupu “Ma ia tele nisi.” Sa ia fai mai ia te au, “O la’u vaega lena e fiafia i ai.”

E alolofa le fanau ma le autalavou a le Eklesia ia te ia, ma e leai so latou masalosalo e alofa foi o ia ia i latou!

3. E mafai ona tatou mulimuli i uunaiga a le Agaga.

Na matagofie le faamatalaina e Peresitene Monson o lona tuuto atu i le Alii ma lana tautinoga e mulimuli i uunaiga a le Agaga i upu nei: “O le aafiaga aupito matagofie na ou iloa i le olaga o le lagonaina lea o se uunaiga ma faatinoina ma iloa mulimuli ane o le faataunuina o le tatalo a se tasi po o le manaoga o se tasi. Ma ou te manao lava i taimi uma i le Alii ina ia Ia silafia, afai Na Te manaomia se feau e tatau ona fai, o le a tamoe Tom Monson e fai lena feau mo Ia.”²

O le mamanu lena e tatau ona tatou mananao uma e mulimuli ai.

4. E mafai ona tatou fiafia i le malumalu.

O le a tusia Peresitene Monson i le talafaasolopito o se tasi o tufuga maoae fau malumalu i le talafaasolopito o le Eklesia. Talu ona avea ma Peresitene o le Eklesia ia Fepuari 2008, o loo ia faaauau pea le galuega tele o le fausiaina o malumalu. I le ono tausaga na avea ai o ia ma perofeta, ua fofogaina mai e Peresitene Monson fuafuaga mo le fausiaina o malumalu fou e 33.

Ua saunaia mai peresitene Monson, “Ia taitasi i tatou ma ola i ni olaga agavaa, ma lima mama ma loto mama, ina ia mafai ona pa’i mai le malumalu i o tatou olaga ma o tatou aiga.”³

Ua ia tuuina mai foi lenei folafolaga ofoofogia: “A o tatou pai atu ma fiafia i le malumalu, ma auai i le malumalu, o le a atagia mai i o tatou olaga lo tatou faatuatua. A o tatou o atu i nei maota paia o le Atua, a o tatou manatuaina

feagaiga ua tatou osia i totonu, *o le a mafai ona tatou ono-saia tofotofoga uma ma faatoilaloina faaososoga taitasi.*⁴

Ia tatou mulimuli i le mamanu ua faatulagaina e le perofeta mo i tatou i le fiafia i le malumalu.

5. E mafai ona tatou agalelei, mafaufau alofa, ma agaalofa.

O Peresitene Monson o se faataitaiga matagofie o le agalelei atu i isi. O lana galuega auauna atoa lava ua faatumuina i le faia o asiasiga i aiga; tuuina o ona lima i luga o ulu ma tuuina atu o faamanuiaga; faia o valaauga faafuasei i le telefoni e faamafanafana ma faamalosiau; auina atu o tusi o le faamalosiauga, viia, ma le talisapaia; asiasi i falemai ma nofoaga autu e tausi ai tagata matutua; ma le mauaina o le taimi e alu ai i falelauasiga ma maimoaina o le maliu e ui lava i se faasologa pisi tele.

E pei lava ona o le a faia e le Faaola, ua femaliuai Thomas Monson i le faia o mea lelei (tagai i le Galuega 10:38) ma faamanuiaina ma agalelei i isi; o lenei mea ua avea ma se uunaiga malosi i lona olaga.

O se faataitaiga maoae o le agalelei o Peresitene Monson na tupu i le 2012. A o faagaso ina maea le Malumalu matagofie o Brigham City Iuta, sa matou feiloai ma le Au peresitene Sili e talanoaina fuafuaga mo lona faapaiaga. Ona o Brigham City e na o le tasi le itula i matu o le Aai o Sate Leki, semanu e matua faigofie lava mo Peresitene Monson ona malaga i ai mo le faapaiaga.

Nai lo lena, na saunoa mai Peresitene Monson, "O Brigham City o le nuu o Peresitene Boyd K. Packer, o lenei Apostolo maoae na saofai i ou talaane mo le tele o tausaga i le Korama a le Toasefululu. Ou te manao ia te ia ina ia maua le mamalu ma le faamanuiaga o le faapaiaga o le malumalu i lona nuu. O le a ou nofo i le fale, ma o le a ou tofia Peresitene Packer e faapaia le Malumalu o Brigham City. Ou te manao ina ia avea ma ona aso faapitoa."

O se aso matagofie mo Peresitene Packer ma Sister Packer, o le na soifua ae foi i Brigham City. Sa matua ootia lo'u loto i le agalelei ma uiga alofa o Peresitene Monson mo lona uso a Apostolo. E mafai uma lava ona tatou faapena. E mafai ona tatou faasoatua ma ia agalelei ma ia sili atu le manatu mo i latou o siomia i tatou.

O Le Mamanu a se Perofeta

Na aoao mai e Peresitene Monson ia i tatou le ala e ola ai i o tatou olaga i ana savali matagofie ma musuia



E pei lava ona tatau ona faia e le Faaola, ua femaliuai Peresitene Monson i le faia o mea lelei ma faamanuiaina ma agalelei atu i isi; o le uunaiga malosi lenei o lona olaga.

i konafesi aoao. Ua ia aoaoina i tatou i le ala e avea ai ma soo o Iesu Keriso e ala i lana faataitaiga ofoofogia ma le matagofie faaletagata lava ia. E moni lava ua tuuina mai ia i tatou e le Alii se mamanu i mea uma, ma o se tasi o mamanu e tatau ona tatou saili e mulimuli i ai o le mamanu lea a lo tatou perofeta pele.

Ou te molimau atu o loo i ai se Atua i le lagi e silafia i tatou ma alofa ia i tatou. Ua Ia tuuina mai ia i tatou se perofeta—e taiialaina i tatou, e aoaoina i tatou, ma taitai i tatou i nei aso e gata ai. Ou te talitonu ua faamoemoe mai le Alii ia i tatou e alolofa i le perofeta, e lagolagoina o ia, ma mulimuli i lana faataitaiga.

Ou te mafaufau o se faamanuiaga sili e ola ai i le aso ua avea ai Thomas S. Monson ma perofeta a le Alii. A o tatou mulimuli ia te ia ma taumafai ia avea atili e faapei o ia, e mautinoa lava o le a faamanuiaina i tatou i le avea ai ma soo faamaoni sili atu o le Alii o Iesu Keriso. ■

Mai se faigalotu a le Ofisa o Aoga a le Ekalesia i le Iunivesite o Polika Iaga-Idaho i le aso 5 o Me, 2013. Mo le saunoaga atoa i le gagana Peretania, asiasi i le lds.org/broadcasts.

FAAMATALAGA

1. "Messages of Inspiration from President Monson," *Church News*, 2 Set., 2012, 2.
2. *On the Lord's Errand* (DVD, 2008).
3. Thomas S. Monson, "O Faamanuiaga o le Malumalu," *Liahona*, Oke. 2010, 19.
4. Thomas S. Monson, *Be Your Best Self* (1979), 56; faoopoopo le faamamafa.



O Le Atu Filipaina:

MALOSI
FAALEAGAGA
I LUGA O
MOTU O
LE SAMI

*I nai tausaga pu'uu
e 53, ua vaaia e le
Ekalesia le malosi ma
le tuputupu ae maoae i
le atu Filipaina, ua ta'ua
o le "Penina o Asia."*

Ta Augusto A. Lim, o le savali na tuuina atu e faifeautalai talavou e toalua mai le Iunaite Setete sa foliga mai e faamautu ai le mataupu faavae ua uma ona ia iloaina e moni. O se loia talavou ma o se Kerisiano, na matauina e Augusto o aoaoga faavae e pei o faaliga faifaipea o "mea ia na ou talitonu i ai e ui lava sa ou i ai i le aoga maualuga ma le kolisi."¹

Ina ua mavae ni nai masina, sa malie Augusto e auai i sauniga o le Aso Sa ma talia le lu'i e fatau ma tatalo e uiga i le Tusi a Mamona. "Sa amata ona ou fatauina le Tusi a Mamona ma le totoa i le agaga lava lea e tasi na fautuina i tatou e Moronae [ia i ai]. Ina ua ou faia lena mea ma le naunautai ia iloa pe moni—ina ua uma ni nai laina—sa mauaina se molimau," na ia manatuaina.²

Ia Oketopa o le 1964, na papatiso ai Augusto Lim ma na avea ma se paonia o Le Ekalesia a Iesu Keriso o le au Paia o Aso e Gata ai i le atu Filipaina, ma o lona faletua ma le aiga na vave auai mulimuli ane. I le taimi nei, ina ua mavae le tele o tausaga o auaunaga faamaoni i le Ekalesia—lea na aofia ai se valaauga i le 1992 e avea ma se Pulega Aoao, o le Filipino muamua e auauna atu i lena tofiga—e atagia mai ia Uso Lim le faatuatua ma le pulunaunau o le fatau selau o afe o le Au Paia o Aso e Gata Ai i le "Penina o Asia."

O Se Laueelele Lafulemu

E tusa ma le 550 tausaga a o lei soifua mai Iesu Keriso, na folafola mai e le Alii i le perofeta o Nifae i le Tusi a Mamona: "Ou te manatua i latou o e o i motu o le sami,

ma "aumaia la'u upu i le fanauga a tagata, ioe, e oo lava i luga o atunuuma o le lalolagi" (2 Nifae 29:7). I le toatele o e fatauina nei upu filifilia, o se tasi vaega o "motu i le sami" e oo mai i le mafaufau: le atu Filipaina.

Faatasi ai ma se fatau aofai ua latalata i le 100 miliona, o le Malo o le atu Filipaina o se faasologa tele o motu e tusa ma le 7,100 motu i le talafatai i sautesasae o Asia. O se atunuua matagofie vevela o loo nonofo ai ni tagata faauo, galulue, ma lotomaualalo. Ae o le atunuua e aafia i mafuie, afa, mauga mu, galulolo, ma isi faalavelave faalenatura ma e mafatia i le tele o faafitauli tautupe a le atunuua. O le mativa i le atulaulau o se luitau faifai pea, ma ua onosaia e tagata Filipino le tele o taimi o le le mautu o faigamalo ma faafitauli tau le tamaoaiga.

Ae o i latou o e ua masani i ala o le Alii, o le atu Filipaina o se eleelele lafulemu mo le totoina o fatu o le talalelei. Faatasi ai ma le Takaloka ma isi gagana masani, o le tele o tagata Filipino e tautatala faa-Peretania, lea foi e avea o se gagana a le atunuua. Ona o se vaitaimi umi o le taitaiga Faasipaniolo, e sili atu ma le 90 pasene o le fatau aofai oni Kerisiano; o se vaega tele o le vaega e le Kerisiano o tagata Musalimi.

O le taumafaiga muamua e faailoa atu le Ekalesia i le atu Filipaina na faia i le 1898 i le taimi o le Taua a Amerika ma Sepania e Willard Call ma George Seaman, o fitafita o le Au Paia mai Iuta o e na vaetofia e avea ma faifeautalai ae lei malaga ese. A tulai mai ni avanoa, la te talai atu le talalelei, ae sa leai ni papatisoga na faia.



Ina ia atiae i luga o mataupu faavae o le talalelei, ua faamanuaaina le autalavou matutua i le atu Filipaina ma avea ma taitai malolosi i le Ekalesia a le Alii.

I le taimi o le Taua lona II a le Lalolagi, na siitia atu ai nisi o le Au Paia o aso e Gata Ai i motu eseese faatasi ma autau Tuufaatasti. I le 1944 ma le 1945, na faia e ni vaega o le militeli ni sauniga o le Ekalesia i le tele o nofoaga, ma o le toatele o fitafita AAG ma tagata o le malo na i ai pea i le atu Filipaina ina ua uma le taua. O nisi o i latou o Maxine Tate ma se tagata faatoa liliu mai o Jerome Horowitz. Sa la fesoasoani uma e faailoa atu le talalelei i a Aniceta Fajardo. A o fesoasoani e toe fausia le fale o Aniceta i se eria na faaleagaina eni pomu i Manila, sa faasoa atu e Uso Horowitz lona talitonuga fou i a Aniceta ma lana tama teine, o Ruta.

Na maua e Aniceta se molimau ma manao e papatiso, ae e lei faatagaina e le Ekalesia ni papatisoga mo tagata Filipino i lena taimi ona sa leai ni iunite tumau o le Ekalesia i atumotu. Na silafia e Elder Harold B. Lee (1899–1973) o le Korama a Apostolo e Toasefululua, manaoga o Aniceta ma i lana matafaioi o le taitafono o le komiti a Fitafita Aoao, na faamaonia ai e Elder Lee le papatisoga o Aniceta. I le taeao o le Eseta i le 1946, na papatisoina ai o ia e fitafita Loren Ferre Aniceta Fajardo ma o lenei ua faailoa ai o le Filipino muamua ua avea ma se tagata o le Ekalesia a Iesu Keriso o le Au Paia o Aso e Gata Ai.

O Le Amataga o le Galuega Faafaifeatalai

Ina ua uma le taua, na faatulagaina ni vaega o le Ekalesia i ni nofoaga autu se lua o le militeli

Amerika—Clark Air Base ma le Subic Bay Naval Base—a o tulimatai atu e tagata o le Au Paia o Aso e Gata Ai le faatuina o se nofoaga e sili atu ona aloaia o le Ekalesia i le atu Filipaina. I le aso 21 o Aokuso, 1955, sa faapaiaina ai e Peresitene Iosefa Filitia Samita (1876–1972) le atu Filipaina mo le talaiga o le talalelei. O taofiga faaletulafono, e ui i lea, na tuai ai le taunu mai o faifeatalai seia oo i le 1961.

I le 1960, o Elder Gordon B. Hinckley (1910–2008), a o avea ma Fesoasoani i le Korama a Apostolo e Toasefululua, na asiati atu i le atu Filipaina mo ni nai aso: “Sa ou faailoa atu le manatu faapea o le galuega faafafeatalai o le a . . . fua tele e pei o isi nofoaga e tele i le lalolagi.”³ O le tausaga na sosoo ai, ina ua mavae le tele o sauniuniga ma galuega taupepa na faia e tagatalotu e pei o Maxine Tate Grimm ma Robert S. Taylor o le Misiona a Saute Sasae Mamao, faapea foi ma ni uo i fafo atu o le Ekalesia, na toe foi atu Elder Hinckley i atumotu e toe faapaiaina le atu Filipaina mo le amataga o le galuega faafaifeatalai.

I le aso 28 o Aperila, 1961, i tua atu o Manila, na feiloai ai Elder Hinckley ma se vaega toaititi o tagata o le malo, o tagatanuu o Amerika ma se tasi Filipino e lotu—David Lagman—ma ofoina atu se tatalo faapitoa “o le a i ai le tele o afe o e o le a maua lenei savali ma faamanuaaina ai.”⁴ O na upu, sa fofogaina mai e se auauna moni a le Alii, e lei umi ae avea o se valoaga.

O faifeatalai muamua e fa—Raymond L. Goodson, Harry J. Murray, Kent C. Lowe ma Nester O. Ledesma—na taunu i Manila i ni nai vaiaso mulimuli ane. “Na vave lava ona taliaina e Filipino le talalelei,” na tusia e Elder Lowe. “Ina ua filifili le ulu o le aiga e auai i le Ekalesia, i le tele o tulaga, o le aiga atoa o le a auai i le Ekalesia.”⁵

Ua Alualu i Luma le Ekalesia

Na alualu i luma le galuega i le tulaga lea sa faatulagaina ai loa le Misiona a le atu Filipaina i le 1967. I le faaiuga o lena tausaga, sa 3,193 tagata o le ekalesia i le misiona, o le 631 na liliu mai i le tausaga lava lena. E oo atu i le 1973 ua faateleina le Ekalesia i le atu Filipaina e toetoe lava a 13,000 tagata o le ekalesia. I le aso 20 o Me, 1973, na faatu ai le Siteki o Manila Filipaina, ma o Augusto A. Lim o le peresitene. I le 1974 na vaeluaina ai le misiona, ma fatuina ai Misiona a Filipaina Manila ma le Misiona a Filipaina Cebu City.

I a Aokuso o le 1975, na malaga mai ai Peresitene Spencer W. Kimball (1895–1985) i Manila e pulefaamalu-malu i le uluai konafesi a le eria i atu Filipaina. O Aokuso o se masina sa matagia, ma na faafaigata ai femalagaaiiga mo i latou e o mai mai i fafo atu o Manila. O se pasi na faatumuina i le Au Paia mai le Aai o Laoag toetoe lava a le oo mai, ae na tuleieseina e le Au Paia la latou taavale mai se lua o palapala ma tauanauna le avetaavale ina ia aua le toe foi i tua. O se tasi vaega o le Au Paia na lototetele i le sami sauva mo aso faigata e tolu ona pau lava le mea na sili ona taua, e pei ona fai mai ai se tasi o tuafafine, o le vaai ma faalogo i se perofeta soifua a le Atua.

Na toe asiiasi atu Peresitene Kimball i le atu Filipaina i le

1898: Na talai e ni uso se toalua o le AAG o loo i le malo le talalelei i le atu Filipaina i le taimi o le Taua a Sepania-Amerika



1944–45: Na talai e nisi AAG o loo auaua i le malo le talalelei i le taimi o le Taua lona II a le Lalolagi



1980 e pulefaamalu-malu i se isi konafesi a le eria, ma sa ia feiloai foi mo sina taimi ma le peresitene o le atu Filipaina o Ferdinand Marcos. O lenei fonotaga na asaina ai le ala mo le Ekalesia na iu lava ina tatala ai se nofoaga autu e aoao ai faifeautalai i le atu Filipaina i le 1983 ma faapaia ai le Malumalu o Manila Filipaina i le tausaga na sosoo ai. I le 1987 o le Eria a Filipaina/Maikolenisia na faavaeina ma lona laumua i Manila.

O ni vaega filifilia mai le Tusi a Mamona sa faaliliuina i le Takaloka i le 1987. O faaliliuga o le Tusi a Mamona ua maua nei i nisi o gagana o le atu Filipaina, e aofia ai le gagana Sepuano.

O Faamanuiaga o le Malumalu

Ia Tesema o le 1980, na auina atu ai e Peresitene Spencer W. Kimball le faatonu o matagaluega o fanua a le Ekalesia i Manila e saili se nofoaga talafeagai mo se malumalu. Ina ua uma ona mafaufauina ni nofoaga eseese, na auina atu loa e le faatonu se talosaga e faatau le 3.5 eka (1.4 ha) i le Aai o Quezon. O le nofoaga e iloa atu ai le

Vanu o Marikina, ma o lona tulaga e talafeagai le faigofie ona maua e le toatele o tagata o le Ekalesia. Na faamaonia le talosaga, ma sa faatauina le fanua i a Ianuari o le 1981. Na suia le igoa o le auala i le Temple Drive i le talosaga a le Ekalesia.

Mo le sauniga o le suataina o le eleele i le aso 25 o Aokuso, 1982, e ui lava i le taufaamatau mai o se afa, e tusa ma le 2,000 tagata o le Ekalesia na faapotopoto mai itu uma o motu e ala i vaa, nofoaafi, ma pasi. E lei umi ae amata le fausiaina o le malumalu, ma sa saunia e faapaiaina ia Aokuso i le 1984.

Toeitiiti atoa le 27,000 tagata o le ekalesia ma e le lolotu na maimoaina le malumalu a o lei faapaiaina. Na o mai e

1946: Ua avea Aniceta Fajardo ma le Filipino muamua e papatisoina ma faamauina o se tagata o le Ekalesia



1955: Ua faapaiaina e Peresitene Josefa Filitia Samita le atu Filipaina mo le talaiaga o le talalelei

ui lava ini afa se lua—e na o le 48 itula na va ai—na talepeina atoa le atu Filipaina i ni nai aso talu ai. Na taunu mai le Au Paia mai itumalo mamao ua vaivai ae sa fiafia. I le tele o tulaga sa faamalosia i latou e ui i nisi auala faataamilo e agai mai i Manila aua sa lolovaia auala ma na faaleagaina alalaupapa ona o le tatafe o vaitafe.

Na faagaeetia tagata asiiasi i le matagofie o le malumalu, e aofia ai le toatele o Filipino lauiloa. Na saunoa le Tusitala o Celso Carunungan e uiga i “se lagona o le paia, faapea pe a e oo i totonu o le a e fetaiai ai ma lou Foafoa.” Na fai mai Colonel Bienvenido Castillo, o le minisita o Leoleo o Filipino, o le malumalu o “se nofoaga e mafai ona e mafaufau ai i mea faalelagi ona ua e i ai i se siosiomaga faapena.” E lua ni taupousa na lagonaina faapea o le malumalu “e moni lava o se fale o le Alii.” O Eva Estrada-Kalaw, o se tasi o le palemene a le atu Filipaina, na ia tau atu i le au taiala, “Ou te momoo o le a outou fausia nisi malumalu iinei.”⁶

O Peresitene Hinckley, Fesoasoani Lua i le Au Peresitene Sili i le taimi lea, na taitaia sauniga e faataatia ai le



*1961: Ua tatala aloiai
Filipaina mo le galuega
faafafeautalai; taunu
mai faifeautalai mua-
mua e toafa*

maatulimanu i le Aso Lua, 25 o Setema, 1984. Na mulimuli ai sauniga o le faapaiaga e iva, na faia i le potu selesitila. O nisi e 6,500 o le Au Paia mai le 16 siteki ma itu e 22 i le Eria o le Pasefika na auai i sauniga eseese.

O le taimi lava na maea ai le sauniga mulimuli o le faapaiaga, o Paulo V. Malit Jr. ma Edna A. Yasona na avea ma le ulugalii muamua e faaipoipo i le Malumalu o Manila Filipaina, i le aso 27 o Setema, 1984. O le peresitene muamua o lena malumalu, W. Garth Andrus, na faataunuina le sauniga o le faaipoipoga.



*1973: Faatulagaina le Siteki
a Manila Filipaina*



E tai fia taseni o tagata o le Ekalesia na tutu i laina e faatalitali le mauaina o o latou faaeeega paia, e amata i tagata faigaluega i sauniga. Na faaauau pea galuega o le Malumalu i le po atoa seja oo i le aso na sosoo ai.

Na lagona e tagata se manao faateleina e ulu atu i le malumalu. O e na nonofo mamao ese mai Manila na manaomia le ositaulaga o mea e tele e malaga ai i le mamao i vaa po o pasi. Ae na latou o mai pea ma aumai ma i latou tala o le faatuatua ma le naunautai.

Mo Bernardo ma Leonides Obedoza o General Santos, o le alu i le malumalu mamao lava o Manila na foliga mai e le mafai. Ae e pei o le tagata faatauoa na alu ma faatau atu i tagata mea uma na ia te ia e faatau ai le penina tau tele e tasi (tagai i le Mataio 13:45–46), o lenei ulugalii na filifili



e faatau atu lo latou fale e totogi ai le malaga ina ia mafai ona faamauina i laua ma le la fanau o se aiga e faavavau. Ina ua uma ona latou faatauina atu lo latou fale ma le tele o a latou meatotino, na mafai ona latou faa-putuputu faatasi le aofaiga tonu e totogi ai le pasese i le vaa i Manila mo lo latou aiga e toaiva. Sa popole Leonides ona o le a leai se fale e toe foi atu i ai. Ae na faamautinoa atu ia te ia e Bernardo o le a saunia lava e le Alii. Sa faamauina i latou o se aiga mo le olaga nei ma le faavavau atoa i le malumalu i le 1985. Sa matuai aoga lava taulaga uma sa latou faia,

*1974: Vavaeina le
Misiona a Filipina,
ma fatuina
Misiona o Filipina
Manila ma
Filipaina Cebu City*

*1975: Uluai
konafesi
faale-eria, na
faia i Manila*

*1983:
Tatala le
nofoaga
autu o
aoaoga mo
faifeautalai
i Manila*




*Ua maua mai se fonotaga a le Aualofa i sauniuniga
mo faalavelave faafusei ni faamatatalaga taua
mo tamaitai o e o loo alala i se atunu u e lamatia
i faalavelave faalenatura.*



ona sa latou maua le olioli e le mafaatusalia i totonu o le malumalu—le latou penina tautele. Ma le faamaoni i le upu a Bernardo, na saunia e le Alii. I lo latou toe foi mai Manila, na tuuina atu ai e ni tagata masani agalelei ia te i latou ni nofoaga e nonofo ai. Na faaumaina e le la fanau a latou a'oga, ma na iu lava ina maua e le aiga so latou lava fale i se nofoaga fou.

I le aso 18 o Aperila, 2006, na fofogaina mai ai e le Au Peresitene Sili le fausiaina o le Malumalu o Cebu City Filipaina. I le faalogoina o le tala fou, e toatele tagata o le Eklesia na maligi loimata o le fiafia. “Ua faamnuiaina i tatou ona ua filifilia e le Alii le Aai o Cebu ina ia avea ma nofoaga o le isi malumalu,” o le tala lea a

TUPUTUPU AE O TAGATA AUAI O LE EKALESIA I LE ATU FILIPAINA




* Mai ia Setema 2013

1984: Faapaiaina le Malumalu o Manila Filipaina



1987: Faatuina le Eria o Filipaina/ Maikolenisia, ma le laumua i Manila



1987:
Faaliliuina ni vaega o le Tusi a Mamona i le Takaloka



2010: Faapaiaina le Malumalu o Cebu City Filipaina

Cesar Perez Jr., le faatonu o Inisitituti o Aoaoga Faalelotu o le Aai o Cebu.

I ni nai masina ina ua mae'a le faapaiaga o le Malumalu o Cebu City Filipaina, na i ai se mafuaaga na toe olioli ai Filipino o le Au Paia o Aso e Gata ai. I le aso 2 o Oketopa, 2010, i le taimi amata o lana saunoaga i le konafesi aoao, na fofogaina mai ai e Peresitene Thomas S. Monson le fausiaina o le Malumalu o Urdaneta Filipaina i Pangasinan.

O Le a Oo Mai le Mea Sili

O loo talavou lava le Eklesia a Iesu Keriso o Au paia i le atu Filipaina pe a faatususa i lona tulaga i isi atunu, ae o lona taunuuga i le malo o motu e mamalu. Sa ofoo fogia le tuputupu ae o le Eklesia, ma le mea sili o le a oo mai. O Elder Michael John U. Teh o le Fitugafulu, o le Filipino lona lua ua valaauna e avea ma se Pulega Aoao, na faapea mai, “O i matou [Filipino o le Au Paia o Aso e Gata ai] e manaomia le saunia o i matou lava faaleagaga e sili atu nai lo se isi lava taimi muamua ona o le galuega o le a agai i luma pe i ai pe leai sa tatou fesoasoani.”⁷

E moni lava, a o faagaso i luma le senituri lona luatefulutasi, o le Eklesia toefuataiina o le a faaauau pea ona tuputupu ae i le aofai ma le aafiaga a o faateleina pea Filipino o loo taliaina lana savali ma avea o se faamanuiaiga i nei tagata filifilia i luga o motu o le sami. Mo Elder Teh ma le Au Paia Filipino, ua “tetele . . . folafolaga a le Alii ia te i latou o e o i luga o motu o le sami (2 Nifae 10:21) ua faataunuuina nei. ■

FAAMATALAGA

1. Augusto Lim A., i R. Lanier Britsch, ‘Faatuatua, Lelei, Amio Lelei, Faamaoni’: Paonia i le Atu Filipaina,” *Ensign*, Aok. 1997, 60; *Liahona*, Feb. 1998, 40.
2. Augusto Lim, i Gelene Tobias, “Augusto Lim: The Man of Many Firsts,” countrywebsites.lds.org/ph/index.php/datedline-philippines/jubilee-2011.
3. Tagai ia Sheri L. Dew, *Go Forward with Faith: The Biography of Gordon B. Hinckley* (1996), 213–15.
4. Gordon B. Hinckley, “Commencement of Missionary Work in the Philippines,” *Tambuli*, Ape. 1991, 18.
5. Faatalanoaga o Kent Clyde Lowe e James Neil Clark, 3 Set. 2007.
6. Francis M. Orquiola, “Temple Dedication Rewards Faith of Filipino Saints,” *Ensign*, Nov. 1984, 107.
7. Michael John U. Teh, “Scriptures and Spiritual Preparation” [Savali a le Au Peresitene Sili, Me 2011]; lds.org.ph/index.php/literature.



O Le Faaaogaina o le ATA O LE FAAOLATAGA e Tali ai Fesili

Saunia e LaRene Porter Gaunt

Mekasini a le Ekalesia

Ua tatou ola i se taimi fafia. Ua oo mai le talalelei toefuataina a Iesu Keriso i “fafo mai le le mailoa” (MF&F 1:30). O se taunuuga, ua faalogo le tele o fanau a le Tama Faalelagi e le auai i lo tatou faatuatuaga e uiga i “Mamona.” Ua faalogo nisi i mea e uiga ese ma le le mautonu. O nisi ua faalogo i mea e masani ai ma le mafanafana. O tagata mai na vaega e mafai ona o mai ia i tatou e sailia ni tali i a latou fesili. E tele tali o loo maua i le ata o le faaolataga, lea e iloa foi o le “fuafuaga tele o le fafia” (Alema 42:8).

O fesili e sili atu ona fesiligia soo o “O Fea na ou sau ai?” “Aisea ua ou i ai iinei?” ma “O Fea ou te alu i ai pe a mavae lenei olaga?” O nei fesili uma e mafai ona taliina uma e ala i upumoni o loo maua i le ata o le faaolataga. Ua faasoa mai e lenei tusiga nisi o tali ua tuuina mai e tusitusiga paia ma lo tatou perofeta, o Peresitene Thomas S. Monson, e faatatau i nei fesili.

*Faatuatua
ia Iesu Keriso
Salamo*

OLAGA FAALETINO

O fea na ou sau ai?

O tatou o ni tagata e faavavau. Sa tatou ola faatasi ma le Atua a o lei oo mai i lenei olaga o Ana fanau agaga. "Sa [aoao] e le Aposetolo o Paulo faapea 'o fanau a le Atua i tatou' [Galuega 17:29]," na saunoa ai Peresitene Monson. "talu ai ua tatou iloa o o tatou tino faaletino o ni fanau ia a o tatou matua faaletino, e tatau la ona tatou sailia le uiga o le tala a Paulo. Ua tautino mai e le Alii e faapea 'o le agaga ma le tino o le tagata lea' [MF&F 88]. O le mea lea o le agaga o le atalii o le Atua. Sa faasino ia te Ia e le tusitala o le Eperu o 'le Tama o agaga' [Eperu 12:9]."¹

Aisea ua ou i ai iinei?

E uiga i lo tatou olaga i le lalolagi, na saunoa mai Peresitene Monson: "E tatau ona tatou maua le lotofaafetai ona ua foafoaina e le Mataisau poto se lalolagi ma tuu i ai i tatou iinei ma se ufimata o le lotogalo i lo tatou olaga sa i ai muamua, ina ia tatou oo i se taimi o tofotofoga, o se avanoa e faamaonia atu ai i tatou lava, ina ia mafai ona tatou agavaa mo mea uma ua saunia e le Atua mo i tatou ia maua.

Ua manino lava, o se tasi o faamoemoega autu o lo tatou i ai i le lalolagi o le mauaina lea o se tino o aano ma ivi. Ua uma foi ona tuuina mai ia i tatou le meaalofa o le faitalia. I le fiaafe o auala, ua faamanuiaina ai i tatou e filifili mo i tatou lava. O iinei tatou te aoao mai ai i aafiaga faigata tatou te oo i ai. Tatou te iloatino ai le lelei mai le leaga. Tatou te iloa ai le ese-esega o le oona ma le suamalie. Tatou te iloa ai e i ai taunuuga o a tatou faatinoga"²

O fea ou te alu i ai pe a mavae lenei olaga?

E oo mai le oti i tagata uma o le aiga o tagata. Ae "afai e oti le tagata, e toe ola mai ea o ia?" (Iopu 14:14). "Ua tatou iloa o le oti e le o le mutaaga lea," o le saunoaga lea a Peresitene Monson. "Sa aoao mai lenei upumoni e perofeta i augatupulaga uma. O loo maua foi i tusitusiga paia. I le Tusi a Mamona tatou te faitau ai i upu patino ma le faamafanafana:

Papatisoga

Meaalofa o le Agaga Paia

*Pe a i ai ni a
tatou fesili po o isi
foi e uiga i le tala-
lelei a Iesu Keriso,
pe o tatou iloa
po o fea e maua
ai tali?*

*Tumau
e oo i le
iuga*



O FEA E MAFAI ONA OU AOAO ATILI AI E UIGA I LE ATA O LE FAAOLATAGA?

1. E sili atu le manino o le aoaoina o le ata o le faaolataga i le Tusi a Mamona, le Mataupu Faavae ma Feagaiga, ma le Penina Tautele.
2. O upu a perofeta soifua o loo maua i conference.lds.org. E mafai ona e suesue mo faaupuga e pei o le ata o le faaolataga, o le ata o le fiafia, togiola, faaeaga, faamasinoga tonu ma le alofa mutimutivale, salamo, ma le toetu.
3. Tagai "Lesona 2: O Le Ata o le Faaolataga" i le mataupu e 3 o le *Talai La'u Talalelei: O Se Taiala mo le Galuega Faafaifeautalai.*

*Lalolagi o
Agaga*

'O lenei, e faatatau i le tulaga o le agaga i le va o le oti ma le toetutu mai—Faauta, ua faailoa mai ia te au e se agelu, e faapea o agaga o tagata uma, o le taimi lava latou te o ese atu ai mai lenei tino faaletino, ioe, agaga o tagata uma, pe sa latou lelei pe sa leaga, e ave atu i fanua i lena Atua o le na ia tuuina ia te i latou le ola.

'Ma ona oo lea, o agaga o i latou o e ua amiontonu e talia i se nofoaga o le fiafia, lea ua taua o le parataiso, o se nofoaga e malolo ai, o se nofoaga o le filemu o le a latou malolo ai mai i o latou faalavelave uma ma mai le popole uma, ma le faanoanoa' [Alema 40:11–12].³

A uma ona tatou toetutu, tatou te o i le malo selesitila i le mamalu e pei o le la, o le malo terasitila i le mamalu e pei o le masina, le malo teleseitila i le mamalu e pei o fetu, po o fafo i le pogisa (tagai i le MF&F 76).

Pe i ai moni ea se Atua? E moni ea Satani?

O le Tama faalelagi, Iesu Keriso, ma Satani o vaega uma o le Fono sili i le Lagi na faia ae tatou te le'i fananau mai. O se vaega o le ata o le faaolataga, na fesili atu le Tama Faalelagi mo se tasi e alu i le lalolagi ma togiola mo a tatou agasala. Sa ia fai mai: "O ai ou te auina atu? Ma sa tali mai se tasi [Iesu Keriso] e pei o le Atalii o le Tagata: O a'u lenei, auina atu a'u. Ma sa tali mai le isi [Satani] ma fai mai: O au lenei, auina atu au. Ma sa fetalai mai le Alii: o le a ou auina atu le muamua.

"Ma sa ita le lona lua [Satani], ma sa lē tausia lona esetete muamua; ma, i lena aso, e toatele na mulimuli atu ia te ia" (Aperaamo 3:27–28; tagai foi i le MF&F 29:36–37; Mose 4:1–4).

Pe ua tatou maua le mana e tetee ai faaososoga a Satani?

O le tasi vae tolu o agaga o e na filifili e mulimuli ia Satani ina ua uma le Fono i le Lagi ona sa tulieseaa faatasi ma ia. O i latou ma Satani e tumau pea o ni agaga e aunoa ma ni tino faaletino. Na aoao mai le Perofeta o Iosefa Samita: "O tagata uma e fai tino e i ai le mana ia i latou o e leai ni tino."⁴ O le mea lea, o Satani e mafai ona faaososoina i tatou, ae tatou te maua le mana e tetee atu ai.

MALIU

TOETU



SELESITILA



TERASITILA



TELESITILA



FAFO
I LE POGISA

Aisea e foliga mai ai i nisi taimi e pei e le tali mai le Tama Faalelagi i au tatalo?

“O le tatalo o le tagata lea e feutagai ai le finagalo o le Tama ma le manao o le tamaitiiti. O le faamoemoega o le tatalo e le o le suaia o le finagalo o le Atua” (Bible Dictionary, “Prayer”). O le tatalo o se meafaigaluega e fesoasoani ia i tatou e filifili pe o le a tatou faaaogaina lo tatou fitalia e faaogatasi o tatou loto i le Atua (tagai i le Aperaamo 3:25). E tali mai i taimi uma le Tama faalelagi i a tatou tatalo, ae o na tali e mafai ona oo mai i le ioe, leai, po o le le’i oo i le taimi. E taua le taimi.

Aisea e i ai ou luitau a o ou taumafai e ola i se olaga lelei?

O luitau o se vaega o le ata o le faaolataga. Latou te faamalolosia i tatou, faamamaina i tatou, ma faamamāina atoatoa i tatou a o tatou faalagolago ia Iesu Keriso ma Lana talalelei. E tausia i tatou e le Tama Faalelagi i le taimi o o tatou luitau. O a tatou tofotofoga o le a “[tatou] maua ai le poto masani, ma o le a avea ma o [tatou] lelei” (MF&F 122:7).

E faapefea ona ou iloa le mea sa’o ma le mea sese?

O fanau uma a le Atua e soifua mai ma le Malamalama o Keriso, lea e fesoasoani ia i tatou ia “iloa le lelei mai le leaga” (Moronae 7:16). E le gata i lea, o le Agaga Paia e mafai ona molimau mai ia i tatou i le upu moni i o tatou mafaufau ma loto i lagona o le filemu ma le mafanafana (tagai i le MF&F 8:2–3).

Pe mafai ona faamagaloina au e tusa lava pe na ou faia ni agasala matuia?

Na silafia e le Atua o i tatou uma lava o le a tatou agasala a o tatou aoao e filifili i le va o le sa’o ma le sese.⁵ Ae ui i lea, o agasala uma, e i ai le faasalaga ua noatia i ai. O le faamasinoga tonu e manaomia ai ona mafatia i le faasalaga. I Lona alofa mutimutivale, na faatagaina ai e le Tama Faalelagi Iesu Keriso e faia le Togiola ma faafetaiaia manaoga o le faamasinotonu mo i tatou uma (tagai i le Alema 42). I se isi faaupuga, o puapuaga o Keriso i Ketesemane ma le maliu i Kolokota na totogiina le tau mo a tatou agasala uma pe afai tatou te faaaogaina le Togiola a Keriso e ala i le salamo ma le mauaina o sauniga o le talalelei. O le a faamagaloina a tatou agasala (tagai i le MF&F 1:31–32). ■

FAAMATALAGA

1. Thomas S. Monson, “O Le Tausinioga o le Olaga,” *Liahona*, Me 2012, 91; tagai foi i le Aperaamo 3: 90–93.
2. Thomas S. Monson, “O Le Tausinioga o le Olaga,” 90–93; tagai foi i le Alema 34: 32–34.
3. Thomas S. Monson, “O Le Tausinioga o le Olaga,” 93; tagai foi i le matapu Faavae ma Feagaiga 76:59–111.
4. *Aoaoga a Peresitene o le Ekalesia: Iosefa Samita* (2007), 225.
5. E le mafai ona agasala fanau laiti “seia oo ina amata ona tali atu” (tagai i le MF&F 29:46–47).

NA FAAPEFEA ONA LATOU ILOA?

Na tuuina mai e Peresitene Dieter F. Uchtdorf, Fesoasoani Lua i le Au Peresitene Sili, se savali i tuafafine o le Aualofa i le taimi o le sauniga aoao o le Aualofa 2011 lea ootia ai lo'u loto ma aumaia ia te au le filemu. Na ia talanoa e uiga i le fugalaau itiiti aua nei galo au ma le ala e avea ai ona petala e lima ma sui o ni mea e tatau ona tatou manatua pea.¹

Ina ua maea le sauniga na faamatala mai ia te e la'u tama teine o Alyssa se tala e uiga i lana uo o Jessie, e i ai sana pisinisi laitiiti e oka ai meaai. Sa talosagaina Jessie e taitai o le Aualofa o lana siteki e faia se taumafataga mama e tufaina atu pe a maea le sauniga aoao a Le Aualofa. Sa ta'u atu e Jessie i a Alyssa sa ia iloina vave lava le mea e tatau ona ia faia—250 tamai

keke. Na ofo atu Alyssa e fesoasoani e aumai tamai keke i le nofoaga autu o le siteki.

Na oo mai le aso o le fonotaga, ma ina ua alu atu Alyssa e fesoasoani, na ia mauaina Jessie ua toeitiiti lava tagi. Ua saunia tamai keke, ae na auina atu e Jessie se ata o tamai keke i se tasi o le aiga lea na fai mai sa lē manaia tele mo le fonotaga.

Sa amata ona le mautonu Jessie ia te ia lava. Sa ia faapea o taitai o le Aualofa a le siteki o loo faamoemoeina se mea e sili atu ona matagofie nai lo ana tamai keke faatauvaa. Sa taumafai malosi o ia e mafaufau po o le a se auala e toe teuteu ai tamai keke, ae ua le lava se taimi. Sa ave e ia ma Alyssa tamai keke i le tulaga lena sa i ai, faatasi ai ma Jessie o loo

lagonaina faapea ua ia faatoilaloina tuafafine—seia oo ina saunoa mai Peresitene Uchtdorf.

A o talanoa mai e uiga i le fugalaau laitiiti o le aua nei galo au, na faaali mai se ata o le fugalaau itiiti lanumona i luga o le lau. O se fugalaau e matuai faatauvaa lava ae matuai matagofie lava i ona petala maaleale. O le savali a Peresitene Uchtdorf na ootia ai loto o tagata uma e pei a o ia augani mai ia i tatou e aua le matuai tosina ese i fugalaau felanulanuai lapopo o siomia ai i tatou ona galo ai lea o upumoni e lima faatauvaa ae taua ua ia aoaoina ai i tatou.

Ina ua uma le tatalo faaui, sa malaga atu uso i le fale faafafia. Ina ua savavali atu Alyssa ma Jessie i totonu, na la maua atu ai tagata uma o loo siomia le laulau o le taumafataga mama ma tuufesili, “Na faapefea ona latou iloa?”

O tamai keke taitasi na teuina i le suka paepae faatasi ma se tamai fugalaau faatauvaa, matagofie, mama, e lima petale o le aua nei galo au. ■
Gale Ashcroft, Arisona, ISA

FAAMATALAGA

1. Tagai i Dieter F. Uchtdorf, “Aua Nei Galo Au,” *Liahona*, Nov. 2011, 120.



NA TUUINA MAI IA TE AU E LE FOLAFOLAGA LE FAAMOEMOE

Elei umi ona ma faaipoipo ma lo'u toalua, ae faamanuiaina i ma'ua i se atalii. Ina ua ou vaaia lana ataata ma tilotilo atu i ona mata, sa ou lagona le nofo aitalafu i le Tama Faalelagi. O lo ma atalii na foliga atoatoa mai ia te au. Na ma faafetai ma lo'u toalua i le Alii i aso taitasi mo se mealofo taua tele.

O le aso 19 o Fepuari, 2009, na ou sauni ai e toe foi atu i le aoga mo lo'u tausaga faaiu o vasega. Ma te lei iloa ma lo'u toalua o le aso e sosoo ai o le a maua ai le ma tama pele i se fiva ma tuua ai lenei olaga faaletino.

O se aafiaga faigata tele mo au e tauaveina. Na o mai tagata o la matou uarota i lo ma fale e faamafanafanaina i maua i mau ma viiga ma tatalo faatasi ma i maua. Sa ou faamemelo i lo latou faamaisega agaalofa, ae na faaaaua pea lo'u faanoanoa i lo'u atalii. Soo se taimi lava ou te mafaufau ai ia te ia, e amata ona mamafa o'u mata i loimata.

I le fa o aso talu ona mavae lona maliu, sa musuia au e suesue *Aoaoga a Peresitene o le Ekalesia: Iosefa Samita*. A o ou uuina le tusi, sa matala i o'u lima i le mataupu ua faaulatalaina "Saunoaga mo le Faamoemoe ma Faamafanafanaga i le Taimi o le Oti." Sa amata ona ou faitau ma sa matua aafia lava i le faanoanoa matautia sa mafatia ai Iosefa ma Ema a o tau amata lo la aiga. Ina ua ou oo atu i le upusii mai se lauga na tuuina atu e le Perofeta i le falelauasiga o se teineitiiti e lua tausaga le matua, sa ou lagonaina e peiseiai ua sasaa mai ni vai malulu i luga o lo'u ulu, ma faamalulu ai o'u mafaufauga na tumu i le faanoanoa.

Na ou valaau i lo'u toalua. Na ma faitau faatasi: "ou te . . . fesili ai i le fesili, aisea i fanau iti, o fanau e leai ni agasala, ua aveesea ai ma i tatou. . . .

E aveeseina e le Alii le toatele e oo lava i le fanau iti, ina ia latou o ese ai mai . . . faanoanoaga ma leaga o lenei lalolagi; e mama tele i latou, matagofie tele, e soifua ae i le lalolagi; o le mea lea, afai e manatunatu i ai ma le sa'o, o le a leai se faavauvau ae o le a i ai le mafuaaga e fiafia ai ona o le a aveeseina mai i latou mai le leaga, ma o le a le toe umi ona tatou toe faatasi lea ma i latou."

Na toe faaopoopo mai le Perofeta: "O le fesili e mafai ona fesiligia—'Pe mafai ona maua fanau e tina i le faavauvau? Ioe! Ioe! Tina, o le a maua a outou fanau; aua latou te maua le ola e faavavau, aua ua uma ona totogi la latou aitalafu."¹

Talu ona ma faitau i na upu mataupu, ua faatumulia tatalo a lo matou

aiga i le faafetai mo le folafolaga faapea o le Togiola a Iesu Keriso o le a ma toe faatasi ai ma lo ma atalii.

I le taimi nei ua toatolu si a ma fanau laiti aulelei, o nai tei o la ma atalii ua maliu. O loo ma aoaoina i latou i le talalelei moni ma le faavavau, lea o le a taialaina i latou e toe foi atu ai i lo latou Tama Faalelagi ma lo latou Faaola, o Iesu Keriso.

Ou te iloa e moni le savali a le Perofeta o Iosefa Samita i le olaga pe a mavae le oti. Ou te faafetai pea e faavavau mo le faamoemoe, filemu, olioli, ma le fiafia ua ia aumaia i lo matou aiga—i itu uma o le veli. ■

Juliana Fayehun, Lagos, Nigeria

FAAMATALAGA

1. *Aoaoga a Peresitene o le Ekalesia: Iosefa Samita* (2007), 187.



SA TELE NI MEA OU TE FAASOA ATUA

Sa ou mafaufau lava i taimi uma o le sauniuniga mo faalavelave faafuasei i le tulaga o le tausia o au lava ia ma lo'u aiga. Ae sa ou aoaoina e vaai i le sauniuniga i se auala ese i se tasi taeao o le Aso Sa i Florida i saute i le 1992. O le Afa o Andrew, o se tasi o afa aupito sili ona faataumaoi ma taugata na taia ai le Iunaite Setete, na faatamaia ai se tau-mafanafana matagofie i Miami, Florida.

Sa ou nofo na o au mo sina taimi i se fale mautotogi i le matafaga, ma auai i se polokalama o aoaoga faamasani mo le tolu masina mo la'u galuega. Ina ua oo mai le lapataiga o le afa ma sa ou iloa ai e manaomia ona matou o ese mai lo matou fale mautotogi i le aoauli, ua uma ona taofia e se paaga ni potu i le faletalimalo i se itulagi tutonu mo au ma la matou au-faigaluega. Sa ou puipua ou faamalama ma teuina a'u meatotino faaletagata lava ia.

I le naunautaiga mo se asiasiga mai lo'u toalua ma la'u fanau mo se vai-aso atoa, na ou faatauina mai ai talu ai nei ni meaai ma vai mo lo'u aiga

e toaono. Sa faamafanafanaina au i le iloaina sa ou maua se nofoaga saogalemu e alu i ai ma ua lava ni meaai e ave mo le tele o vaaiso.

A o ou sauni e tuua le fale i le 10:30 i le taeao, sa ou mauaina se lagona lelei—ua lelei mea uma. Sa ou tootuli i le tatalo, faafetai atu i le Tama Faalelagi mo ou faamanuiaga ma ole atu mo Lana fesoasoani i le taimi o le afa o le a oo mai. A o faaiuina la'u tatalo, na musuia au e le Agaga e fai atu, “Afa! e i ai soo se tasi e manaomia le fesoasoani, faamolemole fesoasoani mai ia te au ina ia ou maua o ia.”

I ni nai minute, na tuitui mai ai se tina ua oti lana tane ua 80 tausaga i lo'u faitotoa. “Ou te faamalie atu,” o lana tala lea. “Ua sese lou potu. O loo ou sailia se uo.”

Sa le mautonu lana pupula. Ina ua ou fesili pe mafai ona ou fesoasoani, sa amata ona popole o ia ma faapea mai na te le'i iloaina le mea e fai po o fea foi e alu i ai. Sa ou fesili ia te ia po o fea e nofo ai, ma ma savavali faatasi

atu i lona fale mautotogi, iloilo lona tulaga, ma vaavaai i mea na te ono faia.

Sa ou fai atu ia te ia atonu e maua e la'u kamupani ae avanoa i se tasi o o matou potu i le faletalimalo, ma sa ou valaaulia o ia e faatasi mai ma la matou vaega. Sa mapuea o ia i le fiafia. Sa faavave ona matou tapenaina ma puipui lona fale mautotogi ma meatotino, ma sa ou fuafuaina se paaga e aveina lana taavale i le faletalimalo.

A o ou sauni e tuua le fale, na fesili mai nisi fafine se lua ua maliliu a la tane mo se fesoasoani. Sa ou fesoasoani ia i latou ia toofilemu ina ia mafai ona latou mafaufau manino ma fuafua po o fea e maua ai le sulufaiga. Ina ua ou aumaia au atopau mai se tasi o a'u paaga o le galuega, na fesili mai se isi fafine matua ua oti lana tane mo se fesoasoani. Sa matou tuuina ana aitema maaleale i ni eria saogalemu ma fesoasoani ia te ia e saunia ai e tuua le fale.

I le taimi lea, na valaaulia e isi paaga o le galuega ni tamaiti aoga se toalua o le kolisi o e sa nonofo i se motu e nonofo faatasi ma la matou vaega i le faletalimalo e i totonu o le motu. E pau meaai na latou maua o se luuga o meaai mamā ma se kuata (.95 L) o le vai mama. O le mea e lelei ai, sa i ai ia te au ni mea se tele e faasoa atua, e le gata ia i latou ae faapea foi ma isi tagata uma lava.

O se faamanuiaga lava le saunia ma le taitaia e le Alii. O lena mea na mafai ai ona ou tuuina atu ai se faatosinaga toafimalie i se taimi o le popole, ma faaalu toetoe lava o lo'u taimi atoa e fesoasoani atu ai i isi e aunoa ma le popole i a te au lava ia. Sa ou mauaina se tulaga fou o le agaga faafetai mo le fautuaga mai o tatou taitai perisitua ina ia saunia. ■

Brent Fisher, Kaledonia, ISA

Ina ua ou fesili
pe mafai ona
ou fesoasoani,
sa amata ona
popole o ia ma
faapea mai na te
le'i iloaina le mea
e fai po o fea
foi e alu i ai.



FAATALITALI MO LE LA OSO

Oataata na faatumulia ai le potu i le pouliuli a o ou taotooto ma le mataala ma faalogologo atu i lo'u toalua o loo manava, ma taumafai e mafaufau po o moe o ia. Faatoa atoa le lua aso talu ona mavae le maliu o le ma afafine e 12 tausaga le matua mai se faalavelave faafuasei matautia. Na toe moeiini ou mata, ae na taumamao le moe mai ia te au. Sa faanaunau atu lo'u loto mo la'u tama teine. Sa le mafai e le malamalamo o le ata o le faaolataga ona faamama le tiga o le misia o ia.

A o latalata mai le tafa o ata, sa ou lagonaina se faanaunauga faafuasei, ma le malosi. Ua toeitiiti oso le la, ma i lo'u mafaufau sa ou vaaia i le lagi ua faafuina i le malamalamo lanu piniki vaivai. Sa fafia le ma tama teine i le lanu piniki. O se la oso lanu piniki o se mea lea e tasi na ou manaomia e toe lagonaina ai le latalata atu ia te ia.

“Sei ta o e matamata i le la oso,” sa ou musumusu atu ai i lo'u toalua fiamoe.

Na ma tutu i le auala taavale, faasaga atu i sasae, ma faatalitali. . . ma faatalitali. E ui ina sa faamalamalamaina le lagi, sa lei oso mai le la i le va o ao maualalalo.

Sa ou faalagolago lo'u ulu i luga o le tauau o lo'u toalua ma mapuea, ma taumafai e faafoliga e le afaina. Ae sa ou manao i se mea e sili atu. Ou te manaomia se mea e sili atu. E mautinoa lava e mafai e le Tama Faalelagi ona tuu mai ia te au lenei manao ina ua uma ona toe aveina atu la ma teine aulelei i le aiga ia te Ia.

A o liliu atu lo'u toalua e alu i totonu, na vaavaai i tua atu o i maua agai atu i le itu i sisifo, sa ia fai mai, “Vaa!”

Sa ou faliu i tua. I tua atu o i maua sa faatumulia le lagi i ao lanu piniki


vaivai, ma se malamalamo lanu auro o loo siomia ai. Sa ou tau manava, ma amata ona ou tagi. Sa sili atu ona matagofie nai lo le mea sa ou mafaufauina. Sa pei o se opo mai lo ma afafine. Sa ou iloina na silafia lo'u Tama Faalelagi lou loto tiga ma sa auina mai se folafolaga o le faamoemoe mo le lumanai—o se faamanatu mālū o aiga e faavavau ma taimi matagofie uma lava o le a oo mai.

Ou te mafaufau soo i lena lava taimi matagofie ma se vaaiga fou na ia tuuina mai ia te au. O ai e vaai mo se la oso i le itu i sisifo? Ae ui i lea o iina sa faatalitali mai ai la'u vavega. E fia ni faamanuiaga ma vavega ua ou misia ona ua latou oo mai i nofoaga e le'i faamoemoeina? Pe faafia ona ou taulai atu i mea ou te manatu e tatau ona i ai ae misia ai le mamalu o le mea lea?

Sa ma tatalo pea mo se vavega sa faafitia, ae ina ua ou tilotilo solo i la'u vaaiga fou, sa ou vaaia le vavega o ola e fa na faaleleia e ala i le foai atu o totoga o le ma tama teine, o le vavega o le alofa faaleaiga ma le lotogatasi o le uarota, le vavega o le auaua atu. Sa ou lagonaina le faanoanoa maoae, ae sa ou lagonaina foi se faamoe-moe malosi ua faatumulia lo'u agaga i piniki taitasi o le la oso, o lagoto mumu taitasi, ma fugalaau lanu piniki taitasi e faasalaveia lou ala.

O lenei la a oso a'e le la, ou te vaavaai i sasae ona liliu lea e vaavaai i sisifo. Ou te ataata ma le malamalamo o loo i ai pea lava pea vavega ma faamanuiaga e tatau ona maua—ma o le la o le a oso pea lava tulai i luga o o tatou faanoanoaga pe afai tatou te tuu atu i ai. ■

Julia Wagner, Ohaio, ISA



A o liliu atu lo'u toalua e alu i totonu, na vaavaai i tua atu o i maua agai atu i le itu i sisifo, sa ia fai mai, “Vaa!” I tua atu o i maua sa faatumulia le lagi i ao lanu piniki vaivai, ma se malamalamo lanu auro o loo siomia ai.

**E mafai faapefea e
le ola tauagafau ai i
le gagana, amioga,
ma foliga vaaia ona
fesoasoani ia i tatou
e faasusulu atu le
malamalama ma faa-
mamuina le Atua?**

Afai E Tau Tasi
o Outou Mata i

Lo'u Mamalu

Saunia e Katherine Nelson ma
Heidi McConkie

I le Fonotele i le Lagi i le muai olaga, ina ua ofo mai Iesu Keriso e avea ma lo tatou Faaola, na Ia fetalai atu i le Tama, "ia faia Lou finagalo, ma e a oe pea le mamalu e faavavau" (Mose 4:2).

Na faia pea lava i taimi uma e le Alii le faataitaiga o le faamamuina o le Tama. I le taimi o Lana galuega talai faaletino, e lei faia lava e le Faaola se faatosinaga e gauai atu ai manatu ia te Ia lava ae faasino atu lava Ona soo i le Tama, ma aoao atu, "O le faatuatua ia te au, e le faatuatua mai o ia ia te au, ae ia te ia ua auina mai a'u" (Ioane 12:44). Na aoao mai i tatou e le Faaola i le taua o le tauagafau e ala i uiga faaalia, foliga vaaia, upu, ma galuega.

I la latou tautinoga e mulimuli i le Faaola, o le autalavou matutua i leneitusiga o loo tomanatu i a latou faaleoina i totonu ma fafo o le tauagafau ma faasoa mai auala na mafai ai e la latou tautinoga e faamamuina le Atua ona

mamuina o latou tagata ma taialaina ai a latou amioga.

Faamamuina le Atua ma Faasusulu Atu le Malamalama

E sili atu lo tatou malamalama pe faapefea e le tauagafau ona faamamuina le Atua pe a tatou malamalama po o le a moni le tauagafau. Ua faamatala mai e le *Faamaoni i le Faatuatua*: "O le tausaafia o se uiga o le lotomaualalo ma le faaaloalo e ala i laei, teuga, gagana, ma amioga. Afai e te tauagafau, e te le manao e tosina mai ni manatu e le talafeagai. Nai lo o lena, e te saili e 'vivii atu i le Atua i o outou tino ma o outou agaga' (1 Korinito 6:20)."¹

A o tatou aoao e faaalia o le tauagafau e pei ona faia e le Faaola, tatou te talia le Agaga i o tatou olaga, faataunuina le folafolaga e faapea "afai e tautasi o outou mata i lo'u mamalu, o le a faatumulia o outou tino atoa i le malamalama" (MF&F 88:67). A o e

faitauina pe o le a le malamalama o isi talavou matutua i le tauagafau, e mafai ona e mafaufau pe faapefea ona faateleina lou lava malamalama faaleagaga e ala i le faia o ni suiga e faaleleia atili ai lau tautinoga i le loto ma uiga faaalia o le tauagafau.

Ia Tauagafau i le Gagana ma Amioga

"O au upu ma gaoioiga e mafai ona faia se aafiaga silisili mo oe ma isi. Ia faailoa atu oe lava i gagana mama, lelei, ma faagaeetia ma gaoioiga e au-maia ai le fiafia i e o loo siomia oe. O au taumafaiga ia tauagafau ma tausaafia i upu ma galuega, e faateleina ai le taitaiga ma le faamafanafanaga mai le Agaga Paia."²

Na faamalamalama mai e Dar'ja Sergeevna Shvydko o Volograd, Rusia, faapea tatou te tauagafau i a tatou upu pe a tatou faaaloalo i isi ma faaaoga ai le "leo filemu ma malu le faaleoina o o tatou mafaufauga e aunoa ma le

AUTALAVOU MATUTUA



faaaogaina o upu paaa pe le talafeagai.” O le gagana tauagafau e saoloto mai le faitatala, faitioina, tauemuga, ma upu uīgā. E le faatiga ai isi pe faamaualugaina ai le tagata; ae na ona faaalia ai le agalelei atu ma faailoa ai le paia o fanau uma a le Tama Faalelagi.

E tatau foi ona faaalia e a tatou upu e tautala ai le faaaloalo mo le aiga Atua: “Ia aloese mai gagana le mama ma faiga masani o loo faaaogaina ai

“O le tausaafia o se uiga faaalia o le lotomaualalo ma le faaaloalo e ala i laei, teuga, gagana, ma amioga. Afai e te tauagafau, e te le manao e tosina mai ni manatu e le talafeagai.”

ma le le faaaloalo e le lalolagi le suafa o le Alii. . . . O le natura le faaaloalo o na gagana . . . e faataumaoia ai lo [tatou] mauaina o musumusuga filemu a le Agaga Paia.”³

E pei lava o gagana le tauagafau e pei o le faitatala ma le tauemuina e mafai ona faaleagaina ai sootaga, o le gagana tauagafau e atiina ae se tautinoga loloto atu i le Atua ma, e pei ona faamatalaina e Kelly Prue o Iuta, ISA, e “faateleina lo tatou malosi e fausia ni sootaga lelei ma isi. O la tatou gagana tauagafau e fesoasoani ia i tatou e aumaia ai uiga sili o isi.”

O le tauagafau i le gagana ma le tauagafau i amioga e o faatasi. “E taua le tauagafau i le gagana ma amioga ona o loo faaalia ai po o ai outou ma mea tou te faatauaina,” o le tala lea a Mike Olsen o Iuta. E matauina e tagata pe o a upu ma amioga e le ogatasi. O la tatou gagana e siitia ai isi ma faamamaluina ai le Atua e tatau ona o gatasi ma faatinoga felagolagomai. E ala i galuega o le auauna atu ma le agalelei, tatou te faailoa atu ai la tatou tautinoga e siitia isi ma ava i le Atua e sili atu le loloto nai lo a tatou upu. O a tatou faataitaiga o le avea ma soo i le upu ma galuega e mafai ona avea ma se faatosinaga mo le lelei.

“Ou te matua talisapaia le tauagafau i amioga ma upu,” o le tala lea a Carrie Carlson o Colorado, ISA. “E i ai se mea e matuā matagofie i se tasi e lotomaualalo ma le faia ni mea mo le faamoemoega o le tosina mai o manatu o isi. O i latou o e tautala atu i le tauagafau e avea ma ipu mamana mo le Alii.”

Ia Tauagafau i Laei ma Foliga Vaaia

“O le tauagafau [i laei] e fesoasoani e faaalia ai lo tatou tagata sili e ala i le fesoasoani ia i tatou e taulai atu i le faaleagaga ae le o le tagata o le lalolagi,” le tala lea a Paul Cace o Iuta. E ala i le faia o laei tauagafau, ua tatou uunaia isi ina ia latou iloa i tatou ma talisapaia i tatou mo a tatou amioga ma uiga nai lo o tatou foliga vaaia.

O le ala tatou te laei ai e le gata ina faailoa atu ai i isi le auala e tatau ona latou taulimaina ai i tatou, ae e aafia ai foi pe faapefea ona tatou vaaia ma taulimaina i tatou lava. “Tatou te aoao mai le talalelei, o o tatou tino o se meaalofa mai le Atua,” o le tala lea a Luis Da Cruz Junior o Pasila.

“E fesoasoani o tatou tino ia i tatou e alualu ai i luma ma avea ai faapei o lo tatou Tama. O le mafuaaga lea e taua le laei tauagafau. E ala i le faia o lena mea, ua tatou faaali atu i le Atua ma isi o loo i ai lo tatou faaaloalo mo lenei meaalofa ma mo isi.”⁴

Ua faamatalaina e Carrie, “O laei e le tauagafau ma ua faamoemoeina e faaalia ai le tino faapea o se mea fai-tino faaletino ua aveese mai se agaga e i ai ni uiga lelei ma uiga tauleleia. O le tauagafau, e ui lava ua tele ai au tupe ua alu i nisi taimi ma e mautinoa lava le tele o taimi, ua fesoasoani ia te a'u ou te iloa ai o lo'u tino o le fale o se agaga faapelepele o i ai le malosiaga faalelagi ma le taunuuga, na fanauina ma tausia e ni Matua Faalelagi. E manaomia ai le tausia ma le faapele-pele ma le faaaloalo nai lo le mea e mafai ona tuuina atu e le lalolagi.”

Ua aoao mai le *Faamaoni i le Faatuatua*: “E le gata i le aloese mai laei e vavala mai ai itutino, ae e tatau foi ona e aloese mai le soona faapanu o au teuga, laei, ma foliga vaaia. Ia tumama e le aunoa i laei, teuga, ma amioga, ma aua nei fa'inaelo pe manatu faatalale i ai.”⁵ O le auala o faia ai o tatou ofu ma tuu atu ai i tatou lava, tatou te fesootai atu ai lo tatou faaaloalo mo le Atua, mo i tatou lava, ma mo isi.

Tautino ia Tumau

A o tatou taumafai e mulimuli i tulaga faatonuina o le talalelei o le tauagafau, tatou te faaali atu ai la tatou tautinoga e ala i le tumau, usitaia o poloaiga a le Alii i taimi uma, ae le faapea pe a talafeagai ai.

O le tautinoga moni e masani lava ona mauaa lava i mataupu faavae o le talalelei. Na faamatala e Anthony

Roberts o Iuta, "O le Tauagafau o se tulaga o le mafaufau, o se manao e savali i aso taitasi i le malamalama o le talalelei ma le ata o le faaoataga." A o tatou faatofu i tatou lava i le talalelei, e mafai ona faateleina lo tatou liua ma faateleina lo tatou naunau e ola i mataupu faavae o le talalelei.

Ia Malamalama i Lau Amio Atua

O le faataitai pea lava pea o le tauagafau e fesoasoani ia i tatou e



malamalama ma talisapaia ai lo tatou tofi, ma le malamalama o lo tatou natura paia e mafai ona musuia i tatou ina ia sili atu ona tauagafau. Na faamatala e Raffaella Ferrini o Florence, Italia, "O le tauagafau e faamanuiaina lo'u olaga aua e fesoasoani ou te lagonaina ai le pei o se afafine faapitoa o lo'u Tama Faalelagi, ma o lena malamalama, o le a uunaia au ia manao ina ia tauagafau."

O le faatagaina o le lalolagi e faamalamalama mai po o ai i tatou e mafai ona faaleagaina ai lo tatou naunautai faaletagata lava ia. Na

faamatalaina e Julianna Auna o Iuta lona aafiaga: "Ae ou te le'i mauaina se molimau i le mataupu faavae o le tauagafau, sa ou i ai i se nofoaga o le le fafia ma le le saogalemu faaleagaga. O le tuuina atu i le lalolagi e faamatalaina au o se faanoanoaga ma le faatamaia faaleagaga ona o le faamoemoega a le lalolagi i mea faalelolagi, ma faaletino e sauva ma e faifai pea. O le taimi lava na ou filifili ai e le faalogo i le lalolagi, ma ia tuu atu i lo'u sootaga ma le Atua e faamatalaina au, na faasolo ina sili atu ona faigofie le olaga, sili atu ona saoloto, ma sili atu le fafia." Pe a tatou sailia le faamaloniga mai le Tama Faalelagi nai lo le lalolagi, o le a tatou maua le olioli sili atu i le olaga ma se faaosofiaga sili atu ina ia tauagafau.

Ola i se Olaga Tauagafau

"O le tauagafau e faaalia i mea uma tatou te faia: la tatou tautala, o lo tatou foliga vaaia, o a tatou amio, ma e oo lava i nofoaga tatou te asia," le tala lea a Galina Viktorovna Savchuk o Novosibirsk, Rusia. O le ola tauagafau e vavalalata le fesootaiga i lo tatou tuuto atu i le talalelei ma lo tatou sootaga ma le Atua.

O le tauagafau moni o se tuufatasiga o amioga ma uiga faaalia. O le galue e faaleleia atili la tatou amioga po o lo tatou manatu o le a fesoasoani ia i tatou e faaleleia atili ai le isi. O le tauagafau i a tatou amio ma foliga vaaia e aunoa ma le atiina ae o se tauatinoga mo le olaga atoa e taofia i tatou mai le mauaina o faamanuiaga atoatoa o le ola tauagafau. Ma o le talitonu ia i tatou lava ia oni tagata tauagafau e aunoa ma le mulimuli i a tatou amioga o se faa'ole'ole.⁶

I le talaaga o le tauagafau, o le fai

atu faapea ua tau tasi o tatou mata i le mamalu o le Atua o lona uiga ua tatou tautino e le gata i le vaaiga i fafo a o totonu foi ina ia ola tauagafau. E pei lava o le mata e tatau ona faasaga atu i le Atua, o lo tatou foliga vaaia ma amioga e tatau ona ogatusa ma mataupu faavae o le tauagafau. Ae na o le faasagatonuina o le mata i le Atua e le tau tasi ai i Lona mamalu; e tatau ona taulai atu ia te Ia. E faapena foi, o laei tauagafau ma teuga e tatau ona o faatasi ma se vaaiga o mataupu faavae e faavavau.

A o tatou tausia poloaiga a le Atua, o le a sili atu ona faigofie ona tatou taulai atu o tatou mafaufau ia te Ia. E faapena foi, a o tatou taulai atu o tatou mafaufau i le Atua, o le a sili atu ona faigofie ona tatou usiusitai ia te Ia.

A o tatou taumafai e ola tauagafau, o le a tatou lagonaina le uunaiga a le Agaga ua faateleina i o tatou olaga. Na aoao mai e Elder Robert D. Hales o le Korama a Apostolo e Toasefululu: "O le tauagafau e taua i le agavaa ai mo le Agaga. O le tauagafau o le lotomaulalo foi lea, ma o le lotomaulalo e valaaulia ai le Agaga e faatasi ma i tatou."⁷ O le taiatalaina e le Agaga o o tatou manatu ma amioga, o le a mafai ai ona tau tasi o tatou mata i le mamalu o le Atua ma o le a faatumuina i tatou i le malamalama. ■

E nofo Katherine Nelson i Iuta, ISA.

O Heidi McConkie e nofo i Delaware, ISA.

FAAMATALAGA

1. *Faamaoni i le Faatuatua: O Se Tusitala o le Talalelei* (2004), 173.
2. *Faamaoni i le Faatuatua* (2004), 173–74.
3. *Faamaoni i le Faatuatua* (2004), 173–74.
4. Tagai i le *Faamaoni i le Faatuatua*, 173.
5. *Faamaoni i le Faatuatua* (2004), 173–74.
6. Tagai Lynn G. Robbins, "Alii [ma Tamaitai] Pe Faapefea La Outou Amio e Tatau Ai?" *Liahona*, Me 2011, 103.
7. Robert D. Hales, "Tauagafau: Faaaloalo mo le Alii," *Ensign*, Aok. 2008, 34; *Liahona*, Aok. 2008, 18.

Finelani

O Le Liua ma
le Ositaulaga i

Saunia e Melissa Zenteno

ni nai maila mai le talafatai o Helsinki, Finelani, o loo i ai le olo o le sami o Suomenlinna, na fausia i le seneturi lona 18 e faamalosia ai le puipuiga mai osofaiga. I le faasolosolo i atumotu e ono, o lenei olo malosi e suitulaga i le naunautaiga mausali o tagata Finelani.

Ae o tagata e lolotu i Finelani e asiisi i se fale e ese pe a latou malaga atu i la latou taulaga. O le Malumalu o Helsinki Finelani o se faailoga lea faaletino o lo latou liua ma le puipuiga latou te maua mai le ola ai i le talalelei.

Mo Niilo Kervinen, o se talavou matua e 24 tausaga le matua mai Rovaniemi, Finelani, o le malaga i le nofoaafi i le 10-itula i Helsinki o se tau laitiiti lea e totogi mo le faamanuiaga o le auauna atu i le malumalu.

A o lei faapaiaaina le Malumalu o Helsinki i Finelani ia Oketopa 2006, na manaomia le malaga o Niilo ma isi tagata o lana uarota i le Malumalu o Stockholm Suetena po o le Malumalu o Copenhagen Tenimaka. “O malaga e masani lava ona alu ai le vaiaso i le taimi o le malologa i le taumafanafana,” na te manatuaina. O le malaga

i le pasi ma momoe i faleie i ma malaga o nisi ia o mea e sili ona ia manatua lelei.

Ae o le i ai o se malumalu i lona atunu o se faamanuiaga matagofie. “Ina ua latou fofogaina mai le malumalu o Helsinki, sa ou matua fiafia lava, o le tala lea a Niilo. “Ou te lagonaina pea le mana o le tatalo o le faapaiaga i taimi uma lava ou te alu ai i totonu.”

O lenei fiafia mo le malumalu ua ese ai Niilo mai i ana uo. “O tagata o Finelani e galulue malosi ma e olioli i le toaaga mai ae laitiiti le taimi mo mea faaleagaga i o latou olaga,” lana faamatatalaga. E ui lava ina fai mai Niilo ua faamanuiaina o ia i ni uo lelei, ao ia tuputupu ae na amata ona manino mai le eseesege i le va o ala na ola ai ana uo ma le ala sa aoaoina ai o ia e ola ai. O le eseesege lenei na mafua ai ona saili e Niilo sana lava molimau ina ua 17 ona tausaga. “Sa tatau ona ou faia se faaiuga po o fea e tu ai ma po o ai e avea ai au,” o lana tala lea. “Faatasi ai ma faamanuiaga a le Alii ma le taitaiga a le aiga ma uo lelei, sa ou maua se molimau e malosi atu o le Eklesia.”

E faapei le avea ma se talavou matua faamaoni i Finelani? Ua faasoa mai e se tasi o alii talavou lana aganuu ma lona talitonuga.

I le talanoa ai e uiga i le liua, na saunoa mai Elder David A. Bednar o le Korama a Aposetolo e Toasefululua, “ou te folafola atu a tatou malamalamai le upumoni ma ua faaliliuina i le Alii, o le a mautu lo tatou tutumau ma le mausali ma o le a le pauu ese lava.”¹ E ui lava o le malaga atu i Helsinki e manaomia ai le taimi ma tupe, ua naunau lava Niilo ia avea ma soo o Keriso. Ma ia Niilo, e le’o se osigataulaga lena mea. ■

FAAMATALAGA

1. David A. Bednar, “Faaliliuina i le Alii,” *Liahona*, Nov. 2012, 109.



O NISI MEA E UIGA IA NIILo

O a taumafa masani a tagata o Finelani?

O nisi o a'u meaai e fiafia i ai e aofia ai supo samani ma aano o tia ma pateta palu. Matou te matele foi i le aai i falaoa eena.

O a tou mea faafafia e fai?

Ou te fiafia e faasee i le aisa, matamata i ata tifaga, pe na o le fiafia lava i le savalivali i fafo. Sa ou faamisiona i lapani, o lea ou te suesue ai i le faalapani pe a ou mafaia.

E faapei le tafao faamasani i Finelani?

E leai sa matou aganuu malosi o tafaoga faamasani. E masani lava faatoa tafafao ni tagata pe a ua matuai fiafia lava ia i latou. O tafaoga faamasani iinei, e leo se auala ina ia latou masani ai i se tasi. E i ai talavou matutua faamaoni iinei, e tusa lava pe le toatele tagata lolotu O nisi taimi o talavou matutua o le ekalesia e malaga mamao mo se tafaoga faamasani ma se tagata na latou feiloi i se siva a talavou nofofua matutua.

O LE EKALESIA I FINELANI E ALA I FUAINUMERA

4,715 Au Paia o Aso e Gata Ai	5,250,000 tagata (mai ia lanuari 2012)
15 uarota	187,888 vaituloto
15 paranesi	179,584 motu
2 siteki	2.2 miliona
1 misiona	vaitaele vevela
1 le malumalu, na faapaiaina i le aso 22 o Oketopa, 2006	MEA MONI

Laumua:
Helsinki
Gagana: Finelani (Suomi)

ALII MA TAMAITAI I LE GALUEGA A LE ALII

I le fuafuaga sili faaeeina o le perisitua a lo tatou Tama Faalelagi, ua i ai i alii ma tamaitai ni matafaioi eseese ae tutusa lava le taua.



Saunia e Elder
M. Russell Ballard
O Le Korama
a Aposetolo e
Toasefululua

O u te talitonu ua i ai sina mea moni e manaomia ona malamalama uma i ai tamaitai ma alii e uiga i le matafaioi taua o loo i ai i tamaitai i le faamalosia ma le fausiaina o le malo o le Atua i luga o le fogaeleele. I le tele lava o auala o tamaitai o le fatu lea o le Eklesia. Faatasi ai la ma le fesoasoani a le Alii, ou te fia faamamaluina tamaitai ma tamaitai talavou faamaoni o le Eklesia. Ia te outou tamaitai pele, po o fea lava se nofoaga o tou alala ai i le lalolagi. Faamolemole ia outou silafia le alolofa tele ma le faatuatuaina o outou e le Au Peresitene Sili ma Aposetolo e Toasefululua.

Sei ou amata atu i se lesona toe faamanatu e uiga i mea o tatou faia iinei i le lalolagi.

O i tatou o ni atalii ma afafine agaga faapelepele a lo tatou Tama Faalelagi. Sa tatou nonofo faatasi ma Ia i le muai olaga. Ina ia faataunuina le misiona o le aumaiia “o le tino ola pea ma le ola faavavau o le tagata” (Mose 1:39), ua foafoaina e le Tama Faalelagi se fuafuaga e fesoasoani ai i Lana fanau ina ia ausia o latou faamoemoega tupito ma le sili. O le fuafuaga a lo tatou Tama na valaaufina ai le tagata e pau ma vavaeeseina mai ia te Ia mo se taimi e ala i le fanau mai i le olaga

faaletino, mauaina o se tino, ma ulufale atu i se taimi o tofotofoga ma le olaga faataitai. O Lana fuafuaga na saunia ai se Faaola e togiola tagata uma mai le Pau. O le Togiola a lo tatou Alii o Iesu Keriso na saunia ai le auala e ala atu i sauniga ma feagaiga paia o le talalelei ina ia toe foi atu i le silafaga o le Atua. Talu ai o le a tatou ola i se siosiomaga faaletino e tumu i tulaga matautia ma mea faalavefau, na silafia e le Tama Faalelagi ma Lona Alo tatou te manaomia le mauaina o le mana sili atu nai lo lo tatou lava. Na La silafia lo tatou manaomia o le mauaina o lo Laua mana. O le talalelei ma le mataupu faavae a Keriso e tuuina atu i tagata uma o e taliaina le mana e ausia ai le ola e faavavau ma le mana e maula ai le olioli i le malaga.

O loo i ai i latou o e fesiliglia le tulaga o tamaitai i le fuafuaga a le Atua ma i le Eklesia. Ua lava le faatalanoaina o au e ala i faasalalauga faaleatunuu ma faavaomalo e tau atu ai ia te outou o le tele o le au tusitala ua leva ona faia ni manatu e uiga i lenei autu. I le aluga o tausaga o le toatele na tuuina atu ni fesili e atagia mai ai o tamaitai o ni tagatanuu lona lua i le Eklesia. E leai se mea e mafai ona aveesea mai le upumoni.

Ou te fia fautuaina atu ni manatu autu se lima e te manatunatu loloto i ai e faatatau i lenei autu.

1. Ua I Ai se Fuafuaga a le Atua e Fesoasoani ia i Tatou e Taunuū i le Ola e Faavavau

Na foaoaina e lo tatou Tama Faalelagi ia alii ma tamaitai, o Ona afafine ma atalii agaga. O lona uiga e faavavau le itupa. Ua i ai Sana fuafuaga ua mamanuina e fesoasoani ia i tatou uma o e filifili e mulimuli ia te Ia ma Lona Alo, o Iesu Keriso, e ausia lo latou taunuuga o ni suli o le ola e faavavau.

Afai o lo tatou faaeaga mulimuli o lo Laua sini taua ma le faamoemoega lea, ma afai La te silafia mea uma ma atoatoa, e pei ona tatou iloaina i Laua, ona sili atu lea o lo Laua malamalama i le auala e saunia ai, aoao atu, ma taitai atu ai i tatou ina ia tatou maua le avanoa sili e agavaa ai mo le faaeaga.

O le toatele o tagata e i ai aiga po o uo o e na maua i faafitaui faigata eseese faaleagafesootai. O le finau e uiga

i faafitaui e masani lava ina le maua ai se tali po o se faa-iuga ma, o le mea moni, e mafai ona fatuai ai se fefinau-aiga. O loo i ai nisi o fesili e uiga i le tulaga o le Ekalesia i ni mataupu maaaleale e faigata ona tali atu e faamalieina ai soo se tasi. Ae peitai, pe a tatou saili le Alii i le tatalo e uiga i le auala e lagonaina ai ma mea e fai i nei tulaga, e oo mai le uunaiga: “E te talitonu ia Iesu Keriso ma e te mulimuli ia te Ia ma le Tama?” Ou te talitonu o le toatele lava o tagata i le Ekalesia i se tasi taimi po o le isi o le a mafaufau pe mafai ona latou faia mea uma ua talosagaina ai i latou e fai. Ae afai tatou te talitonu moni lava i le Alii, e oo mai le faamautinoaga: “Ou te talitonu ia Iesu Keriso, ma ua ou naunau e faia soo se mea ua finagalo o Ia ou te faia.” O lea la ua tatou agai i luma. Oka se mamana o upu “Ou te talitonu ia Iesu Keriso!”

O a tatou molimau ma filemu o tatou mafaufau ma lo tatou soifua laulelei e amata i le naunautai ina ia talitonu faapea e moni ua sili lava le silafia o lo tatou Tama o i le Lagi.



2. E Taitaiina le Ekalesia e ala i Ki o le Perisitua

O Le Ekalesia a Iesu Keriso o le Au Paia o Aso e Gata Ai o le Ekalesia lea a le Alii, ma o Lana Ekalesia e taitaiina e ala i le pule ma ki o le perisitua. “O ki o le perisitua o le pule lea ua tuuina mai e le Atua i taitai perisitua e faatonu ai, faafoe ai, ma pulea ai le faaaogaina o Lana perisitua i luga o le fogaeleele.”¹

O i latou o e ua i ai ki o le perisitua—po o se tiakono ua i ai ki mo lana korama po o se epikopo ua i ai ki mo lana uarota po o le Peresitene o le Ekalesia, o loo umia ki uma o le perisitua—ua mafai moni ai lava mo tagata uma o e auauna atu pe galulue faamaoni i lalo o la latou taitaiga ona faatino le pule o le perisitua ma maua le mana o le perisitua.

E galulue alii ma tamaitai uma i lalo o le taitaiga o i latou o e ua i ai ki. O le ala lea e taitaia ai e le Alii Lana Ekalesia.

Sei ou toe faamatalaina se mea sa ou ta’ua i le konafesi aoao ia Aperila 2013: “I le fuafuaga sili a lo tatou Tama Faalelagi e maua ai le mana o le perisitua, ua i ai i alii le tiutetauave tupito e taitai ai le perisitua, ae e le o i latou o le perisitua. E eseese matafaioi ae tutusa lava le taua ua i ai i alii ma tamaitai. E pei lava ona le mafai i se tamaitai ona fanauina se tamaitiiti e aunoa ma se alii, e faapena foi, e le mafai i se alii ona faaaogaina atoa le mana o le perisitua e faavae ai se aiga e faavavau e aunoa ma se tamaitai. . . . I se vaaiga e faavavau, o le mana foafoa atoa ai ma le mana o le perisitua e faaaogaina uma e se tane ma se ava.”²

Aisea e faauuina ai alii i tofi o le perisitua ae leai tamaitai? Sa faamalamalama mai e Peresitene Gordon B. Hinckley (1910–2008) e faapea o le Alii, ae le o le tagata, “na filifili o alii i Lana Ekalesia e tatau ona umiaina le perisitua” ma o le Alii foi na faaee maia i tamaitai ia ni “gafatia e faalautele ai lenei faalapotopotoga maoae ma le ofoofogia, le Ekalesia ma le malo o le Atua.”. . .³ Ina ua uma ona fofogaina ma faia mea uma, e le faaalia mai lava e le Alii pe aisea ua Ia faatulagaina ai Lana Ekalesia e pei ona Ia faia ai.

Aua nei galo ia i tatou e tusa o le afa o aoaoga uma o loo faia i le Ekalesia o loo faia lea e tuafafine. O le tele o taitaiga o loo saunia e mai o tatou tuafafine. O le tele o avanoa faaleauaunaga ma gaoioiga ua fuafuaina ma taitaia e tamaitai. O fautuaga ma le auai o isi tamaitai i aufono a uarota ma siteki ma i le aufono aoao i le laumua o le

Ekalesia e maua mai ai se malamalamaaga manaomia, poto, ma le paleni.

E manaomia uma alii o e faaaloalo i tamaitai ma o latou meaalofa faaleagaga tulaga ese ma tamaitai o e faaaloalo i ki o le perisitua o umia e alii e valaaulia ai faamanuiaga atoatoa o le lagi i soo se taumafaiga i le Ekalesia.

3. E Tutusa Uma le Taua o Alii ma Tamaitai

E tutusa alii ma tamaitai i fofoga o le Atua ma i le silafaga o le Ekalesia, ae e le faapea ua tutusa ona tasi ai lea. O tiutetauave ma meaalofa paia a alii ma tamaitai e eseese i lo latou natura ae le o lo latou taua po o uunaiga. E faatususa e a tatou aoaoga faavae o le Ekalesia ia tamaitai i alii ae e eseese foi ma alii. E le manatu le Atua e sili atu le lelei pe sili atu le taua o le isi itupa nai lo le isi. Na folafola atu e Peresitene Hinckley i tamaitai faapea “o lo tatou Tama Faavavau . . . e lei fuafuaina lava faapea e itiiti ifo outou nai le mamalu faapaleina o Ana foafoaga.”⁴

O alii ma tamaitai e eseese meaalofa, eseese malosiaga, ma eseese vaaiga po o manatu ma lagona. O se tasi lea o mafuaaga autu tatou te manaomia ai le tasi ma le isi. E manaomia se alii ma se tamaitai e fausia se aiga, ma e manaomia le alii ma le tamaitai e faataunuina le galuega a le Alii. O le tane ma le ava amiontonu o loo galulue faatasi e faaatoatoaina e le tasi le isi. Ia tatou faaeteete e aua nei o tatou taumafai e faaleaga le fuafuaga ma faamoemoega a lo tatou Tama Faalelagi i o tatou olaga.

4. Ua Faamanuiaina i Tatou Uma e ala i le Mana o le Perisitua

A o alii ma tamaitai i le malumalu, ua faaeeina ia i laua uma le mana lava e tasi, o le mana o le perisitua. A o taitaina le pule o le perisitua e ala i ki o le perisitua, ma ua na o alii agavaa o loo umia ki o le perisitua, o le mauaina o le mana ma faamanuiaga o le perisitua o loo avanoa i fanau uma a le Atua.

E agalelei lo tatou Tama o i le Lagi i Lona mana. E maua e alii ma tamaitai uma lenei mana e fesoasoani ai i o latou olaga. O i latou uma o e osia feagaiga paia ma le Alii ma e faamamaluina na feagaiga o le a agavaa e maua faaliga faaletagata lava ia, ia faamanuiaina e ala i auaunaga a agelu, e fagatua ma le Atua, e maua le atoaga o le talalelei,



ma mulimuli ane, ia avea ma suli faatasi ma Iesu Keriso i mea uma o i ai a lo tatou Tama.

5. E Tatau Ona Tatou Iloa ma Molimau Atu e uiga i le Mataupu Faavae

Tatou te manaomia ia tamaitai o le Ekalesia ia iloa le mataupu faavae a Keriso ma ia molimau atu e uiga i le Toe-fuataiga i soo se auala e te mafai aai. E lei i ai se taimi sili ona faigata i le talafaasolopito o le lalolagi. Ua faaatoatoaina e Satani ma ana au ia auupega i la latou faaputuga mo le afe tausaga, ma ua latou poto masani i le faatamaiaina o le faatuatua ma le faalagolago i le Atua ma i le Alii o Iesu Keriso i totonu o le aiga o tagata.

Ua ia i tatou uma—o alii, tamaitai, talavou matutua, autalavou, ma tama ma teine—le Alii ma Lana Ekalesia ina ia puipuia, faasaogalemuina, ma ia faasalalau atu i le lalolagi atoa. Tatou te manaomia atili ia leo tulaga ese ma malosi ma le faatuatua o tamaitai. Matou te manaomia oe e aoao le aoaoga faavae ma malamalamā i mea matou te talitonu i ai ina ia mafai ona e tuuina atu lau molimau e uiga i le moni o mea uma—a le o le tuuina atu o na molimau i se tolauapiga a Tamaitai Talavou, i se sauniga molimau, i se lautusi tusitusi, po o le Facebook. Ua na o oe lava e mafai ona faalia i le lalolagi pe faapei ia foliga ma talitonuga o tamaitai a le Atua ua osia feagaiga.

Tuafafine, o la outou lio o faatosinaga o se lio tulaga

ese—o se lio e le mafai ona kopiina e tagata. E leai se tasi e mafai ona puipuia lo tatou Faaola mai ni isi faatauanau po o le mana nai lo oe, o afafne o le Atua,—o oe o loo i ai se malosiaga ma le talitonuga i totonu. O le mana o le leo o se tamaitai ua liua e le mafuatiaina, ma ua sili atu ona manaomia e le Ekalesia o outou leo i le taimi nei nai lo se isi lava taimi.

Ou te tuuina atu lau molimau ua tatou i ai i se taimi ua tatau ai ona tatou tutu faatasi i le lotogatasi. E tatau ona tatou tutu faatasi—alii ma tamaitai, alii talavou ma tamaitai talavou, tama ma teine. E tatau ona tatou tutu atu mo le fuafuaga a lo tatou Tama Faalelagi. E tatau ona tatou puipuia o Ia. O loo ua tuleiesea o Ia. E le tatau ona tatou tutu vale o ni tagata o Le Ekalesia a Iesu Keriso o le Au Paia o Aso e Gata Ai ma faataga lena mea e tupu e aunoa ma le lototele e faaleo atu o tatou leo.

Ia faamanuia outou e le Atua ina ia maua le lototele e suesue ai ma ia iloa ia upumoni faigofie o le talalelei ona faasoaa atu lea i soo se avanoa e te mauaina. ■

Mai se lauga sa faia i se faigalotu i le Iunivesite o Polika Iaga i le aso 20 o Aokuso, 2013. Mo le tusiga atoa i le faaPeretania, asiasi.speeches.byu.edu.

FAAMATALAGA

1. *Tusitalima 2: Taitaina o le Ekalesia* (2010), 2.1.1.
2. M. Russell Ballard, "O La'u Galuega ma Lo'u Mamalu Lenei," *Liahona*, Me 2013, 19.
3. Gordon B. Hinckley, "O Tamaitai o le Ekalesia," *Liahona*, Ian. 1997, 79.
4. Gordon B. Hinckley, "Ia Tu Malosi e Tetee atu i Togafiti a le Lalolagi," *Liahona*, Ian. 1996, 119.

SAUNIA E AUAUNA ATU, AUAUNA ATU E SAUNIA AI

Na tuuina atu e le Atua ia te oe le Perisitua Arona ona e i ai Sana galuega mo oe—i le taimi nei ma le lumanai.



David L. Beck
Peresitene Aoao
o Alii Talavou

Jonathan o sau uo o le na auai i le Ekalesia i le fa tausaga ua mavae. E na o ia lava le tagata o le Ekalesia i lona aiga. Ina ua uma ona ia maua le Perisitua Arona, sa amata ona ia auauna atu i isi i se auaunaga na te lei faia lava muamua. Na iloa e Jonathan o le auauna atu, sa tele ni mea na manaomia ona ia aoaoina. Sa ia manao foi ina ia agavaa ma atili faamoemoeina, o lea sa ia suesue ai i le talalelei, tatalo, ma auai i sauniga o le Aso Sa ma le seminare. Sa ia galue malosi i le tausiga o poloaiga ma tulaga faatonuina o le Ekalesia. Na ia faataunuina ma le filiga ona tiute faaleperisitua, e aofia ai le avea ma faiaga maoae o aiga. Na fesoasoani lana tusi o le *Tiute i le Atua* ia ona malamalama i na tiute ma aoao ai i le auala e faataunuina ai.

O le auaunaga faamaoni faaleperisitua a Jonathan na tuuina atu ai ia te ia le malosi faaleagaga. Na fesoasoani e puipuia o ia mai faatosinaga amioleaga. Sa ia tuputupu ae maoae ao ia auauna atu ma saunia mo lona lumanai. O le tausaga lea ua tea, sa ia maua ai ma le agavaa le Perisitua Mekisateko ma faeeega paia o le malumalu. O loo ia auauna atu i le taimi nei i se misiona i Pasila.

E masani lava ona taua le Perisitua Arona o le “perisitua faasauniuni.” Na tuuina atu e le Atua ia te oe le Perisitua Arona ona e i ai Sana galuega mo oe—i le taimi nei ma le lumanai. O lau auaunaga faamaoni i le Perisitua Arona e saunia oe mo nisi avanoa sili

ona maoae e auauna atu ai i tausaga o le a oo mai. Faapei o Jonathan, o loo e sauniuni ia “maua le Perisitua Mekisateko, e maua ai faamanuiaga o le malumalu, e faia ai se misiona talai, e avea ma se tane ma se tama alofa, ma faaaauau pea ona auauna i le Alii i le olaga atoa” (*Faamaoni i le Faatuatua: O Se Tusitai-ala o le Talalelei* [2004], 139).

Atonu e le iloaina mea uma o faamatalaga auilili o avanoa matagofie ua faapolopolo mo oe e le Tama Faalelagi, ae ou te talitonu o le a e saunia e faafetaiai i latou pe a e manatuaina e faia mea nei o se tasi o umia le Perisitua Arona.

Mulimuli ia Iesu Keriso

I le avea ai ma se tasi o umia le perisitua, o oe o se sui o Iesu Keriso. O lona uiga ua fai atu ia te oe ia mulimuli ia te Ia ma faia mea Na te faia. O le a se mea Na te faia? I soo se tulaga lava, Na te tuuto atu Lona ola e auauna atu ai ma faamanua i isi. E tatau foi la ia te oe. Tuu atu oe lava e auauna atu i isi—ma ia tuputupu ae ma alualu i luma ina ia sili atu lou tuuina atu o oe lava! Manatua le ala na tuputupu ae ai Iesu i Lona talavou: Na ia “tupu le poto ma le tino, ua alofagia o ia e le Atua atoa ma tagata” (Luka 2:52).

O se vaega o le mulimuli i le Faaola o le atamai lea ma ola maloloina faaletino i lou talavou. O lenei mea e manaomia ai lou galue malosi ma faia e le aunoa le mea sili



E O UMIA LE PERISITUA ARONA:**Mulimuli ia lesu Keriso e ala i le**

- tatalo i aso uma ma suesue i le talalelei
- usiusitai
- saili le finagalo o le Atua

Faatautaia o sauniga o le perisitua, e pei o le

- faamanuiaina o le faamanatuga
- papatisoina o isi

Auauna atu i taimi uma e ala i le

- faamalolosia o aiga ma uso o le korama
- laveaiina o tagata ua le o toe toaaga mai
- auauna atu i tagata e le tagolima

E MAFAI FAAPEFEA ONA OU SAUNIA INA IA:**Maua le Perisitua Mekisateko****Maua faamanuiaga o le malumalu****Auauna atu i se misiona****Avea o se tane ma tamā**



E te mulimuli ia Keriso pe a e sailia le finagalo o le Atua i le aluga o le aso e taiatalaina ai lau auauanaga ma galue i uunaiga faaleagaga na e mauaina.

e te mafaia (tagai MF&F 4:2). O le a fafia le Atua ia te oe ao e faalatalata atu ia te Ia e ala i le tatalo i aso uma, suesue i le talalelei, usi-usitai, ma auauana atu. O le a fafia isi ia te oe ao e agalelei atu ma faamaoni i lou aiga ma avea ma uo faaKeriso i tagata uma.

Ia manatua sa faataunuina e le aunoa e Iesu le finagalo o le Tama. E te mulimuli ia Keriso pe a e sailia le finagalo o le Atua i le aluga o le aso e taiatalaina ai lau auauanaga ma galue i uunaiga faaleagaga na e mauaina.

Faatautaia o Sauniga o le Perisitua

O sauniga o le perisitua e manaomia mo fanau uma a le Atua ma e faamanuia tutusa ai Ona atalii ma afafine. Mai lava i le taimi sa avea ai oe ma se tiakono, sa e fesoasoani e faatautaia se sauniga o le perisitua e ala i le tufaina o le faamanatuga. O le a faauau pea ona e faatautaia ia sauniga o le perisitua i le Perisitua Arona i se taimi mulimuli ane ao e saunia ma faamanuia le faamanatuga, papatiso, ma auai i le faauuina o isi o umia le Perisitua Arona.

Ina ia auai i sauniga paia, e tatau ona e mama. E mafai ona faaopoopo se mana sili faaleagaga o la outou amio mama i sauniga na e faatautaia. Taumafai ina ia agavaa i soo se auala e tauaoina ai ipu paia o le faamanatuga a le Alii (tagai MF&F 38:42). A e faia, e mafai ona e tu atu i luma o lau uarota po o paranesi o se sui moni o Iesu Keriso. O le a faamanuiaina i latou i lou naunautaiga e tausia feagaiga o loo e fesoasoani ia i latou e faafou.

Auauna Atu i Taimi Uma

I le avea ai ma se tasi e umia le Perisitua Arona, e te auauana atu. Saili avanoa i taimi

uma e auauana atu ai i lou aiga, uo, uso o le korama, ma isi. O mea uma lava e te faia i le perisitua o le a fesoasoani ia te oe e auauana atu ai i isi i le faaletino ma le faaleagaga. Mo se faataitaiga, afai e te fesoasoani i la outou epikopo po o le peresitene o le paranesi e ala i le auauana atu i se aiga o e faiaoga o aiga ai, o loo e aoaoina le auala e iloa ma taulima ai manaoga o isi. O le a e auauana atu foi i isi ao e aapa atu e faamalosia uso o lau korama ma laveai mai i latou ua le o toe toaaga mai, aoina ia taulaga anapogi e fesoasoani ai i tagata matitiva ma le tagolima, faia ni galuega faatino mo e mamai ma le atoatoa le malosi, aoao ma molimau atu ia Keriso ma Lana talalelei, ma faamama ia avega o e ua lotovaivai.

E te auauana atu ao e aoao atu ia lesona i sauniga o lau korama ma a outou afiafi faaleaiga. E te auauana atu ao e valaaulia tagata uma e o mai ia Keriso (tagai MF&F 50:29)—i le aiga, i lau korama, i le aoga, ma faifeautalai faamisiona, ma soo se nofoaga lava e te i ai.

Lou Lumanai

Talanoa ma ou matua po o faufautua i mea o le a e manaomia i ou matafaioi i le lumanai o se umia le Perisitua Mekisateko, faifeautalai, tane, ma tamā. Tusi i le avanoa o loo i ai nisi o na tiutetauave sili ma le auala e mafai ona e saunia ai mo na tiute-tauave i lenei vaitaimi ao e auauana atu i le Perisitua Arona. Atonu e foliga loftuina i le taimi nei, ae ia manatua o le auala sili e saunia ai o le faia lea o le mea o finagalo mai le Tama Faalelagi ia e faia i le taimi nei. Tau ina ia e maua le fafia ao e auauana atu i le taimi nei ma saunia ai mo lou lumanai faamamaluina. ■

O LE MANA E FAAMANUIA AI TAGATA UMA

O taitai o le *Ekalesia* ua aoaoina i tatou faapea o sauniga o le perisitua ma feagaiga o loo avanoa mo fanau uma a le Atua—alii ma tamaitai.



"O le perisitua o le mana ma le pule a le Atua ua tuuina mai mo le olataga ma faamanuiaga o tagata uma—alii, tamaitai ma tamaiti. . . .

"E i ai faamanuiaga faapitoa mai le Atua mo tagata agavaa uma o e ua papatiso, maua le Agaga Paia, ma aai ma feinu soo i le faamanatuga. Ua aumaia e le malumalu se malamalama ma le malosi faaopoopo, faatasi ai ma le folafolaga o le ola e faavavau [tagai MF&F 138:37, 51]."

Elder Neil L. Andersen o le Korama a Apostolo e Toasefululuu, "Mana o le Perisitua," *Liahona*, Nov. 2013, 92.



"Ua tuuina mai e sauniga ma feagaiga o le perisitua le avanoa tatou te mauaina ai le atoaga o faamanuiaga na folafola mai ia i tatou e le Atua, lea ua mafai ona o le

Togiola a le Faaola. Latou te faaauupegaina atalii ma afafine o le Atua i le mana, ma tuuina mai ia i tatou le avanoa e maua ai le ola e faavavau—ina ia toe foi atu i le afioaga o le Atua ma nonofa faatasi ma la i Lona aiga e faavavau."

Carole M. Stephens, fesoasoani muamua i le au peresitene aoao o Le Aualofa, "Pe o Tatou Iloa ea Mea ua Tatou Maua?" *Liahona*, Nov. 2013, 12.



"E taua tele mo i tatou le malamalama ua uma ona saunia e le Tama Faalelagi se auala mo Ona atalii ma Ona afafine uma e maua ai faamanuiaga ma faamalosia ai e le mana o le perisitua. E totonugalemu i le fuafuaga a le Atua mo Ana fanau agaga Lana lava tautinoga: 'O la'u galuega ma lo'u mamalu lenei—ia aumaia le tino ola pea ma le ola faavavau o le tagata' (Mose 1:39)."

Elder M. Russell Ballard o le Korama a Apostolo e Toasefululuu, "O La'u Galuega ma Lo'u Mamalu Lenei," *Liahona*, Me 2013, 19.



O LE AUMAIA O FAAMANUIAGA O LE PERISITUA I TOTONU O LOU AIGA



Saunia e
Bonnie L. Oscarson

O Le Peresitene Aoao
o Tamaitai Talavou

Pe a e tausia au
feagaiga, ua e
aumaia le mana
o le perisitua e
faamanuia ai
lou aiga ma le
auaiga.

Emafai faapefea e oe o se alii talavou po o se tamaitai talavou, e tusa lava po o le a le tulaga o lou aiga, ona faalagolago i le mana o feagaiga na e osia i le papatisoga e faamalosia ai lou aiga ma le auaiga? O le malamalamama i le matafaioi ma le taua o o tatou aiga i le fuafuaga a le Alii e mafai ona musuia ai i tatou e faamamaluina folafolaga na tatou faia e ala i le vaiai o tatou faia la tatou auaunaga sili ona lelei ma sili ona sagisagi fiafia i ai i totonu o o tatou lava aiga. Sei o tatou vaai i nisi o auala tatou te faalagolago ai i le mana o a tatou feagaiga e faamalosia ma auauna atu ai ia i latou o e e sili ona taua ia i tatou.

O Le a Faapefea ona E Tali Atu?

O le po o Aso Gafua, ma e i ai sau faaputuga o meaaoga. Ua e faalogo atu i lou tama ua valaau le aiga e faapotopoto mai mo le afiafi faaleaiga. O le a se mea e te faia?

Filifiliga A: E tali atu, "Se, Tama, e leai sou taimi mo lena mea i le po nei! E tatau ona ou suesue!"

Filifiliga E: E vave lava ona e fesoasoani e faapotopoto nai ou tei ma auai ma le fiafia i tatalo, musika, ma savali.

Pe a i Ai le Taitaiga o le Perisitua i le Aiga

Lagolagoina o ou matua e ala i le naunau e auai i afiafi faaleaiga, tatalo faaleaiga, ma le suesuega i tusitusiga paia o nisi o auala e faamalolosia ai le taitaiga faaleperisitua i lou aiga. E tele isi auala, e pei o le:

- Tatalo mo ou matua. (E mautinoa lava toetoe a tatalo i laua mo outou i aso taitasi.)
- Lagolago ou matua i o laua valaauga i le Ekalesia ma ofo atu e fesoasoani i le fale, ae maise lava pe afai ua pisi i laua i tofiga faapitao.
- Fesoasoani i ou matua e faafeiloai fai-aoga o aiga pe a la o mai, ona faalogo lea ma le faaaloalo i le la savali.



- Afai e i ai se malumalu i lo outou eria, ofo atu e te tausitama i ou tei laiti ina ia mafai e ou matua ona o i le malumalu ma auai i sauniga o le perisitua.

Ia manatua e le o na o matua e nafa ma le valaauliaina ma le faatumauina o le Agaga i lou aiga. E tele mea e mafai ona e faia e valaaulia ai le Agaga e ala i au amioga ma uiga faaalia. Pe o loo e faia lau vaega ina ia valaaulia le uunaiga a le Agaga i lou aiga?

Pe a Leai Se Taitaiga Faaleperisitua i le Aiga

O aiga uma e le foliga pe faagaoioia i le ala lava e tasi. Atonu o loo e i ai i se aiga toatasi se matua pe leai foi se tasi o loo umia le perisitua e pulefaamalumalu i lou aiga. O loo i ai pea le tele o auala e valaaulia ai le mana o le perisitua e faamalosia ai oe ma lou aiga. E i ai ni mea e tatau ona tatou faia uma lava, e tusa lava po o a o tatou tulaga:

- Ia faia tatalo faaletagata lava ia, suesue i tusitusiga paia, ma anapogi. O nei taumafaiga o le a fesoasoani ia te oe ina ia e malosi faaleagaga ma valaaulia ai le Agaga i lou olaga ma i totonu o lo outou lalolagi o uunaiga.
- Faaalu se taimi e faalautele ai ou vala-auga po o tofiga Faale-ekalesia, ma ia saunia mo lesona i Aso Sa. O le faia o lena mea o le a fesoasoani ia te oe ia e talitonu ai ia te oe lava ia ma faaalia le lagolagoina mo polokalama o le perisitua.

- Faaalia le faaaloalo mo tagata uma o lou aiga ma lagolago a latou gaoioiga anoa. O nei filifiliga e fesoasoani e faamalosia ai le aiga atoa.
- Faasoa atu i lou aiga mea e te aoao-inia ma faia i au vasega ma korama i le Ekalesia. O se auala lea aumaia ai aoaoga o le talalelei i le aiga.
- Saili ni auala e auauna atu ai ia i latou o loo siomia oe e ala i nai faatinoga faigofie o le agalelei.
- Fesoasoani i le fale e ala i le faia o galuega po o le fesoasoani atu i se uso po o tuafafine.
- Faaali atu le alofa faa-Keriso i lou aiga—o le a maua ai se aafiaga e tele atu i le fausiaina o sootaga malolosi faaleaiga nai lo soo se isi lava mea e mafai ona e faia.

O Le Faamamaluina o Au Feagaiga

E ala i le auauna atu, alofa, ma le faamalosia o o tatou aiga, ua tatou faamoni i feagaiga na tatou osia i le papatisoga e tutu o ni molimau a Iesu Keriso, ia tauria Ana poloaiga, ma faamalosia i latou o siomia i tatou. E mafai ona tatou faalagolago i le malosi o feagaiga o le perisitua e avea ma se faamanuiaga ma fesoasoani i o tatou aiga ma auaiga. *Perisitua, auau-naga, ma aiga* o upu e tatau ona fesootai e faavavau i o tatou mafaufau. O tagata o o tatou lava aiga e tatau ona numera tasi i la tatou faamuamua a o tatou sailia auala e auai ai i le galuega o le faaolataga. Pe a tatou faamalosia o tatou aiga, tatou te faamalosia foi le Ekalesia, o tatou nuu, ma le lalolagi. ■

“O le aiga o le totonugalemu lea o le fuafuaga a le Foafoa mo le taunuuga e faavavau o Lana fanau.”

“O Le Aiga: O Se Folafolaga i le Lalolagi,” *Liahona*, Nov. 2010, 129.



“O le mea e sili ona taua i le galuega a le Alii e mafai ona e faia o totonu lea o puipui o lou lava fale.”



O LE TALITONUINA OLE AGAVAA

Ou te fia talanoa faalauaitele atu e uiga i le auala e mafai ona maua ai se ituaiga faapitoa o le talitonuina.



Saunia e Elder
Jeffrey R. Holland
O Le Korama
a Aposetolo e
Toasifululua

Ola'u savali ia te outou o se savali o le faamoemoe ma le faamalosiauga i le taimi nei ma i o outou olaga atoa. O le tele ia o faafitauli i le lalolagi, ae e tofu lava ia augatupulaga ma vaitau ma faafitauli. Aua le popolevale i ai, ma aua ne'i faavaivai ai. O le a faatumulia ia tausaga a sau i avanoa matagofie ma faamanuiaga sili. O le a faaauau pea ona tatou maua le alualu i luma i le faasainenisi ma tekinolosi, vailau faafomai ma fesootaiga—o mataupu uma e faia le tele o mea e faatamaoaigaina ai o tatou olaga. Ua outou ola i se vaitau ua sili ona faamamaluina e lei iloaina muamua e le lalolagi, faatasi ai ma le tele o faamanuiaga o le aso ua oo mai i le tele o tagata i le salafa o le lalolagi nai lo se isi lava taimi muamua o le talafaasolopito. Ia manatua—e lei moemiti lou tinamatua i se masini tapeleti ao pei o ia o lou matua, ma e lei iloa e lou tamamatua ona ta se feau tesi. O lea, ia fiafia ai ma ola maloloina ma lelei.

Ou te tau atu lenei mea i se vaega ona o se tusiga sa ou faitau ai talu ai nei o loo tau mai ai o faamai o loo taatele i tagata talavou i le taimi nei e le o le mai suka po o le ma'i fatu po o le kanesa. (O na ituaiga o faafitauli e masani lava ona faapolopolo mo tagata o la'u tupulaga, ae le o outou.) Leai, sa lipotia

mai, o faamai o loo mafatia tele ai i latou i lo latou talavou ma le vaitausaga o le 20, o le masalosalo o le tagata ia te ia lava, fefe i le lumana, maualalo o le faatauaina o le tagata o ia lava, ma le le talitonuina o i latou lava faapea ma le lalolagi o loo siomia ai i latou.

E ui e fai si ou matua atu nai lo outou, ae ou te malamalama i na ituaiga o atugaluga aua o le tele lava o lo'u olaga talavou sa ou feagai ai foi ma tulaga o le le talitonuina o au lava ia. Ou te manatua le tauiviga mo ni togi lelei, ma le faamoemoe ia manumalo i se avanoa mo se sikolasipi, ma mafaufau pe aisea na foliga mai ai ua sili atu le talenia o isi i lena vaega nai lo au. Ou te manatua le tele o tausaga o tauvaga afeleti lea na ou taumafai ai ina ia taalo ma se talitonuga ina ia faamunuaina i taaloga a le aoga maualuga ma le kolisi, i le manao ma le faananau tele ina ia manumalo i se taaloga taua po o le manumalo i se suega siamupini lea na moomoo i ai le au. Ou te manatua faapitoa le leai o se talitonuga i teine, ma o le tele o taimi, o le popolega tele lea i alii talavou. Ou te matua faafetai i le tuuina mai e Sister Holland o se avanoa ia te au. Ioe, e mafai ona ou manatua ina mea uma e te manatua ina—ou te le mautinoa pe na faapefea o'u foliga pe sa taliaina au pe faapei le lumana mo au.



O lo'u faamoemoega iinei e le o le talanoaina o na faafitauli uma e feagai ma se tagata talavou lea o le a oo mai ai le masalosalo o le tagata ia te ia lava ma le leai o sina talitonuga, ae ou te fia talanoa faalauaitele e uiga i le auala e maua ai se ituaiga faapitoa lava o le talitonuina—o se talitonuga lea, pe a mauaina sa'o, o le a faia ai ni mea ofooftogia mo isi vaega uma o o tatou olaga, aemaise lava lo tatou faatauaina o i tatou lava ma le ala tatou te tagatagai atu ai i le lumanai. O le tuuina atu o lenei manatu, e manaomia ai ona ou faamatalaina se tala.

O Le Taua o le Agavaa Faaletagata Lava Ia

I le tele o tausaga ua mavae atu nei, a o le'i taitai valaauina au e avea ma se Pulega Aoao, sa ou auai ai o se failauuga i se konafesi a talavou matutua. Sa faaiuina le konafesi i se sauniga molimau, lea sa tu ai i luga se faifeautalai talavou aulelei ua maea lana misiona ma tuuina atu lana molimau. Sa lelei, mama, ma toafimalie ona foliga—e pei lava ona tatau ai ia foliga o se faifeautalai ua maea se misiona.

Ina ua amata ona tautala atu, na loimatā ona mata. Sa ia ta'ua lona agaga faafetai i le tu ai i le lotolotoi o se vaega maoae o le autalavou o le Au Paia o Aso e Gata Ai ma maua se lagona lelei e uiga i le olaga sa ia taumafai e ola ai. Ae na o le pau le mea na mafai ai ona maua lena lagona, o lana tala lea, ona o se aafiaga sa oo i ai o ia i ni nai tausaga ua mavae atu, o se aafiaga na mamanuina ai lona olaga e faavavau.

Ao nofo o ia i lana taavale mo sina taimi i le auala taavale o lona lava fale, ma mafaufau loloto ma lagonaina le faanoanoa, sa tamoe mai ma le popole lona tina e le lotu mai le fale.

Ona ia faamatalaina lea o le taimi sa foi mai ai i le fale mai se tafaoga faamasani ae lei leva ona faauuina o ia o se toeaina i le 18 tausaga. Sa i ai se mea na tupu i lena aso lea na le fiafia ai o ia. Na te lei faamatalaina auiliili mai, ae e le tatau foi ona ia faamatalaina i se nofoaga faitele. E oo mai i lenei aso ou te le iloa lava le tulaga o le mea na tupu, ae na ttau tele ia te ia aua na aafia ai lona agaga ma lona tulaga faatauaina faaletagata lava ia.

Ao nofo o ia i lana taavale mo sina taimi i le auala taavale o lona fale, ma mafaufau loloto ma lagonaina le faanoanoa moni mo le mea na tupu, sa tamoe mai ma le popole lona tina e le lotu mai le fale ma agai sao mai lava i lana taavale. I lena lava taimi sa tau atu [e le tina] ia te ia sa pa'ū le uso laitiiti o lenei alii i le fale, ma sa malosi le tau o lona ulu i lalo ma e foliga mai ua tau oso ai sona ma'i maliu. Sa vave ona valaauina e le tama le lotu le taavale a le falemai, ae e fai sina tuai o le taimi e oo mai ai le fesoasoani.

"Sau e fai se mea," sa tagi mai ai o ia. "E leai ea se mea a le tou Ekalesia e te faia i taimi faapenei? O loo ia oe le latou perisitua. Sau e fai se mea."

E lei malamalamana tele lona tina e uiga i le Ekalesia i lena taimi, ae sa ia iloaina se mea e uiga i faamanuiaga faaleperisitua. Ae ui o lea, ina ua manaomia lona faatuatua ma lona malosi i lena po e se tasi na te matuai alofa lava i ai,





sa le mafai ona tali atu lenei alii talavou. O le tauiviga ma lagona ma le fetuunaiga na ia lagonaina sa na faia—po o le a lava lena mea—sa le mafai ai ona ia alu atu i luma o le Alii ma ole atu mo le faamanuiaga lea sa manaomia.

Sa ia tamoe televave atu mai le taavale ma agai atu i le auala o le fale o se tamalii matua agavaa lea sa faauoina o ia i le uarota talu le liliu mai o le tama i le lua po o le tolu tausaga ua mavae. Sa faamalamalama atu, ma sa la taunuu i le fale ao lei taunuu atu ia fomai. O le faaiuga fiafia o lenei tala e pei ona faamatalaina i lena sauniga molimau o le tuuina atu lea i lena lava taimi e lenei tamalii matua o se faamanuiaga faaleperisitua matagofie ma mamana, ma mafai ai ona maua e le tamaitiiti na lavea le to'a ma se malologa ao lei oo i le taimi na taunuu atu ai le fesoasoani faafomai. O se malaga faatopetope i le falemai ma se suesuega auiliili iina na faaalia mai ai e leai ni tulaga faaleagaina tumau o i ai. Sa tea atu se tulaga faapopoleina o lenei aiga.

Ona fai mai lea o le faifeautalai ua maea lana misiona lea ou te talanoa atu ai: "E leai lava se tasi e lei fetaiai ma le mea sa feagai ma au i lena po o le a iloaina le maasiasi na ou lagonaina ma le faanoanoa sa ou oo i ai i le le lagonaina o le agavaa e faaaoga le perisitua sa ou umiaina. O se manatuaga sili atu ona tiga mo au ona o lou lava uso laitiiti lea sa manaomiaina au faapea ma o'u matua pele e le auai i le ekalesia o e sa popole ma o e sa i ai se aia e faamoemoeina ai ni mea e sili atu mai ia te au. Ae ao ou tu atu i o outou luma i le aso, ou te folafola atu ia te outou le mea lenei," o lana tala lea. "Ou te le atoatoa, ae mai lava i lena po ou te lei toe faia lava se mea e taofia ai au mai le alu atu i luma o le Alii ma le talitonuga ma ole atu mo Lana

"Mai i lena po ma isi po i luma atu ou te lei toe faia lava se mea e taofia ai au mai le alu atu i luma o le Alii ma le talitonuga ma ole atu mo Lana fesoasoani pe a manaomia," o lana tala lea.

fesoasoani pe a manaomia. O le agavaa faaletagata lava ia o se taua lea i lenei lalolagi o loo tatou ola ai," na ia faailoa mai, "ae o se taua o loo ou manumalo ai. Sa ou lagonaina le tamatamai lima o le tausalaga o faasino mai ia te au i se tasi taimi o lo'u olaga, ma ou te le o faamoemoe ina ia aua nei toe lagonaina pe afai e mafai ona ou faia soo se mea e uiga i ai. Ma, o le mea moni," na ia faaiu mai ai, "e mafai ona ou faia *mea uma* e uiga i ai."

Sa ia faamaeaina lana molimau ma saofai i lalo. O loo mafai pea ona ou vaai atu faalemafaufau ia te ia. O loo mafai pea ona ou vaai atu i tulaga sa matou i ai. Ma o loo mafai ona ou manatua pea le filemu atoa ma le faamomoloto lea na mulimuli mai i lana lauga ina ua maua e tagata uma sa i ai i le potu sina taimi e sailiili loloto teisi ai lona agaga, ma tauto malosi teisi ai ina ia ola i nei upu mamana na tuuina mai e le Alii:

"Tuu le amiomama e teuteuina ai ou mafaufauga e le aunoa; *ona solo malosi ai lea o lou lototeli i luma o le Atua;* ma o le a to ifo i luga o lou agaga le mataupu faavae o le perisitua e pei o le sau mai le lagi.

"O le a avea le Agaga Paia ma au soa e le aunoa, ma o lou tootoo o le a avea ma se tootoo le feliuliui o le amiontonu ma le upumoni" (MF&F 121:45–46; faaopoopo le faamamafa).

Olioli i le Agaga o le Atua

Au uo talavou pele, ia maua se olaga matagofie. Mafaufaufau i le mea sili ma faamoemoe i le mea sili ma ia faatuatua i le lumanai. O loo i ai se olaga maoae mo oe o i luma atu. E alofa lou Tama Faalelagi ia te oe. Afai o i ai ni mea sese ua faia, e mafai ona e salamo mai ai ma faamagaloina e pei lava foi o lenei alii talavou. O loo ia te oe mea uma e te ola ai ma fuafua ai ma talitonu i ai. O le mauaina o le faamioniga o lou mafaufaufau pe a tuua na o oe ma mea e te manatuaina o le a mafai ai ona e lagonaina le Agaga o le Atua i se auala e sili ona patino. Ou te manao ina ia e olioli i lena Agaga, ia lagonaina pea e le aunoa lena talitonuga i luma o le Alii. Ia tausia pea e mafaufauga mama le mama aiai o a tatou amioga i le asō ma a taeao ma le faavavau. ■

Mai se faeasaite a le autalavou na tuuina atu i le aso 31 o Tesema, 2006.

O LE FAITOTOA ma LE ALA

O sauniga ma feagaiga o le perisitua e tuuina i tatou i le ala o le ola faavavau ma faamanuiaina i tatou i le malosi o loo tatou manaomia nei lava.

Oloo tatou sailia uma le ola faavavau, o lona uiga o le faaolaina ma faaeaina i le tikeri aupito maua-luga o le malo selesitila, lea e mafai ona tatou ola ai i luma o le Tama Faalelagi o ni aiga.

I le faaopoopo atu i le faatuatua ia Iesu Keriso ma le salamo, o sauniga ma feagaiga o le perisitua e faatagaina i tatou e ulu atu i le ala e tau atu i le ola e faavavau. Tusa lava po o anafea na e ulu ai i totonu o lenei ala po o fea foi o e i ai i luga o le ala—pe na e fanau i le Ekalesia pe na e liliu mai mulimuli ane, pe sa e malosi i le lotu i lou olaga atoa pe o lena faatoa e toe foi mai i le Ekalesia—e mafai ona e alualu i luma i le ala a o e tauai atu i au feagaiga ma le mea e mafai ona e faia e maua ai ma tausia ai.

Ma e taua le iloa o sauniga ma feagaiga o le perisitua e le na o le ofoina mai o le folafolaga o se lumanai mamalu. Latou te tuuina mai foi ia i tatou le malosi, faamafanafanaga, ma le lagolago tatou te manaomia nei ina ia mulimuli i le ala, ma tumau ai e oo i le iuga i le amiotonu. ■



"O le pule o le perisitua i le Ekalesia e tuuina mai ai sauniga paia ma feagaiga e fusia **faatasi ai aiga** ma faaagavaaina ai i tatou taitoatasi e **toe foi atu i le Atua le Tama ma Iesu Keriso** i le malo selesitila.

O nei sauniga e aumaia ai le filemu aua o feagaiga ia ma le Alii."

Elder Quentin L. Cook o le Korama a Aposetolo e Toasefululu, "O Le Filemu o le Tagata Lava Ia: O Le Taui Lea o le Amiotonu," *Liahona*, Me 2013, 34.

ALA E TAITAI
ATU I LE OLA
E FAAVAVAU
(TUMAU E OO
I LE IUGA)

Tagai 2 Nifae 31

Faitotoa

PAPATISOGA

Faamanatuga—
faafouina faalevaiaso
o le feagaiga o le
papatisoga

MEAALOFA O LE AGAGA PAIA

FESOASOANI I LE ALA

SAUNIGA MA FEAGAIGA TAU
FAAFOUNA MA LE FAAMALOSIA O SAUNIGA

Faamanuiaga
faapeteriaka—taitaiga
faapitoa o le tagata
lava ia ma faamanuiaga
folafolaina

FAAAEINA MA LE FAAUUGA
I LE PERISITUA (MO ALII TALAVOU)



FAAAEEGA PAIA O LE MALUMALU

Faamanuiaga mo e
mama'i—fesoasoani
ma le faamalologa



Faamanuiaga faatamā ma isi
faamanuiaga o le faamafanafanaga
ma fautuaga—le filemu ma le
taitaiga pe a manaomia



FAAMAUGA FAALEMALUMALU



"O le tumau ai i le ala
o le talalelei o feagaiga,
poloaiaga, ma sauniga o
le a **puipuia** ai i tatou
ma **saunia** ai e faatino
le galuega a le Atua i
lenei lalolagi."

Elder Robert D. Hales o le Korama a Apostolo
e Toasefululu, "Tutu Malolosi i Nofoga Paia,"
Liahona, Me 2013, 49.



"A o outou auai ma le
agavaa i sauniga o le
perisitua, o le a tuu atu
ia te outou e le Atua
le malosi silisili,
filemu, ma le vaa-
iga e faavavau."

Elder Neil L. Andersen o le Korama a Apostolo
e Toasefululu, "Mano o le Perisitua," *Liahona*,
Nov. 2013, 95.

Tusitusiga Paia—taitaiga ma
aoaoga e mauaina o se vaega o le
feagaiga i le va o le Atua ma Lona
nuu (tagai i le MF&F 84:57)

Tatalo—"Ua ofo mai e [Le
Matai] ia i tatou le feagaiga e
'manatua pea o la' ma le lapataiga
e 'tatalo e le aunoa' ina ia tatou
tuu atu lo tatou faalagolago ia te
la, pau lea o lo tatou saogalemu"
(Peresitene Henry B. Eyring, Feso-
asoani Muamua i le Au Peresitene
Sili, "Aunoa," *Ensign*, Oke. 1999, 9).

Auauna Atu—faataunuina o
a tatou feagaiga e ala i le auauna
atu i le Atua ma Ana fanau, e
aofia ai valaauga, malumalu ma
galuega o talafaasolopito o aiga,
faasoaa atu le talalelei, auaunaga
faafaifeatalai

Salamo—manatuaina o a tatou
feagaiga ma faalatalata atili i le
Faafola pe a tatou se ese, o nisi
taimi e aofia ai le fesoasoani mai
taitai perisitua



OLA E FAAVAVAU

(MALO SELESITILA FAATASI MA AIGA)

“O le a se mea e tatau ona ou faia pe a aliae mai se mataupu i le aoga e le tusa ai ma aoaoga a le ekalesia, e pei o le faapau pepe?”

Etele auala e tali ai—pe leai—e faalagolago i le tulaga. Muamua, mafaufau e uiga i le mea e tupu pe afai e te tali po o le aua nei faia se upu. Afai o lou filemu o le a mafua ai ona mafaufau isi ua e ioe i se mea e te iloa e sese, atonu e te manao e sue se auala faigofie e faailoa atu ai lou le taliaina. Afai e te manatu o ou manatu ua na o se mafuaaga o finauga, ona e mafai lea ona sue se isi taimi e talanoa ai. Ae ui i lea, afai e faaaloalo le tasi i le isi i lau vasega ma o lo o fesili mai le faiaoga mo le auai atu, e mafai ona e tatalo mo le musumusuga ona faamalamalama atu lea o ou talitonuga.

E mafai foi ona e saunia muamua pe afai e te iloa o le a talanoaina e lau vasega autu patino. E le gata i tusitusiga paia ma luaga o konafesi i le autu, vaavaai i *Faamaoni i le Faatuatua, o Mataupu Faavae o le Talalelei*, po o le *Mo le Malosi o le Autalavou*. E mafai foi ona e faataitai le faamalamalamaina o le autu i le afiafi faaleaiga. Pe a e sauni, talanoa i lou faiaoga po o tamaiti o lau vasega.

O le ala e te tali atu ai e taua e pei o *mea* e te fai atu. Ia faaaloalo ma taumafai e aua le faaaogaina o faaupuga a le Ekalesia. O tamaiti o lau vasega o le a le malamalama i le taimi lava e te fai atu ai, “Sa aoaoina au e se faufautua o Tamaitai Talavou i la’u uarota faapea . . .”

O le mea e sili ona taua e mo oe ia iloa le mea o loo aoao mai e le Ekalesia ma le mea o loo tau atu e le Agaga Paia ina ia le faaseseina oe e ala i mea sese e mafai ona e faalogo pe faitau i ai i le vasega.

Faasa'o le Aoaoga Faavae Sese

Tatou te auai i se Ekalesia e mafaufau-faaafaifeatalai lea e valaauina uma ai i tatau e talai atu; o le mea lea, e le mafai ona tatou faatagaina aoaoga faavae sese e faasalalauina atu ai. I ia tulaga, e tatau ona tatou tau atu ina ia faasa'o ai soo se aoaoga faavae sese ma fesoasoani i tagata ia malamalama i le vaaiga a le talalelei toefuataiina i le mataupu.

David M., 16 tausaga, Kasaï-Occidental Itumalo, Ripapelika Temokarasi o Congo

Ia Faaaloalo

Ou te lagona e tatau ona ou faasoa atu ou manatu i se auala faaaloalo ma ta'u atu foi pe aisea ou te talitonu ai i ai. Ou te le manatu e tatau ona ou faia isi ia latou iloa ou manatu, ae ou te manatu e tatau ona latou iloa le itu o loo ou tu ai ini autu faapitoa ma malamalama i o'u manatu.

Sabrina S., 16 tausaga, Oregon, ISA



Ia Faaaloalo

E taua le faalogo mai o isi ia i tatou, ae e matuai taua foi le faaaloalo i talitonuga o isi. Aua le finau. O le finau e faatupuina ai fili ma le le mautonu. Afai e tulai mai se manatu e le tusa ai ma la tatou tapuaiga, ia tumau le toafilemu, mataala, ma faaaloalo, ma aua nei galo e faalogo i le Agaga. E i ai mea tatou te le malamalama ai ae malamalama ai le Atua. E tatau ona tatou faalogo ma aoao mai Lona Agaga.

Hannah M., 18 tausaga, Iuta, ISA



Faasoa Atu Mea o loo Aoao Atu e le Ekalesia

Ou te taumafai e tali ia fesili i le mea sili ou te mafai aua e le iloa e a'u uo ma faiaoga, sei vagana ua ou tau atu ia i latou, po o le a le tulaga o le Ekalesia i lena autu. O le faia o lena mea, e mafai ona latou iloa ai mo le fesootaiga i le lumanai, ma o le a e manuia faaleagaga. Manatua, "Ia pupula atu lo outou malamalama i luma o tagata, ina ia latou iloa la outou amio lelei, latou te vivii atu ai i lo outou Tama o i le lagi" (Mataio 5:16).

Joshua M., 16 tausaga, Maniseta, Egelani



Fesoasoani i Isi ia Mafaufau e uiga i le Mea e Sa'o

Faasoa atu ou lagona ma le faamaoni. O le tele o autu i le aoga, e pei o le faapau pepe, e matuā finauina lava, o lea, aua le maasiasi e ta'u atu. O se avanoa lelei e faasoa atu ai le talalelei ma tulaga faatonuina tatou te talitonu i ai. Afai e faasoa atu ou talitonuga, e mafai ona e fesoasoani i tagata ia mafaufau e uiga i le mea e sa'o.

Madison R., 14 tausaga, Karolaina i Matu

Iloa le Tulaga o le Ekalesia



Iloa le Tulaga o le Ekalesia

Sa ou i ai i se aoaoga sa masani ona talanoaina ai ni autu e feteenai. O le mea muamua lava e fai o le faaaloalo i talitonuga o isi, e pei ona e faamoe-moeina mai au uo i le vasega. Afai o le autu e matuai feteenai lava ma le Ekalesia, ia lagonaina le saolotoga e ta'u atu lou manatu. E le tau ta'ua fua le Ekalesia i lau tali. E ui i lea, ia mautinoa ia iloa le tulaga o le Ekalesia i nei mea.

Joseph Z., 18 tausaga, Maryland, ISA

Aloese i Finauga

Ou te faamatala atu lou manatu, ma puipua a'u mataupu ma aoaoga faavae o le Ekalesia, ma faaaloalo i manatu o isi. O le a ou le finauvale, lea o le a tuliese ai le Agaga, lea e mafai ona uunaia isi i se auala lelei.

Daiana V., 15 tausaga, Buenos Aires, Atenitina



TU MAUSALI

"O la tatou matafaioi o le tau atu lea o lo tatou tulaga e ala i faamatalaga, faatauanau faaleuo, ma mea moni. O la tatou matafaioi o le tutu mausali ma le le mafaagaetia i mataupu lelei o le aso ma mataupu faavae e faavavau o le talalelei, ae ia aua nei finau ma se tagata po o se faalapotopotoga. O finauga e fausia ai puipui ma ati ai papupuni. O le alofa e matala ai faitotoa."

*Elder Marvin J. Ashton (1915–94) o le Korama a Aposetolo e Toasefululua, "Leai se Taimi mo Finauga," *Ensign*, Me 1978, 8.*

Ia Manatua Po o Ai o loo E Sui ai

Pe a feagai ai ma nei tulaga, taumafai e manatua atonu o isi e le mafai ona faasoa mai lagona e tutusa ma oe i le mataupu. Aua le soona mateletele pe faamalosi atu, ae aua le fefe e puipui ou talitonuga. Ia manatua, o loo e fai ma sui o Keriso.

Madeline K., 16 tausaga, Wyoming, ISA

FESILI O LE A SOSOO MAI

"E mafai faapefea ona ou lagona le mafanafana e talanoa atu ai i lo'u epikopo e uiga i faafitaluli po o ni atugaluga?"

Auina mai lau tali ma, afai e manaomia, se ata manino lelei ae lei oo i le aso 15 o Me, 2014, i liahona@ldschurch.org pe i-meli mai (tagai i le tuatusi i le itulau e 3).

E ono faapupuina tali mo le uumi po o le manino.

O le faamatalaga ma le faatagaga o loo i lalo e tatau ona aofia mai i lau i-meli po o le tusi: (1) igoa atoa, (2) aso fanau, (3) uarota po o le paranesi, (4) siteki po o le itu, (5) lau faatagaga tutsusia, ma, afai e ititi ifo i le 18 ou tausaga, o le faatagaga tutsusia a ou matua (e talia foi le i-meli) e lolomiina ai lau tali ma lou ata.


LESONA I ASO SA
 Autu o le Masina Lenei:
**O Le Liliuese ma
le Toefuataiga**

**SAO pe
se
SESE**

O nisi taimi o le iloaina o le upumoni mai mea sese e faigata, ae ua tuuina mai e lo tatou Tama Faalelagi ia i tatou meaalofa mamana e fesoasoani ia i tatou e iloa ai le eseesega i le va o upumoni a le Atua ma pepelo a Satani.

Saunia e David A. Edwards

Mekasini a le Eklesia

Afai na e faia muamua se suega o ni fesili sao-pe-sese, e te iloa ai o nisi taimi e faigata ona vaaia se mea sese. E faapena foi, i fesili tetele o le faatuatua, talitonuga, ma le olaga i aso uma, e ui e taua tele le mafai ona e iloa le eseesega i le va o le mea e moni ma le mea e sese, e le masani ona faigofie.

Ae peitai, tatou te le manaomia le matatau e pei oni tagata e fai le suega ae le'i saunia. Ua faamanuiaina i tatou e lo tatou Tama Faalelagi i le tele o meaalofa e fesoasoani ia i tatou e iloa Ana upumoni ma pepelo a le fili.

O Ituaiga Eseese o Mea Sese

Muamua, ina ia faamaninoina se manatu, o se suega laitiiti lenei o le sao-pe-sese mo oe:



1

E lanu meamata le masina.

SAO

SESE

Fai mai Neil Armstrong, o le tagata o le vateatea o le Apollo 12 ua avea ma tagata muamua e savali i luga o le masina, faapea o le mea na tupu o se "laasaga maoae mo tagata."

SAO

SESE

2



3

Polokalama o le Pulega o le Au Suesue i le Vateatea a Amerika (NASA) e lei mafai ona alu i Mars i le 1969, o lea sa latou o ai i le masina.

 SAO SESE

O matagi o le lalolagi, malosiaga faaeletise, ave o le la, ma isi faalavefau semanu e faafaigata ai le tulaueleele o tagata i le masina, faatasi ai ma ata na pueina na foliga mai ua suia ma o molimau patino na eseese nisi faamatalaga, o le mea lea masalo na faafoliga mai e le malo o le I.S. le mea atoa.

 SAO SESE

4

Pepelo o Ona Po Nei

Pe a oo atu i mea e aafia ai ou mafaufauga, talitonuga, filifiliga, ma amioga—o mea e i ai taunuuga malolosi e faavavau—e tauia le vaavaai mo ituaiga eseese o mea sese, talu mai o Satani, “o le tama o pepelo uma” (2 Nifae 9:9), o le a faaaogaina soo se auala e mafai ona ia faaseseina ai i tatou. O nisi nei o faataitaiga o auala ua ia faia ai i aso nei, faapea foi ma faataitaiga o auala e mafai ona tatou tali atu ai ma le upumoni.

O le tali i fesili taitasi o le *Sese*, ma o nei fesili e fai ma sui o nisi ituaiga autu o mea sese e te ono fetaiai i ai.

O le fesili 1 o se *pepelo faigofie*, o se mea sese matilatila. O le fesili 2 e *sao se vaega*, lea e faatogafiti, talu ai e faasoa se tasi po o le sili atu o upumoni ma se mea sese (o le Apollo 11, ae le o le Apollo 12—maua oe!). O le fesili 3 o loo i ai se *feteenaiga sese*, po o se tulaga lea na o le lua filifiliga e tuuina mai ae le na o le pau na o filifiliga (e mafai lava ona filifili le NASA e le alu i se mea, mo se faataitaiga).

O le fesili 4 o se *finauga “talafeagai”*, lea e faaaogaina ni faamaoniga se tele ina ia mafai ona taitai atu ai i se faa-iuga ua faapitoa le faaseseina.

Upu Lē Moni Faigofie

Manatu Sese:

O ponokarafi po o ata leaga o se mea masani ma e le afaina ai se isi.

O Fea e Taitai Atu I Ai (Pepelo Lapoa):

Alu i ai ma matamata i ponokarafi.

O Le Upumoni:

O ponokalafi e fafilogiaina ai la tatou vaaiga e uiga i tulaga feusuai, e mafai ona avea ma vaisu, matuui faatamaia ai i tatou faaleagaga, ma e mafai ona faatamaia ai mafutaga.

Afa Upumoni

Manatu Sese:

O tagata taitoatas i tulaga ese ma e mafai ona ola e pei ona ia filifili, o lea o le ala e te manatu ai ma faailoa atu oe lava ia o le mea e aupito sili lea ona taua i lou olaga.

O Fea e Taitai Atu I Ai (Pepelo Lapoa):

E tatau lava ona tuu atu i le Atua po o le Ekalesia e tau mai ia te oe le auala e ola, o lea ia alu loa ma faia mea e te manao ai pe afai e te maua ai se lagona lelei.

O Le Upumoni:

O i tatou taitoatas i se atalii tulaga ese o le Tama Faalelagi, o le e manao ia i tatou ina ia avea i tatou ma tagata sili, ma ia avea faapei o la. O le ususitai i Ana poloaiga e fesoasoani ia i tatou e maua ai le olioli sili.

Pe faapefea ona iloa le Upumoni

O fea la e maua mai ai se vaaiiga e sili atu ona atoatoa o le upumoni? E faapefea ona mafai ona tatou vaai e ala atu i mea sese? O nisi nei o meaalofa mamana a le Tama Faalelagi ua tuuina mai ia i tatou e iloa ai le upumoni mai le mea sese.

- **O Le Malamalama o Keriso.**

“O le Malamalama o Keriso . . . ua uunaia ai ni tagata uma i le lalolagi atoa e iloa ai le upumoni mai mea sese, sao mai le sese. E uunaia lou mafaufau.”¹

- **O le Agaga Paia.** “Le Agaga lea e tupu mai ai le upu moni . . . ma faailoa ia te outou mea e oo mai” (Ioane 16:13).

- **Tusitusiga Paia.** “E faaaoga e le Atua tusitusiga paia e faasao ai mafaufauga sese, uputuu sese ma le agasala ma ona aafiaga matautia.”² O le Tusi a Mamona e sili ona taua i lenei tulaga, aua e “faailoa ai fili o Keriso. E ta’usese ai mataupu sese ma tuu ai i lalo finauga. (Tagai 2 Ni. 3:12.)”³

- **Perofeta o Aso Nei.** “O le tiute-tauave [o se perofeta] o le faailoa atu o le finagalo o le Atua ma Lona uiga moni i tagata. . . . O se perofeta e tausalaina le agasala ma valoia atu lona taunuuga.”⁴

- **Aoaoga.** “O se Au Paia . . . saili i le aoaoina, e ala lava lea i le suesue ma le faatuatua foi. Aoaoga . . . ua mafai ai e se tasi e iloa le upumoni mai mea sese, ae maise lava e ala i le suesue-inia o tusitusiga paia. (Tagai MF&F 88:118.)”⁵

Feteenaiga Sese (Na o le Lua Filifiliga)

Manatu Sese:

E talai e le Ekalesia le tetee atu i tifiga faapitoa o le olaga; o le mea lea, e le onosaia ma inoino i tagata—e le taliaina ma agaalofa.

O Fea e Taitai Atu I Ai (Pepelo Lapoa):

Talu ai o le Ekalesia e le onosaia ma inosia, e tatau ona faitioina, tauemuina, ma tausalaina, lea e tatau ai ona e taofia le mafuta i ai.



O le le taliaina o tifiga a se isi tagata e le tutusa ma le inoino ma le onosaia. E mafai ona tatou faaalia le alofa, faaaloalo, ma le agalelei i tagata uma—e aofia ai tagata e masani o latou olaga i le faasagatau i tulafono a le Atua—a o tumau faamaoni i le Atua ma Ana poloaiga.

Finauga “Talafeagai”

Manatu sese:

O nisi mea i le Tusi a Mamona e teena e faamaoniga faasaienitisi i le taimi nei, ma o faamatatalaga o le ala na faaliliu ai e le ogatusa, o lea, masalo na faatupu uma lava e losefa Samita pe na kopi mai i se mea.

O Fea e Taitai Atu I Ai (Pepelo Lapoa):

E le moni le Tusi a Mamona ma o losefa Samita e le o se perofeta, o lea ia taofi le fegalegalei ma le Eklesia.



O le faasaienisi ua faamaonia mea e tele i le Tusi a Mamona, ma o “faamaoniga” e faasaga i ai e le moni. Ae o le faamaoniga au-pito sili ona taua mo lena tusi o le molimau a le Agaga e ta’u ai ia te oe e moni ma o losefa Samita o se perofeta moni.

E ui lava atonu o taimi uma e le faigofie ona tali *Sao pe Sese* pe a feagai ma ni manatu eseese uma iina, o meaalofa ua tuuina mai e le Tama Faalelagi ia te oe e mafai ona e iloa ai le upumoni. ■

FAAMATALAGA

1. Richard G. Scott, “Filemu o le Lotofuatiaifo ma le Filemu o le Mafaufau, *Liahona*, Nov. 2004, 15.
2. D. Todd Christofferson, “O Le Faamanuiga o Tusitusiga Paia,” *Ensign* ma le *Liahona*, Me 2010, 32–35.
3. Ezra Taft Benson, “O Le Tusi a Mamona o le Afioga a le Atua,” *Liahona*, Aokuso 1975, 22.
4. Taiala i Tusitusiga Paia, “Perofeta,” scriptures.lds.org.
5. Russell M. Nelson, “Ua Faapea Ona Ta’ua La’u Ekalesia,” *Ensign*, Me 1990, 16.

AUAI I LE TALANOAGA

O Mea e Mafaufau Loloto i ai mo le Aso Sa

- Ua faapefea ona fesoasoani le Tama Faalelagi ia te oe ia iloa le upumoni ?
- E mafai faapefea ona e faafoeina mea sese?
- E mafai faapefea ona e uunaia isi e sailia le upumoni?

O Mea E Te Ono Faia

- I le ekalesia, faaso atu pe na faapefea ona e talitonu e moni le talalelei toefuataiina.
- I luga o ala faasalalau faaaga-fesootai, faaso atu se upumoni ma le ala na e iloa ai.



Saunia e Elder Enrique R. Falabella
O Le Fitugafulu

“E Matua Faigofie Lava, Tamamatua!”

“E suesue outou i tusi; aua ua outou manatu tou te maua ai le ola e faavavau: o tusi foi ia o loo molimau ia te au” (Ioane 5:39).

Ou te fiafia i le Tusi a Mamona ma lo'u Faaola o Iesu Keriso. I se tasi aso na ou fesili ai i le tama teine a lou afafine o Raquel po o le a sona manatu e uiga i le faia o se sini e faitau le Tusi a Mamona. Faatoa aoao talu ai nei Raquel ia iloa faitau.

“Ae, Tamamatua,” sa ia fai mai ai, “e faigata tele. O se tusi telē.”

Ona ou fai atu lea i ai e faitau mai se itulau ia te a'u. Sa ou aumaia se uati e mafai ona taofi ma taimi ai lana faitauga. Sa na o le tolu minute na ia faitau ai le itulau.

Matou te faitauina i le gagana Sipaniolo le Tusi a Mamona, ma o le lomiga Faasipaniolo o le Tusi a Mamona e 642 itulau. Sa ou fai atu ia te ia e 1,926 minute na te faitau ai le tusi atoa.

O lenei mea atonu na atili fefe ai o ia, o lea na ou vaevaeina ai lena numera i le 60 minute. Sa ou fai atu o le a moomia tau lava o le 32 itula e faitau ai le tusi. O le a itiiti ifo nai lo le aso ma le afa!

Ona ia fai mai lea ia te a'u,

“E matuai faigofie tele lena mea, Tamamatua!”

Sa manaomia e Raquel, lona tuagane, o Esteban, ma isi fanau a ma fanau sina taimi e umi atu e faitau ai le Tusi a Mamona. Ona a matou faitauina, e tatau ona matou faaaluina se taimi e tatalo ma mafaufau ai e uiga i le mea na matou faitauina.

E pei lava o Raquel ma Esteban, e mafai ona tatou aoao uma e fiafia i tusitusiga paia. Ona mafai lea e i tatou taitoatasi ona alaga atu: “Ua matua suamalie au afioga i lou gutu! ua sili i lo le meli i lo'u gutu!” (Salamo 119:103.). ■

Mai se saunoaga i le konafesi aoao ia Aperila 2013.





Saunia e
Carole M. Stephens

Fesoasoani Muamua i
le Au Peresitene Aoao
o le Aualofa

FOLAFOLAGA



Ina ua maliu le tama o lo'u toalua, sa faapopotopo faatasi lo matou aiga e faafeiloai tagata na o mai e faaalia o latou faaalaoaloga. I le afiafi atoa, a o matou faatasi ma aiga ma uo, sa masani ona ou matauina le atalii o le ma tama teine e 10-tausaga-le-matua, o Porter, o loo tu i talaane o lo'u tina faaletulafono—lona tinamatua. O nisi taimi sa ia tu i tua atu o ia, ma vaaia o ia. O se tasi taimi sa ou vaaia lona lima o uu mai le lima o lona tinamatua. Sa ou vaai ia te ia ao pōpō ona lima, tuu atu ia te ia ni nai opo laiti, ma tutu i ona tafatatafa.

Mo ni nai aso ina ua mavae lena aafiaga, sa le mafai ona ou tuuese lena ata mai lo'u mafaufau. Sa uunaia au e auina atu ia Porter se i-meli. Sa ou tau atu ia te ia le mea na ou vaaia ma lagonaina. Sa ou faamanatu atu foi ia te ia **feagaiga** na ia faia ina ua papatisoina o ia, ma sii mai upu a Alema i le Mosaea mataupu 18:

“Ma o lenei, ona ua outou mananao e o mai i le lafu a le Atua, ma ta’ua o ona tagata, ma ua outou loto e tauave avega a le tasi, ina ia mama;

“Ioe, ma outou loto e faanoanoa

faatasi ma e e faanoanoa; ioe, ma faamafanafana atu ia te i latou o e e manaomia le faamafanafanaga, ma tutu o ni molimau a le Atua i taimi uma ma i mea uma, ma i nofoaga uma atonu tou te i ai, seia oo lava i le oti, . . . ina ia mafai ona outou maua le ola e faavavau—

“. . . Afai o le manao lea o o outou loto, se a se mea tou te tetee ai i le papatisoina i le suafa o le Alii, o se molimau i ona luma ua outou ulu atu i se **feagaiga** faatasi ma ia, o le a outou auauna atu ia te ia ma tausi ana poloaiga,

A PORTER

ina ia mafai ona liligi atili tele mai e ia lona agaga i luga o outou?" (fuiupu 8–10).

Sa ou faamatala atu ia Porter na aoao mai Alema e tatau ia i latou o e mananao e papatiso ona naunau e auauna atu i le Alii e ala i le auauna atu i isi—mo lou olaga atoa! Sa ou fai atu: "ou te le iloa pe ua e iloaina, ae o le ala sa e faaalia ai le alofa ma le popole mo Tinamatua o le tausiga lea o au **feagaiga**. Tatou te tausia a tatou **feagaiga** i aso uma pe a tatou agalelei atu, faaali atu le alofa, ma fetausiai le tasi ma le isi. Ou te fia manao ia e iloa ua ou

mitamita lava ia te oe i le avea ma se e **tausi feagaiga!** Pe a e tausia **feagaiga** na e osia ina ua e papatiso, o le a e saunia ina ia faauuina i le perisitua. O lenei **feagaiga faaopoopo** o le a atili tuuina atu ai ia te oe avanoa e faamanuia ma auauna atu i isi ma fesoasoani ia te oe e saunia ai mo **feagaiga** o le a e osia i le malumalu. Faafetai tele lava mo le avea ma se faataitaiga lelei ia te au! Faafetai mo le faaalia mai ia te au o foliga o se tagata **tausi feagaiga!**"

Na toe tali mai Porter: "Tinamatua, faafetai mo le savali. O taimi uma ou

O le feagaiga o se folafolaga i le va o oe ma le Tama Faalelagi.

te fusiina ai Tinamatua, ou te lei iloa o loo ou tausia au **feagaiga**, ae sa ou lagona le mafanafana i lo'u loto ma sa matuai lelei lava le faalagona. Ou te iloa o le Agaga Paia lea sa i lo'u loto."

Sa ou lagonaina foi le mafanafana i lo'u loto ina ua ou iloaina ua malamalama Porter afai na te tausia ana **feagaiga**, o le a ia "maua pea le Agaga [o le Tama Faalelagi] e faatasia ma [ia]" [MF&F 20:77]. O se folafolaga na maua mai e ala i le mauaina o le meaalofa o le Agaga Paia. ■

Mai le "E I Ai Se Mafuaaga Sili mo i Tatou e Olioli ai," Liahona, Nov. 2013, 115–16.



AVEA MA SE TAGATA TAUSI FEAGAIGA!

Pe a ou papatiso,
ou te folafola atu e . . .

Faaali atu le alofa ma le agalelei,
Faamafanafana i latou o e faanoanoa,
Tausi poloaiga a le Tama Faalelagi,
Ma tau atu i isi e uiga i le Tama Faalelagi.

O le taui, ua folafola mai e
le Tama Faalelagi ia te au . . .

O le a ou maua pea le Agaga Paia!
Sainia,



Aoao atili e uiga i le autu o le
Peraimeri o le masina lenei!

O Le Aiga e Totonugalemu i le Fuafuaga a le Tama Faalelagi



Saunia e Jan Taylor

E fiafia Misha i le fausiaina o olo mai poloka, ae o nisi taimi e le fiafia o ia pe a salalau poloka i le eleele. Ona ia aoaoina lea o se mea faalilolilo. Pe a ia faaaogaina ni poloka e sili atu i le pito i lalo o lana olo, e maua ai e lana olo se faavae e sili atu le malosi. Sa manaomia le onosai ma le faataitai soo, ae e lei umi ae mafai ona ia fausia ni olo e lei faigofie ona pauu i lalo.

E pei lava ona aoao Misha e fausia ni olo e sili atu le malolosi, e mafai ona tatou aoaoina e fausia se aiga e sili atu le malosi. O aiga o se vaega taua tele i le fuafuaga a le Tama Faalelagi mo i tatou. Ae tatou te le'i fananau mai, sa tatou ola o ni atalii ma ni afafine agaga o le Tama

Faalelagi. Ina ua oo i le taimi tatou te o mai ai i le lalolagi, sa fuafuaina e Ia ina ia tatou o mai i ni aiga. E finagalo o ia i o tatou aiga e puipuia i tatou, aoaoina i tatou, ma fesoasoani ia i tatou e toe foi atu ia te Ia.

E mafai ona tatou galulue e tuuina atu i lo tatou aiga se faavae e malosi atu. E mafai ona tatou faatinoina le auauna atu ma le fesoasoani atu i isi. E mafai ona tatou faalogo ma tautatala atu ma le agalelei i isi. E mafai ona tatou tatalo ma suesue faatasi i tusitusiga paia. E mafai ona tatou galulue faatasi ma faalu faatasi se taimi i le faia o mea tatou te olioli ai. I le onosai ma le faataitai soo, e mafai ona tatou fausia ai se aiga e malosi atu. ■

PESE MA LE MAU

- "E Mafai Ona Faavavau Aiga," (*Tusipese a Tamaiti*, 98)
- Luka 6:47–49

MANATU MO TALA-NOAGA FAALEAIGA

I le avea ai o se aiga, e mafai ona outou faitauina le Luka 6:47–49. Ona mafai lea ona outou talanoa e uiga i le mea ua aoaoina ai i tatou e nei fuaiupu e uiga i aiga. Na faapefea e lou aiga ona fesoasoani le tasi i le isi e ala i taimi faigata? O le a se mea e mafai ona e faia e fausia ai se faavae e sili atu le malosi?



Tatalo faaleaiga

Aai faatasi i le
'aiga o le afiafi

Afiafi faaleaiga

Taaalo faatasi

Suesuega faaleaiga
o tusitusiga paia

Asiasi i se tasi o loo ma'i

Tusi se tusi i se faifeautalai

Aoaoina o tala e
uiga i o tatou tuaa

FAIA O LO TATOU AIGA IA MALOSI

E mafai ona e faia se pepa lautele o i ai se savali e fesoasoani ai i lou aiga e faateleina le tuputupu ae malosi!

- Faatasi ai ma le fesoasoani a se tagata matua, oti ni poloka. Faapipii i luga o se fasi pepa mea na o loo faaalia mea o loo faia e lou aiga. O nei poloka o le a avea ma sui o le faavae o lou aiga.
- Filifili se isi poloka o loo faaalia ai se mea e mananao lou aiga e fai pe faia ia sili atu. A uma ona e faataunuina lenei sini, ia faaopoopo atu i lau olo. Tuu le pepa lautele i se mea e vaai i ai tagata uma ma faaauau ona faaopoopoina poloka ia malosi ai lou aiga!

Tusi nisi o ou lava manatu i luga o poloka o loo avanoa.

O le Papatisoga o le amataga lea i la tatou malaga o le avea ma soo.

Peresitene Dieter F. Uchtdorf
Fesoasoani Lua i le Au Peresitene Sili
Mai le konafesi aoao o Oketopa 2013





Saunia e Elder
Terence M. Vinson
O Le Fitugafulu



O Le Tuleiina o le Papa

Sa taumafai se tamaitiiti laitiiti se faamafolafola le vaega sa i ai le palapala i tua o lona fale ina ia mafai ai ona ia taalo i ana taavale iina. Sa i ai se maa lapoa sa faalavelave i lana galuega. Sa tulei ma toso e le tamaitiiti i lona malosi atoa. Ae e tusa lava po o le a le malosi sa ia taumafai ai, sa le mafai ona minoi le maaa.

Sa matamata i ai lona tama mo

sina taimi. Ona ia sau ai lea i lona atalii ma fai i ai, "E manaomia ona e faaaoga uma lou malosi e aveese ai se maa tele faapea."

Sa tali mai le tamaitiiti, "Sa ou faaaogaina uma lo'u malosi!"

Sa faasa'oina o ia e lona tama: "Leai, e te lei faaaogaina uma. E te lei mauaina la'u fesoasoani!"

Ona la punonou faatasi lea i lalo ma aveese ma le faigofie maa.

O a nisi mea e sili ona faigata mo oe ona fai?

E mafai faapefea ona e talosaga atu mo le fesoasoani a le Tama Faalelagi i le faia o mea faigata?

O ai se isi e mafai ona e fesili i ai mo se fesoasoani?

E finagalo le Alii ia tatou faalagolago atu ia te Ia i le foiaina o o tatou faafitauli. Ona mafai lea ona tatou lagonaina Lona alofa tele i taimi uma, e sili atu ona mamana, sili atu ona manino, ma e sili atu ona patino. E mafai ona tuufaatasia i tatou ma Ia, ma e mafai ona avea i tatou faapei o Ia. ■

Mai le "Faalatalata Atili i le Atua," Liahona, Nov. 2013, 105.



O Au o Dria

mai le Atu Filipaina



*Mabuhay, Kaibigan!**

Mai se faatalanoaga ma Amie Jane Leavitt

Pe na e moemiti e uiga i le ola ai i se motu?

O Alejandria lenei, ae o lona aiga ma uo e valaau o ia o Dria mo se faapuupuuga. E nofo o ia i le motu o Cebu i Filipaina ma lona tina, tama, ma uso e toalua. E i ai foi sona tuagane e matua atu, ae na maliu o ia ae lei fanau mai Dria. “Ou te iloa o loo avea pea o ia o se vaega o lo matou aiga, ma o le a ou vaai ia te ia i se aso ona e faavavau aiga,” o lana tala lea. ■

* “Talofa, uo!” i le Takaloka.

*O se tasi o mea ou te fiafia e fai o le siva.
O au o se tagata siva palei. O le tausaga a sau ou te faamoemoe o le a siitia atu i le isi tulaga, lea e sisiva ai i luga o tamatamaivae.
O lona uiga o le a ou faia ni seevae palei faapitoa e fesoasoani ia te au i le siva i luga o o’u tamatamaivae.*



O le atu Filipaina e sili atu ma le 7,000 motu, lea o loo i ai le tele o nofoaga matagofie e asiasi i ai. O lo matou fale e latalata i le matafaga, ma ou te fiafia e taalo i le sami. O se tasi o mea ou te fiafia e fai o le aau. Sa ou aoaoaina au lava e aau!



Ou te fiafia e o faatasi ma lo'u aiga e asiiasi i matafaga eseese. O se tasi taimi na matou o ai i Palawan—o se motu o loo i ai se vaitafe i lalo o le eleele e aupito tele i le lalolagi. Sa ou mauli iina ma au mea aau ma matamata i i'a felanulanua'i.



I se tasi aso i le aoga, na fai mai ai nisi o tamaiti o le vasega e le talitonu Mamona i le Atua. Sa ou fai atu ia i latou tatou te talitonu i ai. O le aso na sosoo ai lea na ou aumaia ai ni kata fepasia'i sa i ai se ata o lesu i le pito i luma ma mataupu Faavae o le Faatuatua i le pito i tua. Ina ua vaai tamaiti o la'u vasega i le ata ma faitau nisi o tatou talitonuga, sa latou fiafia e iloa tatou te talitonu i le Atua.



OU TE FIA VAAI I LE MALUMALU



Ua matou laki i le nonofo latalata i le Malumalu o Cebu City Filipaina. Sa mafai ona matou matamata i le malumalu faatasi ma lo'u aiga, a o le'i faapaiaina. O se nofoaga matagofie, ma le toofilemu. Ou te faafetai ona o malumalu, e mafai ai e lo'u aiga ona faatasia e faavavau.

SAUNI E O!

O le ato a Dria ua uma ona teu i nisi o ana mea e fiafia i ai. O fea o nei mea o le a e teuina i lau ato?



Ina Ia Mafaufau e uiga ia Iesu

Saunia e Mabel Jones Gabbot




E le tatau lava ona faigata le nofo filemu
ma mafaufau e uiga ia Iesu, o Lona satauro i luga o le mauga,
Ma mea uma sa Ia puapuagatia ai ma faia mo au;
e le tatau lava ona faigata ona nofo ma le filemu.

Ou te mafaufau i maila
sa Ia savalia i le pefu,



ma tamaiti sa Ia fesoasoani
e alofa ma talitonuina;



E le tatau ona faigata ona nofo sao i lo'u nofoa,
e faalogo ma le faaaloalo, e faafilemu o'u vae.

E le tatau ona faigata, e ui lava ina ou laitiiti,
e mafaufau e uiga ia Iesu, e le faigata lava. ■



O SE TAIMI FAAPITOA E MAFAUFAU AI IA IESU KERISO

O le sauniga faamanatuga o se taimi faapitoa e saofai filemu ma manatunatu i le Faaola.



Sa papatisoina lesu i le vaitafe o loritana.



Sa faamaloloina e lesu tagata.



Sa alofa lesu i le fanau.



Sa puapuagatia ma maliu lesu mo i tatou.



Na toetu mai lesu i le taeao o le Eseta.



Ona o lesu, o le a tatou toe ola foi!

Tusi pe
faapipii
se ata o oe
lava ia iinei.

MAUAINA O LE FAAMOEMOE I LE LUMANAI

Saunia e Stan Pugsley

I le aso 12 o Setema, 2001, na ma fesavalai i ma lo'u toalua i le fola o se falemai i Tucson, Arisona, ISA, e faalu itula o le popole a o ma faatalitali mo le fanau mai o lo ma atalii. Mai le ma televise ma mai televise uma i le fale, sa faateia i matou i ni ata mai le aso talu ai i le Aai o Niu Ioka—ata o fale maualuluga e lua ia sa i ai se tasi taimi sa taulaina le tafailagi o lena aai, ua pauu atu i le gasu ma le efuefu. O ata, o faasalalauga mo le tele o itula, sa matou maua ai se lagona o le leai o se faamoe-moe. Sa foliga mai o se taimi e sili ona leaga e mafai ai ona aumai se pepe i le lalolagi—se lalolagi e foliga mai sa sili ona pogisa ma taufaamatau.

O le taeao po na sosoo ai na fanau ai le ma atalii pepe. A o ou sapai le ma tama laitiiti, sa ou mafaufau i mea matautia na tutupu i ni nai aso ua mavae atu, mea na tutupu na ou toe mafaufau ai i afi i le Yellowstone National Park i le 1988. Na faaleagaina e le afi toeitiiti 800,000 eka (323,750ha) o le togavao. O le faatafunaga o le paka na foliga mai ua atoatoa. O ata o talafou na faalia mai ai na o le eleele paaa ma le asu mafiafia uliuli i le lagi. E leai se malosiaga o taumafaiga a tagata e mafai ona vave toe aumai ai mea na leiloloa. Sa foliga mai e oo lava i le toefaafouga lē faavaivai ma le malosi o le natura sa leai se avanoa mo le faataumaoi o le mana o le afi.



*O matagi lava
ia e luluina ma
tau faamatau
mai e lofituina
i matou e lulu-
ina foi fatu o
le suiga ma le
tuputupu ae.*

Ae o le tautotogo na sosoo ai sa tupu ai se vavega filemu—o tamai laau ma fugalaau sa amata ona tutupu ae mai le eleele paaa. Sa faifailemu lava, ona fuga mai le eleele le tele ma le tele o fugalaau ma laau. O le toe fanauina o le paka sa gese ma tumu i fuga ninii, ma tulagaese le mamalu, ma i le aluga o taimi, na maoae le taunuuga.

I le taimi o le fefe e foliga mai ua lofituina ai i tatou e pei o afi ua musaesae o Yellowstone, ina ua tau leai so tatou faatuatua ma le faamoe-moe, e tatau ona tatou manatua o loo i ai se tasi o faavae filemu, ma le le mafaagaetia o loo i lalo ifo o i tatou, e sili atu ona mamana nai lo soo se malosiaga leaga o le a tatou feagai. Ua faamalamalama mai e Helaman 5:12—“le papa o lo tatou Togiola, o le Keriso, le Alo o le Atua.” Pe afai tatou te taulaina i tatou lava ia te Ia, ona “pe a auina mai e le tiapolo ana matagi malolosi, ioe, ana ufananafana i le asiosio, ioe, pe a pesi mai ia te oulua ana uatoa uma ma lana afa malosi, o le a leai sona mana i luga o oulua e toso ifo ai oulua i lalo i le to o le pagatia ma le malaia e le gata, ona o le papa lea ua oulua atinae ai i luga, o le faavae mautinoa lea, o se faavae lea afai e atiae ai tagata e le mafai lava ona pauu i latou” (Helaman 5:12).

Pe a feagai ai ma au matautia a le tiapolo ma faaososoga i le lalolagi, atonu tatou te manatu o le uunaiga laitiiti ma faatauvaa o le talalelei e faaleaogaina ma lofituina. Atonu tatou te lagonaina le masalosalo ma le faanoanoa pe a tatou faatali fua mo mea sese ia faasa'oina, tiga ina ia fofoina, ma fesili ia taliina. O na lava matagi e luluina i tatou, e ui i lea, e luluina fatu o le suiga ma le tuputupu ae, ma o le mana malosi o le talalelei e galue filemu i lalo o le eleele o le olaga faalelalolagi, e sauniaina le afe o ni fatu ititi o le faamoemoe ma le olaga. ■

E alala le tusitala i Arisona, ISA.



ATA NA TUSIA E ROBERT T. BARRETT

HOWARD W. HUNTER

O Howard W. Hunter sa maua lona **Tau i o le Eagle Scout** (o le taui aupito maualuga i se polokalama o le tulaga ua ausia mo alii talavou) ina ua 15 ona tausaga. Sa faagaeitia o ia i **gafa** ma e masani ona faaaluina le taimi e saili ai i le faletusi o gafa a le Ekalesia po o le asiiasi atu i aiga. A o avea o se Apostolo, sa ia fesoasoani e filifili le nofooga mo le **Brigham Young University Jerusalem Center**. I le avea ai ma Peresitene o le Ekalesia, sa ia uunaia tagata e tapuai soo i le malumalu ma faapaiaina le **Malumalu o Bountiful Iuta** i le itiiti ifo ma le lua masina a o lei maliu o ia.

E I Ai Foi i Lenei Lomiga

MO TALAVOU MATUTUA



Afai E Tau Tasi o Outou Mata i

Lo'u Mamalu

i.40

O autalavou matutua mai le salafa o le lalolagi o
loo mafaufau e uiga i le mulimuli i le faataitaiga
a le Faaola ma le ola tauagafau.

MO LE AUTALAVOU

Mata e lanumeamata le masina?

Pe o se mea taufaasese le tulauelolele i le
masina? Fai le suega lenei ma aoao ai pe
faapefea ona iloa le eseesega i le va o
upumoni a le Atua ma pepelo a Satani.



i.64

SAO pe SESE

MO TAMAITI

“E Matua Faigofie lava, Tamamatua!”

i.67

Pe e te ofo i le iloa e mafai ona e faitauina
atoa le Tusi a Mamona i se aso ma le afa?

